

MATEYON DADA UAID

Esuquidistun tsusedpabotedi chiaid

(Duc 3.23-38)

¹ Esuquidistu chuiquin dada uanu. Aidën tsusedpa Abadauan nec. Aidën tsusedpabidi Abadauanën tsyuecquid Dabid nec. Abadauanën tsyuecquido chuiquinc aidën tsyuecquid Dabidën tsyuecquido chuiquinc caquin Esusën tsusedpabotedi chuinu. Tantia.

² Abadauanquiobi bedanquin chuinu. Abadauanën mado Isac cuëmëdpampic. Isaquën madobic Acobo cuëmëdquid. Acobon mado dadpen icpampic. Abentsëc Uda cuëmëdnuc aton buchiado utsi-utsiec cuëmëdpampic. ³ Adnubien Acobon mado Uda caidën Tamad caid abentsen chudpampic. Aden chudaqui bacuë daëd usundoshon abi ushëmbi aton mado daëdpambo tishpampic. Abentsëc Pades cuëntanquin utsi Sada cuëm-pampic. Padesën mado Eston cuëmëdpampic. Estonën madobic Adan cuëmëdquid. ⁴ Adanën madobic Aminidad cuëmëdquid. Aminidadën madobic Nason cuëmëdquid. Nasonën madobic Sadmon cuëmëdquid icpampic. ⁵ Adshumbic Sadmonën aton chido Daba bedshun aton mado Bos tishmepampic. Adoac canishumbi Bosën aton chido Dud bedshun aton mado Obed tishmepampic. Obedën mado Isai cuëmëdquid icpampic. ⁶ Adshumbic Isain aton mado Dabid isadaidbo chuiquid dapambo tishmepampic. Adoac canishumbic Dabidën dada utsi Udias caid cuesunetanquin aton chido bedshun aton mado Sadomon tishmepampic.

⁷ Sadomonën mado Doboan nepampic. Doboanën madobic Abias cuëmëdquid. Abiasën madobic Asa

cuëmédquid. ⁸ Asan madobic Osapad cuëmédquid. Osapadën madobic Odan cuëmédquid. Odanën madobic Usias cuëmédquid. ⁹ Usiasën madobic Otan cuëmédquid. Otanën madobic Acas cuëmédquid. Acasën madobic Esequias cuëmédquid. ¹⁰ Esequiasën madobic Manases cuëmédquid. Manasesën madobic Amon cuëmédquid. Amonën madobic Osias cuëmédquid. ¹¹ Osiasën madobic Econias cuëmédquid. Aid Econias caid aton matesadobédtabi yuanuen Babidonia yacnocquidon aton nidaidën buampampic.

¹² Buanac shubu dadpen icquid Babidonia caid yacnoshon Econiasën aton mado Sadatied tishmepampic. Sadatiedën mado Sodobabed cuëmédpampic. ¹³ Sodobabedën madobic Abiud cuëmédquid. Abiudën madobic Ediaquin cuëmédquid. Ediaquinën madobic Asod cuëmédquid. ¹⁴ Asodën madobic Sadoc cuëmédquid. Sadoquën madobic Aquin cuëmédquid. Aquinën madobic Ediud cuëmédquid. ¹⁵ Ediudën madobic Ediasad cuëmédquid. Ediasadën madobic Matan cuëmédquid. Matanën madobic Acobo cuëmédquid. ¹⁶ Acobon madobic Ose cuëmédpac caondash. Aidquio Madian bënë nepac caondash. Aidën inabi Madian Esus usundoshon tishpac caondash. Esus Nuquin Papan chomiaid yec mates bédambo icmequidquio nec. Isadaidbon cainaidquio nec.

¹⁷ Aidedi Esusën tsusedpabo icpampic. Abadauamba bedanquin aton mates 14tedi chuiquin Dabid ënquin chiombi. Adoshombic Dabid ënquin chuiboed chuiioquin padpiden bedanquin aidën mates 14tedbidi chuiquin Econias aton matesbédta buanaid ënquin chiombi. Adoshombic Econias ënquin chuiboed chuiioquin padpiden bedanquin aton mates 14tedbidi chuiquin Esusquiobi ënquin chiombi.

Mateyon Dada uaid 1:183 Mateyon Dada uaid 1:24

Esuquidistu tishaid

(Duc 2.1-7)

¹⁸ Nēbi aid tishaidquio chuinu. Esus tishabi yec aton tita Madia icpac caondash. Abi inuequidēn Osen bedabi icshobi Nuquin Papan Mayanēn bacuē usundomepac caondash. ¹⁹ Usundoacsho isun abi inuequidēn Osen dada utsin chudaid danec: —“Nēbi mibi bedtiapimbo iquebi,” quequin bedenquio icnuen dada uashun Madia menenu —queuidpac caondash. Nuquin Papan chiacpadquio bēdambo icquid icquin naden chiambo icpac caondash. —Bedabi bacuē usundoaque. Cuidquimbien ictiad —quequin aton matses chienquio yequi: —Bedenquio icnuen dada uaid menenu —queuidpac caondash.

²⁰ Adnubien Nuquin Papan abi yacnoshon uaidēn mayan bēdan Ose ushquin ismepac caondash. —Dabid yampidēn tsyuecquid icsho mibi chuinu, Ose. Tantia. Chudenquio icquin Nuquin Papan Mayanēn Madia bacuē usundomiaye. Dacuēdenda. Dacuēdenquio icquin Madia min shubuno buanta. ²¹ Adoshombic dada bacuē tishacsho Esus cuēnta. “Matses icsaid bedshunquin Nuquin Papa aton matses cuidmenquio iquendac,” quequin Esus cuēnta —quequin mayan bēdan Ose ushquin ismepac caondash.

²² Aden mayan bēdan Esus tishte chiacpadomboen Nuquin Papan ambi chiaid naden dada uamepampic.

²³ “Dadan inacmaidēmbi bacuē usundoshon dada bacuē tishendac.

Aidi Imanued cuēnendac.

‘Nuquin Papapadquidquibidi matsesbēd tabadnuec choash nec,’ quequin Imanued cuēnendac,” quequin Esus tishte Nuquin Papan dada uamepampic.

²⁴ Aden mayan bēdan chiac isucunshumbien aidēn chiacpadomboen Osen aton shubuno Madia buampac caon-

dash. ²⁵ Buanshun Osen chudenquio icnubi dada bacuë tishpac caondash. Tishacsho Esus cuëmpac caondash.

2

Uispa isquido Esus isec choaid

¹ Nidaid Udeya caid yacno tabadquin shubu daëdpact-sëcquid Beden caid yacnoshon Esus tishpac caondash. Adnubien shubu dadpen icquid Edusaden caid yacno isadaidbo matses ancaquid Edodes cuëmëdquid icpac caondash. Aid icnubi matses utsibo uispa isquido Esus isnuec ushë choacmiuësh chopac caondash. Edusaden yacno choquin ² anocquido chuituidpac caondash. — Min matses isadaidbo chuiquid dapa ictequidquio nëbi tishtsaidëmpi ¿midambo ictseque? Isnu. Aid tishaid tantiamete uispa isombique. ¿Mitsimbo ictseque? Isnu. “Chuiquid dapa bëdamboshë ictequid nec,” quiash aid isnuec chopobi —quetuidpac caondash.

³ Adsho tantiash dacuëdcuededpac caondash abitedimbo. —Padtec. ¿Midapadquid bacuë nependabac? —quecuededpac caondash Edodes isadaidbo ancaquid ambi ancaidobëdi. ⁴ Adshumbien Edodesën abi yacno tsusiobo cho-chomepac caondash. —¿Mitsicquid caique? Tiantianu —qeshun abi yacno Moisesën dada uampid chuibanquido abi chuiquid dapabobëdta cho-chomepac caondash. Cho-chomeshumbic: —¿Mitsishunquio Nuquin Papan chomiaid min matses chuiquid dapa ictequid tishpash? ¿Ada Nuquin Papan chiaid isbanquin tantio? —caquien: ⁵ —Ai, tantiembi. “Nidaid Udeya caid yacno tabadquin shubu daëdpactsëcquid Beden caid yacnoshon aid bacuë tishendac,” quiampicpadembi tantiembi. Nuquin Papan ambi chiaid nuquin tsusedpa dada uamepampic naden. ⁶ Shubu daëdpactsëcquid Beden caid yacnocquido chiec:

“Beden yacno tabadec nidaid Udeya caidën tabadquido mibi nec.

‘Chuiquid dapa nibëdnuc icsambo iquendac,’ quedenedi mibi yacnoshon chuiquid dapa ictequid tishendac.

Aidëmbi isadaidbo matses chuiquid dapa icquin bëdamboen tabadmendac,”

—quequin Nuquin Papan Esus tishte chiaid chuipac caondash tsusiobon Edodes caid chuiquin.

⁷ Adoaquien Edodesën ambi ancaido isadaidbo ismenquo icquin matses utsibo uispa isquido chomeshun chuimepac caondash. —¿Nëbida tishaid tantiamete uispa isquin tauao? ¿Nëid inchëshën ushëmbida isbeno? ¿Ëndenda isbenonda? En chui. Tantianu —cac chuisho ⁸ tantiasun: —Beden yacno istan. Ano nidshun mimbi chiacpadquid bacuë istan. Aid bacuë istanec cuenquin ëbi chuibenta. Ëmbitsen istanu. “Nuquin Papan chomiaid chuiquid dapa ictequid bëdambo iquec,” quequin ëmbitsen istanu —capac caondash Edodesën muaquimbi. —Cuesunenu —quequimbi adopac caondash.

⁹ Adoaquien ushë choacmiuësh bed-bedquesho ambi isbëquin tsibambëboedi uispa tsibanec Beden yacno nidpac caondash. Adec nidnubien uispa shubu ismec nidtuidpac caondash: —Bacuë ictsaid shubu nëid iquec —quec.

¹⁰ Adsho isashien cuishonquepac caondash uispa isquido.

¹¹ Adash shubun puduedshun isquien aton tita Madiabëd bacuë ictsec. Aid isashic: —Matses chuiquid dapa ictequid nec. Matses bëdambo icmetequid nec —quequin aton matsesën nacpadomboen ismequin danëshën sebudpac caondash. Adshumbic ambi bëboed aton na bëdambo icquid chicshun menepac caondash nëidtedi. Nëidic shocosh piu. Nëidic bëdambo nuadnuc tauitequid. Nëidic bëdambo noadec danoshquete. Aidtedi menepac caondash. Adash ushtopac caondash. ¹² Adec ushtoacsho

Nuquin Papan ushquin ismepac caondash. —Isadaidbo ancaquid Edodes chuibidanenda —quequin ushquin ismiac isucunanec abi choboedën nidenquio yec podqued utsin nidpac caondash aton shubuno nidec.

Equipito yacno Osen buanaid

¹³ Esus isuanquido nidambien Nuquin Papan abi yacnoshon uaidën mayan bēdan Ose ushquin ismepac caondash. —Isucunanec cuenta. Bacuēmpi aton titabēdta buanec nidaid utsi Equipito caid yacno cuenta. Ēmbi chiabi choenda. Anobi tabadta. Edodesën: “Bacuēmpibo cuesun siatanta,” cac cho-choeque. Cuenta —quequin Ose ushquin ismepac caondash mayan bēdan.

¹⁴ Aden ushquin ismiac isucuntantsequi inchëshēmbi puduanec aton bacuē anibēdta buanec nidaid utsi Equipito caid yacno Ose nidpac caondash. ¹⁵ Equipito yacno nidash ambobi tabadpac caondash. Isadaidbo ancaquid Edodes unēsabi icnuc Equipito yacno tabadpac caondash. Esus tishabi icnubi ěndenquimboshē Nuquin Papan tantiamiac ambi chiaid chuibanquidën Esus Equipito yacno buante chuiquin dada uapampic naden chuiquin. “Equipito yacno nidash tabadsho: ‘Auëshquio cho, Mado, caindambi,’ quiosh Nuquin Papa,” quequin Nuquin Papan chiaid dada uapampic.

Bacuēbo dadpen cuesun siatanaid

¹⁶ Adnubien isadaidbo ancaquid Edodes: —Uispa isquidon cacuidposhi —quiash comapenec nēishun aton yuabo sondado chuipac caondash. —Uispa isquidon chuibocpadtsēcquid comapenec onquecuenabi ictsēcquidotedi dada bacuēmpibotedi cuesun siatan. Bēden yacnocquidon bacuēbobēdtabi uano pauequidon bacuēbotsen cuesun siatan —cac cuesun siatampac caondash. ¹⁷ Aden cuesun siatanambo icnubi Nuquin Papan

adote chiaid ëndenquimboshë Edemias cuëmëdquidën dada uapampic naden chuiquin.

¹⁸ “Abi yacnuësh aton bacuëbo nibëdansho isash isadaid-bon chidobo sedenquecuededendac.

Unësaid tantiec baded ënëdenquio yec sedenquebudnendac,”

quequin chiampicpadomboen aton bacuëbo nibëdamepac caondash.

¹⁹ Yuecquio ictaniashic isadaidbo ancaquid Edodes caid unëspac caondash. Adambic nidaid utsi Equipito caid yacno tabadsho Nuquin Papan abi yacnoshon uaidën mayan bëdan Ose ushquin ismepac caondash.

²⁰ —“Bacuëbo cuesun siatan,” quiondaid unësaccoshe. Min chido min bacuëbëdta buanec min nidaid Isadaid caidën nidoata —caquien ²¹ isucunanec aidën chuibocno buanec nidpac caondash.

²² Aton nidaidën nidshun aton matsesën chiaid tantiapac caondash. —¿Ada tantio? Udeya yacnocquido ancadened unësaidën mado Adquedayo caid ancanquidquiobidien nechitec —quesho tantiashien dacuëdtampac caondash Ose. Adshobien Nuquin Papan Ose ushquin ismeopac caondash. —Cuesunenushe. Min nidaid Udeya caidën nidenda —quequin ushquin ismiac isucunanec aid nidaid Isadaid caidëmbidi nidec aid nidaid cuëshë utsi Cadidia caidën nidpac caondash. Udeya caidën nidenquio yec uquëmbo nidpac caondash. ²³ Uquëmbo nidec shubu dadpen icquid Nasaded caid yacno choash ambo tabadtu-idpac caondash. “Nasaded yacnocquid nendac,” quequin Nuquin Papan chiaid dada uampicpadec anobi tabadpac caondash. Auëshquio canipac caondash Esus.

3

Uan acten mentoanquidën chuibeniaid
(Mad 1.1-8; Duc 3.1-9, 15-17; Uan 1.19-28)

¹ Adash yuecquio ictaniashien Uan caid Nuquin Papa tantiabenquido acten mentoquid icpac caondash. Nidaid Udeya caid yacno shubu nibëdacno capucuenequin Nuquin Papan chiaid chuibenequid nepac caondash.

² Adquid icquin Esus chote chuibampac caondash naden. —Mibi icsaid ënash bëdamboec tabadta. Nuquin Icbombo choeque —quequin chuipac caondash. ³ Aden Uanën chuite chuiquin Nuquin Papan isadaidbo tsusedpa Isayas cuëmëdquid dada uamepampic naden.

“Masiuidpambo yacno shubu nibëdacno capuquin ëcac matses chosho chuibenendac.

‘Chuiquid dapa choeque. Podqued andëdbanshunta,’ quiacbimboen:

‘Nuquin Icbombo choeque.

Icsaid ënash bëdamboec tabadta,’ quequin chuibenendac,”

quequin Isayasën Uanën chuite chuipampic.

⁴ Nadquid Uan icpondash. Aton dashcute nëish yua dapa cameyo caidën bu daëdcaid dasiuidpondash. Tsi-pantebic nidaidën capuquid yua bitsi nacnenaid tsiupon-dash. Aton pete bacumbëd shioshbimboecquid icpon-dash. ⁵ Aidën Nuquin Papan chiaid chuibenesho tantianuec nëidtedi matses cho-chopac caondash. Nëidic shubu dadpen icquid Edusaden caid yacnocquido. Nëidic nidaid Udeya caid yacnocquido. Nëidic acte Odan caid cuëman tabadquido. Aidtedi cho-chopac caondash.

⁶ Cho-choshon Uanën chuisho tantiash: —Nuquin Papan chiaid niac-niaquec icsapobi. Icsaboedi aid tantiec bëdamboec tabadtiadquio iquebi —quesho: —“Nëid Nuquin

Papa tantianu,” quequid nec —quequin acte Odan caidën mentopac caondash Uanën.

⁷ Adnubien padiseyobobëd saduseyobo Uan isec chopac caondash. Padiseyobo isadaidbo tsusedpabon chiaid namequido nec. Saduseyobobic: —Matses unë-said uincuenenquio iquendac —quequido nec. Aido cho-chosho isun Uanën: —Nisibimboecquido mibi nec. Adquidën icsa uacbimboen matses icsa uaquido mibi nec. Bëdambo icquid damianquiec mibi iquéc. “Nuquin Papan mibi cuidnushe. Tantiatan,” quequin ¿tsuntsin chiac cho? ⁸ Mentomete bunec Nuquin Papan chiaid niac-niacboedi ënash bëdamboec tabadta. ⁹ “Ëbipadquid Abadauanën tsyuecquidouditsëqui Nuquin Papan bëdamboen isec,” quequin tantienda. ¿Adquidta Nuquin Papan bëdamboen ispec? Abadauampadquid abi tantiaquidien Nuquin Papan bëdamboen isec. Mimbi bëdamboen tantiatiapimbo icsho isun nëid cuënotebi matses uashun Nuquin Papan Abadauampadquid abi tantiaquidombo icmetsiash icnushe. Nuquin Papambo tantiata. ¹⁰ “Icsambo icquid nec,” queshun ambi nitsinaid cuëte bacuëesa dëdshun nëdëncabimboen ambi chiacpadomboen naisa Nuquin Papan cuidendac —quepac caondash Uan padiseyobo saduseyobobëdta chiec.

¹¹ Adshumbic padpiden chuiquin Esusën nate chuipac caondash. —Nuquin Papa tantianuequid acten mentobanquin chuibanquid nebi. Padnuen con tsyuecquid choshon aidëntsen chuibanendac. Ëbi bëdiactsëc tantiaquid ictsëcnuc aidquien comapenen tantiaquidquio yec bëdamboshë iquendac. “Aidquio bëdamboshë icquid icnuc ¿atotsieshun icsaquidquiobi: ‘Aid choec,’ quequin chuiquidquio Nuquin Papan ëbi icmeposh?” quec tsadebi. Ëmbi chuiboed choshon: “Ëbi tantiaquid nec,” queshun aton Mayan menequin bëdamboec tabadte mibi tantia-

mendac. Abi tantiesaboen cuidendac. ¹² Piacbo choeshashun putu bushcaquin secacimboen abi tantiesabochian anëdënquiacno nësecaindac. Adshumbic abi tanti-aquido abëdi tabadmendac —quepac caondash Uan acten mentoanquid.

*Uanën Esus mentoaid
(Mad 1.9-11; Duc 3.21-22; Uan 1.32-34)*

¹³ Acte Odan caidën matses mentoec adpac caondash Uan. Adnubien Uan yacno Esusquio chopac caondash. Aton nidaid Cadidia caid yacnuësh tauamboen matses ismenuec choec: —Ëbitsen mento —quetuidpac caondash. ¹⁴ Adshobien Uanën: —Padenquio iquembi. Nuquin Papan chomiaid icquin mimbibi ëbi naquien bëdambo ictsiash. ¿Atotsieshun ëbi aden chie? Padi —queshobien: ¹⁵ —En na. Bëdambo iquec. Ëbi mentoquin mimbi Nuquin Papan chiacpadomboen natsiaque. Ëbi acten mento —quesho tantiashun Esus acten mentopac caondash Uanën.

¹⁶ Adoac Esus pudundonobien canchedacimboec abu shëcuë yampac caondash. Adsho isaquien aid shëcuë yacnuëshquio dëbimbimboec budec Nuquin Papan Mayan Esusquio matsadtopac caondash abëd icnuec. ¹⁷ Adnubien abucuëshquio Nuquin Papa onquiampac caondash. —Nëid ëmbi tantiaidquio con Mado nec. Ëmbi chiacpadomboen nasho isash bëdambo iquebi —quepac caondash Esus caic.

4

*Satanasën Esus icsamenuequin tanuidaid
(Mad 1.12-13; Duc 4.1-13)*

¹ Uanën acten mentobocshobien Nuquin Papan Mayanën masiuidpambo yacno matses nibëdacno Esus nidmepac caondash. —Ma Nuquin Papa chieshënquid

Satanasën Esus icsamenuequin ma tanu —quequin ambo nidmepac caondash.

² Adoaquien buna mëmunquin penquio yec Esus tsadpac caondash. Inchëshën ushë abentsëc nidmiash utsi tashquecuntsëcnuc 40tedec ushquin penquio yec comapenec bumpac caondash. ³ Bunec tsadshobien Satanasën istuidpac caondash. Istuidtanquimbien: —¿Nuquin Papan Madombobida mibi neque? Aidën Madombo icquin nëid cuënote cain: “Pete icta,” cata —caquien ⁴ Esus: —Padi. Nuquin Papan chiaid dada uapampid nad iquec. “¿Peteuidi tantiecta matses bëdamboec tabadpec? Nuquin Papan chiacpadomboenuidi naiquien matses bëdamboec tabadtsiash,” quequin dada uapampid iquec —quepac caondash Esus.

⁵ Adsho tantishumbien shubu dadpen icquid Edu-saden caid yacno buanshun Nuquin Papa tabadte shubu uashunaid macano Satanasën Esus manidtomepac caondash abucquio. ⁶ Adotanquimbien padpiden chuioaquin: —¿Nuquin Papa caidën Madombobida mibi neque? Aidën Mado yec nëuëshquio pudunta. Nuquin Papan mibi pädmenquio ictsiashe. Nadentsen Nuquin Papan chiaid dada uapampic.

“‘Uidën uata,’ quequin ambi abi yacnoshon uaido mayan bëdabo Nuquin Papan chiac mibi uidën uaindac pädenquio icnuc.

‘Cuënoten tadquëdnushe,’ queshun adoendac,” quequin Nuquin Papan chiaid dada uapampique. Pudunta —caquien ⁷ Esus: —Padi. Nuquin Papan chiaid dada uapampid nad iquec. “‘¿Icsamboen tantiaquin ëmbembi nashodabi Nuquin Papan cuidpatsiashe? Tanu,’ quenda,” quequin dada uapampique. Padi —quepac caondash Esus.

⁸ Adoaquien Satanasën padpiden buanquin macuësh dapa abucquiocquid manidtomeshun nidaid abichobi

Esus ismepac caondash. Chuiquid dapabotedi ismequinc aidobëd icquido ismequinc aidon dayun uaidtedi ismequinc capac caondash. ⁹ Adoshombic: —Nëidtedi mibi menetsiambique. Èbi con icbo cata. Èbi aden chuiquin ismenuen danëshën sebudta. Adsho isun ëmbi ismiactedi mibi menembi. Aidën icbo mibi icmembali —caquien ¹⁰ Esusën: —Padi. Baded cuenta. Nuquin Papan chiaidquio chuiquin naden dada uapampique. “Nuquin Papa abentsëcquiobi mimbi tantiaiduidtsëqui min Icbombo neque. Aidën namiaidquio icta,” quequin dada uapampique. Cuenta —capac caondash Esusën. ¹¹ Adoquien Satanas cuempac caondash. Cuenubien Nuquin Papan abi yacnoshon uaido mayan bëdabo choshon abëdi tabadquin Esus bëdambo icmepac caondash.

Cadidia yacnoshon Esusën chuibeniaid

(Mad 1.14-15; Duc 4.14-15)

¹² Adashic aton nidaid Cadidia caidën Esus nidpac caondash. —Mibi acten mentondaid Uan bedshun quënënauedac caosh —quesho tantiaish nidpac caondash. ¹³ Nidashic shubu dadpen icquid Nasaded caid yacno tabadash nidec chian dapa cuëman shubu dadpen icquid Capednaun caid yacno nidash anotsen tabadoapac caondash. Aid nidaid Netadi capampic. Aid anoentsëqui icquid nidaid utsi con tsusedpabon Sabudon capampic. ¹⁴ Esus ambo tabadte chuiquin Nuquin Papan con tsusedpa Isayas cuëmëdquid dada uamiampicpadec ambo tabadpac caondash Esus. Naden dada uapampic.

¹⁵ “Nuquin Papa tantiamëquidën chuisho nëidtedishun tantiendac.

Nëidic nidaid cuëshë utsi Netadi caidën tabadquidon.

Nëidic nidaid cuëshë utsi Sabudon caidën tabadquidon.

Nëidic chian dapambo anoentsëqui tabadquidon.

Nëidic acte dapa Odan caid cuëman tabadquidon.
Nëidic isadaidpembo dadpen tabadacno Cadidia caidën
tabadquidon.

¹⁶ Aidedishun Nuquin Papan chomiaid tantiendac.
Pabiate cuënëdacbimboec icsamboec tabadquin Nuquin
Papa tantienquo icboedombi tantiabenendac.
Nuquin Papa tantiamenuen chuibansho tantiashun mat-
sesën paposhquiacbimboen Nuquin Papa tan-
tiabenendac.
Abi tantienquo icsho Nuquin Papan cuidtsemaidombi
Nuquin Papa tantiabenendac ushash
isucunacbimboen,”
quequin Isayas Esus choash tabadte dada uamepampic
Nuquin Papan.

¹⁷ Ashunquiobi Nuquin Papan chiaid chuiquin tauam-
boen Esusën matses abitedimbo chuibenepac caondash.
—Icsaid ënash Nuquin Papa tantiec ambi chiacpadec bë-
damboec tabadta. Nëbi Nuquin Papan abëd tabadtequido
icmequin matses bëdamboen tabadmendac —quepac
caondash Esus ambibi naid chiequi.

*Nuëcquid bedquido Esusën: Cho, caid
(Mad 1.16-20; Duc 5.1-11)*

¹⁸ Aden chuibenec chian dapa Cadidia caid cuëman
nidquin isquien dadan aton utsibëdtambi nëshaid da-
pambo acte nënepec. Aid Simombidi Petedo capec. Aton
utsi Andedes nec. Aid daëdshun nuëcquid bedquidombo
icquin aton nëshaid acte nënesho istuidpac caondash
Esusën. ¹⁹ Adshumbien Esusën: —Nuquibi icnu. Cho.
Nuëcquid bedquid icboedi nëbi ëbi chuibanquid mibi
icmenu ²⁰ —caquien aton nëshaid nianec nidquimbi Esus
tsibanampac caondash.

²¹ Udictsëc nidquin isquien dada daëd cano antabëdpec.
Acobo aton utsi Uambëd icpac caondash. Aton papa

Sebedeyo caidbëdi cano antabëdquin nuëcquid bednun aton nëshaid dapa nacnempac caondash. Adsho istuidshun Esusën: —Nuquibi icnu. Cho —caquien ²² aton papabëdta cano nianec Esusbëd icnuec nidpac caondash.

Matses dadpen Esusën chuibeniaid
(Duc 6.17-19)

²³ Adashic aton nidaid Cadidia caid yacnobi capucuenec Nuquin Papan chiaid chuibante shubun-shubunquieci puduedcuenequin Esusën Nuquin Papan chiaid chuibenepac caondash. Abi yacno tabadmenun Nuquin Papan bëdamboen iste matses chuibeniac caondash. Adshumbic daicsaidotedi bëdamebampac caondash. ²⁴ Adosho istanquin: —Bëdamequidquo nec —quequin isboedon Esusën naid chuibenepac caondash. Ënapen nidec nidaid utsi Sidia caidën nidshun chuibeniac caondash. Aden chiac daicsaidotedi bë-bëpac caondash. Dada paëmboshë icquido yec podobitsi icsa dapuduedaido yec unësanequido yec dada shëquëquenquo icquido yec quenuc bë-bëacsho aitedi bëdamepac caondash Esusën. ²⁵ Aden: —Bëdamiosh —quequin chiac isec chochoash dadpenquo tsucus-tsucustsëcquo yec tsidadash niquianquin Esus tsibanampac caondash. Nëidtedshun tsibananac caondash. Nëidic nidaid Cadidia caidën tabadquidon. Nëidic shubu dadpen icquid Decapodis caid yacno tabadquidon. Nëidic shubu dadpen icquid Edusaden caid yacnocquidon. Nëidic nidaid Udeya caidën tabadquidon. Nëidic acte Odan caid uquë cuëma utsiuc tabadquidon. Aitedshun Esus tsibanampac caondash.

5

Nadquido bëdambo iquendac, quequin Esusën chiaid
(Duc 6.20-23)

¹ Matses dadpeshun tsibananac macuësh dapa cuête nibëdpamboecquid pudundoec poctsebi Esus tsadtuid-pondash. Abi tsibananash matses dadpen abi datsidad-nubien abëd icquido Esusën dayunquio tabadpondash.

² Adshobien Nuquin Papan matses bëdamboen isquin bëdambo icmete Esusën matses abitedi chuibampondash.

³ —¿Mitsipadquid Nuquin Papan bëdambo icmepec? Nadquid caimbique. Tantia. Mibitedi chuinu. “Ëbemi bëdamboec tabadtiapimbo iquebi. Bëdapenquio iquebi. Nuquin Papan bëdamboen tabadmiaquini bëdamboec tabadtsiac,” quequid Nuquin Papan: “Ëbëd tabadtequid nec,” quequin bëdambo icmendac.

⁴ “Matses abitedi icsamboec tabadnuc ëbitsen icsamboec tabadquid nebi,” quec shubiquimbi abi tantiasho Nuquin Papan bëdamboen isquin bëdambo icmendac.

⁵ Aton nauidi tantienquio icquin Nuquin Papa tantiaquin utsibotsen tantiaquid Nuquin Papan bëdambo icmendac. Yuecshun ambi nidaid chuca uaidën tabadmendac.

⁶ Pete bunacimboec ambi chiacpadec bëdamboec tabadte bunquid Nuquin Papan bëdamboen tabadmendac.

⁷ Abi chieshënquidi chieshënenquio icquin bëdamboen isquid Nuquin Papan bëdamboen isendac.

⁸ Ambi chiacpadomboenuidi nate bunquid Nuquin Papan bëdambo icmequin abibi bëismendac.

⁹ Aton matses chieshënansho isash: “Padi. Chën. Bëdamboequien tabadtiad,” quequid Nuquin Papan bëdambo icmequin con mado caindac. Adquidbidi adembidi con champi caindac.

¹⁰ Nuquin Papa tantiec bëdamboec tabadsho utsin chieshënaid Nuquin Papan bëdambo icmequin unësacsho abëdi tabadmendac. ¹¹ “Esus tantiaquid nec,” qeshun utsin mibi chieshënquin chiacsho Nuquin Papan abëd

tabadmenuen mibi bēdambo icmendac. Mibi cueso adem-bidi mibi bēdambo icmendac. Adem-bidi mibi muauasho Nuquin Papan mibi bēdambo icmendac. ¹² Aden utsibon: “Esus tantiaquid nec,” qeshun chieshēnaqui cuishon-queta. “Ēnden tsusedpabon Nuquin Papan chiaid chuisho chieshēnquin cuesunepampic. Adoacsho Nuquin Papan bēdamboen isquin abēdi tabadmec. Adem-bidi utsibon chieshēnacsho ēbi bēdamboen isquin unēsacsho abēdi tabadmendac,” quiash cuishonqueta —quequin chuipon-dash Esusēn.

*Abi tantiaquido bēdamboec tabadte chiaid
(Mad 9.50; Duc 14.34-35)*

¹³ Abi macuēsh dapa poctse tsadquin Esusēn chuibam-pondash. —“Ma utsibontsen Nuquin Papa tantianu,” quec sa pambid casecac batambo yec petiadquio yacbim-boec icta. Aden Nuquin Papan chiacpadec bēdamboec tabadquin mimbi utsibo bēdamboec tabadte bumet-siac. Sa batambo icquid bēdambo iquec. Sa batambo icboedi batapenquio yec icsasho ¿mitsipadentsi batambo icmeoapec? Adotiapimbo iquec. Sa icsambo yanac-sho penquio icquin secatequid nec. Adem-bidi mat-ses bēdamboec tabadenquio yec icsambo icsho Nuquin Papan chian anēdenquiacno nēsecatequid nendac —quepondash Esus.

¹⁴ Adashic padpidec onquec: —Nuquin Papan chiac-padec bēdamboec tabadte utsibo tantiamequido mibi neque. Aden tantiamenuec bēdamboec tabadta. ¿Nun-tanshunda ēapadic? Padenquio. Umanucshumbien ma tantianueshun ēaquid. Adem-bidi: “Ma Nuquin Papan chiacpadec tabadte tantianu,” quiash ēnēdenquio yec bēdamboec tabadquin ismeta. Adsho isash: “Nuquin Papa tantiec bēdamboec tabadquid nec,” quetsiash utsibo.

¹⁵ ¿Utsibo chuinuecta abentsëqui uano icpadic? Padenquio. “Ma nëidën tantianu,” quec aidbëdi bëdamboec tabadquin chuibanquid. ¹⁶ Adembidi ëbi tantiesabobëd tabadquin: “Ma Nuquin Papa tantianu,” quequin ënenquio icquin Nuquin Papan chiacpadomboen nata. “‘Nuquin Papa bëdambo iquec,’ ma utsibotsen quenu,” qeshun adota —quequin Esusën chuipondash.

Nuquin Papan Moises chuimiaid chiaid

¹⁷ Nadentsen Esusën chuipondash. —Ëmbi chuiban-sho tantiashun: “Nuquin Papan chiaidquio chienquio iquec,” quequin tantienda. “Nuquin Papan Moises dada uamiampidbëdta con tsusedpabo utsibo dada uamiampid chienquio icquin utsi uapec,” mimi ëbi capec. Mambi utsi uainquio yoc. Nuquin Papan chiaid utsi uainquio icquin ambi chiactedimbo namenuc nebique. ¹⁸ Abimbo chuinu. Tantia. Abubëdta nidaid nibëdamiabi icnuc Nuquin Papan chiaid bënudtiapimbo iquendac. Ambi chiactedimbo naquin Nuquin Papan nainendac.

¹⁹ Padnubic Nuquin Papan: “Nadomboen nata,” quequin chiaid abentsëqui niacquin aid chiaidbidi adomboembidi niacmequid Nuquin Papan: “Bëdambo icquid nec,” catiapimbo iquec. Utsibic Nuquin Papan chiacpadec tabadec: “Nuquitsen bëdamboec tabadnuna,” quequid abi yacno nidacsho Nuquin Papan: “Bëdamboshë icquid nec,” caindac. ²⁰ Moisesën dada uampid chuibanquido padiseyobobëd Nuquin Papa yacno puduedtequidoen mimi dampec. Aido bëdambo icquid damianashi ompodash icsaic. Adashic Nuquin Papa yacno puduedtiapimbo iquendac. Adembidi Nuquin Papan chiaid niac-niaquec adecbidi Nuquin Papa yacno mibi puduedtiapimbo iquendac. Nuquin Papa tantiec bëdamboec tabadquidien puduedtsiash —quequin chuipondash Esusën.

Chieshëmënquido nëish bédante chiaid
(Duc 12.57-59)

²¹ Adshumbic Esusën padpiden chuiopondash. —Nuquin Papan chiaid chuiquin isadaidbo tsusedpabon: “Cuesunenda. Cuesunianquid Nuquin Papan chiacpadomboen matses cuidte chuiquidën cuesunemequin cuidquid,” quequin chuipampid mimbi tantiec. ²² “Nadquidotsen cuidtequido nec,” quequin chuinu. Tantia. Aton matses nëishënash aton nëish bédanenquio icsho Nuquin Papan cuidtequido nendac. Utsibic chieshëmë nec icsamboec cuëmënquido isadaidbo tsusiobon cuidacsho isun: “Bédamboen naic,” catsiambi. Nëidic aton matses chieshënquin shëpiaquid Nuquin Papan icsano nësecaquin cuidtequido nendac. ²³ “Chieshëmënquid Nuquin Papan cuidtequid nendac,” quequin ëmbi chuisho tantiashun bédamboen nata. Nuquin Papa tabadte shubu uashunaidën puduedash: “Ambi chiacpadomboen musuc menenu,” mibi quepec. Aden musuc menenumbi mimbi naid tantiata. “¿Ada ëbi chieshënquid icpec? ¿Ëmbi chieshëmeboedta icpec?” quequin tantiata. ²⁴ Adshun: “Ai, ëmbi chieshëmeboed iquec,” qeshun Nuquin Papa tantiaquin mimbi bëboed meniabi mibëd chieshënamboed yacno nidash aidbëd bédamboec onqueta. Adec bédamboec onquiash padpidec choashun Nuquin Papa tantiaquin meneta. Adec mibëd chieshënamboedbëdi bédamboec onqueta.

²⁵ Mibëd chieshënamboed utsimbic: “Nëid cuidmenuen cuidte chuiquid yacno buanchitembimbi iquec,” qeshun: “Baded nid,” cac podquedën nidec aidbëd bédamboec onquenidta: “Ma nëish bédanu,” quiash. “Matses cuidte chuiquidën cuidchitoshe,” quiash badedquio mibëd chieshënamboedbëd bédamboec isnanta. Abi yacno buanacsho cuidte chuiquidën: “Icsambo iqueque.

Quënën nauedta. Ĕmbi chiacted piucquid Ĕmbi bedabi icnuc ma tsadpanu,” mibi catsiash. Quënën nauedshun ²⁶ ambi chiacted piucquid nibĕdnuc mibi cuemenquio ictsiashe. Mibĕd chieshĕnamboedbĕdi bĕdamboec onqueta. “Nuquin Papan adembidi cuidnushe,” quiash adta —quequin Esusĕn chuipondash.

Icsaquin chudaid chiaid

²⁷ Adshumbic naden Esusĕn chuipondash. —Chiaid utsitsen mimbi tantiec. “Min chidopenquio chudenda. Min bĕnĕpenquio chudmenda. Aben uequid chudenda. Aben uequidĕn dada chudmenda,” quequin Nuquin Papan chiaid nuquin tsusedpan dada uapampic. ²⁸ Aden chiaid niac-niaquec icsambo icquid icnubi nadquid icsambo icoaic. Aton chidopenquio isec: “Aidquio chudtiadquio icchitebi,” quequin otacquo tantiequi matses icsapec. ²⁹ Ĕshĕn isec mibi min chidopenquio bunec icsaic. Ĕshĕ chicshuniac bimboec icsainquio yec ĕnĕdash mibi bĕdambo ictsiaic. Icsaid ĕnenquio icquid Nuquin Papan chian anĕdĕnquiacno nĕsecaquin cuidendac. ³⁰ Min chidopenquio chudte bunquin mĕismec mibi icsaic. Mĕteshuniac bedtiapimbo yac bimboen mibi icsaid ĕnta. Ĕnenquio icquid Nuquin Papan cuidendac —quequin Esusĕn chuipondash.

Aton chidobĕd cuĕshĕdte chiaid

(Mat 19.3-9; Mad 10.11-12; Duc 16.18)

³¹ Nadentsen Esusĕn chuipondash. —Nuquin Papan Moises chuimiaid utsitsen mimbi tantiec. “Aton chido bunenquio icquin naden dada uashun menequid. ‘Mibi intiapimbo yanobi,’ quequin dada uashun aton chidobi menequin nidmequid,” quequin Moisesĕn dada uapampic. ³² Utsitsen chuinu. Aton chidon bĕnĕpenquio chudmesho istuidshun Moisesĕn chiacpadomboen nac bĕdambo ictsiashe. Aton chido dada utsi chudmesa icshobi

dadan ambembi dada uaid menequin nidmiac icsambo ictsiash. Aden nidmequin chido icsametsiash. Chido nidmiacsho bedquidtsen icsatsiash —quepondash Esus.

Abimbo chiacbimboen chienda, quequin Esusën chiaid

³³ Adshumbic Esusën padpiden chuipondash. —Naden Nuquin Papan ambi chiaid nuquin tsusedpa Moises dada uamepampic. “‘Nuquin Papa utsi uatiapimbo yacbimboen abimbo caimbi,’ quequin chiaid niactemaid nec. Niacsho Nuquin Papan cuidendac,” quequin Moisesën chuipampic. ³⁴⁻³⁶ Aidën chiacpadec muainquo ictiadquidi mimbi abimbo chiacbimboen utsi uain icsamboen chiec. “Abi cuëmëdquid cuënec muasho ëbi cuidtsiash. Nuquin Papa cuëmëdquid cuënenquo yec muasho Nuquin Papan ëbi cuidenquo ictsiash,” qeshun mimbi utsi chiec. “Abu utsi uatiapimbo yacbimboen ëmbi chiacpadomboen naimbi. Muainquo iquebi,” mibi quepec. Adecbidi: “Nidaid utsi uatiapimbo yacbimboen ëmbi chiacpadomboen naimbi,” mibi queoapec. Adembidi chiec mibi Edusaden queoapec. Adembidi con mapi quequin mimbi chieque. Aden abimbo chiacbimboen chienda. “Nuquin Papa cuëmëdquid cuënenquo iccombi,” mibi quenubi abu abi tabadaid icnuc ashunquo Nuquin Papan abitedi namendac. Nidaidic Nuquin Papan tincate nec. Edusaden yacnoshombic Nuquin Papan chomiaidën bëdamboen namendac yuecshun. ¿Min mapin icboda mibi nedi? Padenquo. ¿Mimbida min mapi masedcamedi? Padenquo. Aton Icbombien Nuquin Papan naique. Abimbo chiacbimboen icsamboen chienda. ³⁷ Adec muainquo icquin abimbo chuita. “Ai, adembi naimbi,” quequin mimbi chiacpadomboen nata muainquo icquin. Adembidi: “Padi. Natiapimbo iquebi,” qeshun mimbi chiacpadomboen nainda. Utsi uaic matses icsamequidën

Satanasën tantiamiacpadec mibi muapeque. Adenda — quepondash Esus.

Chieshë nec cuidnanenda, quiaid

(Duc 6.29-30)

³⁸ Adashic padpidec Esus onquec: —Nuquin Papan Moises chuiquin dada uamiampid mimbi tantiaboed nad iquec. “Chieshënquin ëshë ansiac adecbidi cuidnanec ëshë ansenanquid. Chieshënquin sëcsiac adecbidi cuidnanec sëcsenanquid,” quequin chiaid icnuc ³⁹ utsitsen chuinu. Tantia. Mibi cuesquid cuidenda. Chieshënaqui cuidnanenquio icquin adembi bëdamboen ista. ⁴⁰ Min matses: “Ëbi cuidquin mimbi ëbi meniambo iqueque. Min dashcute beccho,” qesho mimbi menenquio icsho isun: “Cuidte chuiquid yacno buanshun dashcute dachicmechitomane,” qesho aid dashcute meneshumbic min dashcute utsitsen chicshun meneta. Adec bëdamboec tabadta. ⁴¹ Utsibic: “Nëbi nidtuidquin con na buanec nid,” quequin ancabudac nëbi nidtuidenquio icquin udimbo buanshunta. ⁴² Aton na nibëdquid: “Mitsana beccho,” qesho meneta. Utsibic: “Mitsana buanshun bëuaindambi,” qesho: “Padi,” cainda. Meneta. Aden bëdamboen nata —quepondash Esus.

Chieshënquidobi bëdamboen iste chiaid

(Duc 6.27-28, 32-36)

⁴³ Adshumbic abi macuësh dapa poctse tsadquin bëdamboec tabadte Esusën chuipondash. Nuquin Papan Moises chuiquin dada uamiampid mimbi tantiaboed nad iquec. “Mibi tantiaquidombo tantiaquin mibi chieshënquido chieshënta,” quequin chuipampic. ⁴⁴ Utsi mibi chuinu. Tantia. Mibi chieshënquidobi bëdamboen isquin tantiaata. Chieshënaqui: “Ëbi chieshënquid bëdamboen ista, Papa,” quequin Nuquin Papa chianeta. ⁴⁵ Aden

chianec Nuquin Papabimboec mibi ictsiac. Mibi utsibo bēdamboen nashunquid ictsiac. ¿Bēdambo icquido yacnouidida Nuquin Papan ushē chēncamepadic? Padenquio. Icsaido yacnotsen ushē chēncamec. ¿Bēdambo icquido yacnouidida ue chomepadic? Padenquio. Icsaido yacnotsen ue chomec. Bēdambo icquidobēdtabi icsambo icquido Nuquin Papan bēdamboen nashunec. ⁴⁶ ¿Mibēd tantiananquido min shubun icquidouidi mimbi bēdamboen nashunsho isunda Nuquin Papan mibi: “Bēdambo iquec,” capec? Padenquio. Mimbi icsambo iquec caidontsen ambi tantiaido nashuntsiash. Aidombien piucquid bedshumēnquido icquimbi aton shubun icquidouidi nashuntsiashe. Aden nainda. Utsibotsen bēdamboen nashunta. ⁴⁷ ¿Min shubun icquidobēduidida mibi onquec tabadpe? Nuquin Papa tantiesaboen adpec. Utsibotsen bēdamboen ista. ⁴⁸ Nuquin Papabimboec icta. Bēdambo icquid icta. Bēdambo icquidobēdta icsambo icquidobi Nuquin Papan bēdamboen tantiacpadomboen utsibotsen bēdamboen tantiata —quepondash Esus.

6

Utsibo bēdamboen nashunte chiaid

¹ Adshumbic abi macuësh dapa poctse tsadquin Esusēn chuipondash. —Nadquid icsambo iquec. Nuquin Papa tantienquio icquimbi aton matses ismenuenuidi naic icsambo iquec. Adquid Nuquin Papan bēdamboen istiapimbo iqueque. “Utsibo nashunu,” quequin utsibo ismenquio icquin nata. ² “Aton na nibēdquido menenu,” qeshun utsibo ismequin menenda. Ismenquio icquin meniac bēdambo ictsiash. “Nuquin Papa tantiaquid nebi,” quec muaquidēn nacpaden nainda. Nuquin Papa tantiaquid damenuembien muaquidēn matses dadpen

yacnoshonuidi menedenepec. Adosho isun aton mat-
sesënuidi bēdamboen isnubi Nuquin Papan bēdamboen
istiapimbo iquec. ³ Aton na nibēdqido menequin utsibo
ismenda. Meneshun: “Menebanombi,” quequin utsibo
chienda. ⁴ Adsho isun mimbi utsibo ismenquio icquin
naid tantiaquid icquin Nuquin Papan bēdamboen isquin
abēdi mibi tabadmendac —quequin Esusën chuipondash.

Nuquin Papa chianete Esusën chiaid

(Duc 11.2-4)

⁵ Adshumbic Nuquin Papa chianetetsen Esusën
chuipondash naden. —Bēdambo icquid damianquidēn
nacpaden nainda. Aidon Nuquin Papan chiaid chuibante
shubun puduedshun utsibo tantiamenuenuidi nidoshon
comapenec onquequin Nuquin Papa chianepec. Adash
umanuc puduenshun matses dadpen ismenuenuidi
padpiden adembidi chianec. Adquid aton matsesën:
“Bēdambo iquec,” canubi Nuquin Papan padenquio iquec.
Bēdamboen istiapimbo iquendac. ⁶ Mibi adenda. Utsibo
ismenuenuidi nainquio icquin matsesën isacmaidquio
Nuquin Papambo tantiaquioquin chianeta. Aden
chianequid mibi icsho Nuquin Papan mimbi utsibo
ismenquio icquin naidtedi tantiaquid icquin mibi
bēdamboen isquin abēdi tabadmendac.

⁷ Nuquin Papa chuiquin bēdamboen chianeta. Nuquin
Papa tantiesabon ambi tantiaid chuibudacbimboen
Nuquin Papa chuibudenda. “Yuenquio chuibudac
nuqui tantiaboedēn nuqui nashuntsiash. Padenquio
icac nuqui nashunenuo ictsiash,” queshun Nuquin
Papa tantiesabon yuen chuibudacbimboen nainda.
⁸ Adoenquio icquin Nuquin Papa chianeta. Mimbi chiabi:
“Adopashuni. Aid nibēdnuc unēsebi. Utsi icnuc bēdambo
ictsiabi,” quequin mimbi otacquio tantiaid Nuquin Papan
tantieque. ⁹ Naden Nuquin Papa chuita.

“Bëdamboshë icquid icsho matses abitedishunquio mibi tantiapashun, Papa.

¹⁰ Matses abitedishunquio mibi con Icbo capashun. Mibi yacnoshon mimbi uaido mayan bëdabon mimbi chiacpadomboenuidi naic.

Adomboembidi mimbi chiacpadomboen matses abitedishunquio napashun.

¹¹ Bumianenda, Papa. Badiadquidën badiadquidënquien con pete icmeta.

¹² Utsibon chieshënaqui ëbi cuidnanenquio icsho isun ëbi icsashobi cuidenquio icquin ëbi bëdamboen ista, Papa.

¹³ Mimbi chiaid ëbi niacmenda, Papa.

‘Icsamenushe,’ qeshun Satanas ëbi yuamenda, Papa.

Abitedishun Icbombo yec abitedimbo namequidquio mibi nec, Papa.

Ëmbi mibi chuisho tantiata, Papa.

Ënenquio icquin abitedishunquio: ‘Bëdambo iquec,’ mibi capashun. Padi,”

quequin Nuquin Papa chianeta —quequin Esusën chuipondash.

¹⁴ Adashic nadpondash: —Utsibo bëdamboen ista. Cuidnanec chieshënanenda. Cuidnanec chieshënanenquio icsho isun Nuquin Papan mibi cuidenquio icquin bëdamboen istsiash. ¹⁵ Cuidnanec chieshënansho isun Nuquin Papan mibi bëdamboen istiapimbo ictsiash —uequin Esusën chuipondash.

Buna mëmunte chiaid

¹⁶ Adshumbic utsibo ismenquio icte utsi Esusën naden chuipondash. —Tantia. Nuquin Papauidi tantianuequin buna mëmunquid chuinu. Muaquidën nacimboen ismenda. Muaquido: “Buna mëmunquid nec,” aton matses camenuc abibi maniumëdash nënquidbitsëcquiec mamënenquio iquec. Adec buna

mëmunquid tanec muaic. Adsho isun matsesën bëdambo icquid danubi Nuquin Papan: “Icsambo icquid nec,” qeshun bëdamboen istiapimbo iquec. ¹⁷ “Nuquin Papauidi tantiaquin nëidtedec ushquin buna mëmunu,” qeshun Nuquin Papambo tantiaquin nata. “Utsibon tantianushe,” qeshun bëdamboen min manëdaid shueshcata. Adash bëdamboec mamënta. Aden utsibo ismenuenuidi nainda. ¹⁸ Aden bëdamboen manëdaid shueshcaid isun: “Buna mëmunec nec,” cainquio ictsiash utsibon mibi chuiquin. Nuquin Papambien: “Ëbiuidtsëqui tantianuen naic,” quequin tantiatsiash. Adshun mimbi utsibo ismenquio icquin naidtedi tantiaquid icquin abëdi mibi tabadmendac —quequin chuipondash Esusën.

*Nuquin Papa yacno tabadte bunta, quiaid
(Duc 12.34)*

¹⁹ Adshumbic padpiden Esusën chuipondash. —Ëmbi chuiboedquio tantiashun mimbi dayun uatequiduidi tantienda. Dayun uatequid nadquio iquec. Chodquetequid yec shocosh chiuidtequid yec matsesën ampeshuntequid yec quec icsabudtequid nec. Adquiduidi tantienda. ²⁰ Icsabudesambo tantiata. Nuquin Papambo tantiec aibdëd tabadte bunquin ambi chiacpadomboen nata. Chodquetiapimbo icquid yec shënbudtiapimbo icquid yec ampeshuntiapimbo icquid yec quec Nuquin Papa yacno iqueque. Aidquio tantiata. ²¹ Mibi bunaidquio ënenquio icquin tantiec mibi tabadtsiac. Nuquin Papabëd tabadte bunquin aid tantiata —quepondash Esus.

*Pabiate shëcuë cuembo icquid chiaid
(Duc 11.34-36)*

²² Adshumbic abi macuësh dapa poctse tsadquin utsitsen Esusën chuipondash. —Pabiate shëcuë cuembo icquin Nuquin Papa tantiaquiec mitsanauidi tantienquio yec

mibi bēdamboec tabadtsiac. ²³ Pabiate cuēnēdacimboec yec Nuquin Papa tantienquo yec mitsanauidi tantiec ¿bēdamboecta tabadtsia? Padenquo. Adec mibi icsamboec tabadtsiaque. Adenda —quequin chuipondash Esusēn.

Bedteuidi tantienda, quiaid

(Duc 16.13)

²⁴ Adshumbic naden Esusēn chuipondash. — Mitsanauidi tantiec mibi icsamboec tabadtsiac. ¿“Naic cho,” quequin daēdshun chiacta aid daēdi mimbi nashumpatsia? Padenquo mimbi ictsiac. Abentsēc nashunquin utsin chiaid mimbi natiapimbo ictsiac. Aden mitsana bedtequiduidi tantiaquin aid bednuenuidi mimbi natsiac. Aden naquin Nuquin Papan chiacpadomben mimbi natiapimbo ictsiaque. Mitsana bedteuidi tantienda. Nuquin Papauidtsēqui tantiata —quequin Esusēn chuipondash.

Nuquin Papan abi tantiaquido dayun uaid

(Duc 12.22-31)

²⁵ Adshumbic Esusēn padpiden chuipondash. —Ēmbi aden chuisho tantiash dacuēdenda. “¿Atotsimbi pepe? ¿Atotsimbi acpe? ¿Atotsibi dasiuidpe?” quec dacuēdenda. Nuquin Papan nac unēsabi mibi tabadeque. Aidēmbien petebēdta dasiuidte icmeque. “Con na nibēdt-siash,” quiaish dacuēdec tabadenda. ²⁶ ¿Uicchunēnda ambibi cuēte ēshē siac bacuēacsho chepadic? Padenquo. Adecbidi ambi pete dayun uatequid shubumpi nibēdec. Adquid icsho Nuquin Papan aton pete bedmec. Uicchun abipadquidpenquo icshobi aton pete Nuquin Papan bedmec. ¿Ad icnuc ambi abipadquid uaidobi matses icsho aton pete bedmenquioda icpadic? Nuquin Papan mibi nashunquin min pete icmeque. Dacuēdenda. ²⁷ ¿“Unēstiapimbo iquebi. Dacuēdebi,” quequidta

unësenquo icpadic? Adequi dacuëdquid unëstsi Ashe.
Unësteuïdi dacuëdënenda.

²⁸ “¿Atotsibi dasiuidpeba?” ¿quecta mibi dacuëdec tabadpe? Tantia. Chuinu. “Cuëte bacuëec bédamboshë isadtsec,” quepec nuquin matses. ¿Aton sedquidi shoyontsëcshun abi dasiuidte daëdcash dasiuidtsashta bédamboshë isadpadic? Padenquo. Nuquin Papan uacpadquiobi iquec. ²⁹ ¿Cuëte bacuëec bédamboshë isadquidbimboecta nuquin tsusedpa chuiquid dapa Sadomon cuëmëdquidën dashcute icpampic? Padenquo. Adpenquien icpampic. ³⁰ Cuëte bacuëec bédamboshë isadboed abadiadtsëcshumbi isac ënden chodquiac. Aid badedquo chodquequid nec. Ad icnuc ¿abipadquid Nuquin Papan uaido mibi icsho mibi dasiuidte bedmenquioda icpadic? Padenquo. Mibi dasiuidte icmeque. Dacuëdenda. Mitsana nibëdquo icte dacuëdënquimbi mimbi Nuquin Papa bëdiactsëc tantiatseque. ³¹ Dacuëdec tabadenda. “¿Atotsimbi pepe? ¿Atotsimbi acpe? ¿Atotsibi dasiuidpe?” quec dacuëdenda. ³² Nuquin Papa tantiesaboen adquid bedteuïdi bunquieque. Adenda. Mitsana nibëdsho isun Nuquin Papan mitsana icmetsiashe. Abi tantiaquido yec dacuëdec tabadenda. ³³ Adenquo yec: “Con Icbo mibi nec, Papa,” quequin ambi tantiacpadec bédamboec tabadte bunta. Adec tabadec: “Aid nibëdnuc unësebi,” quequin mimbi tantiaidtedi Nuquin Papan mitsana icmetsiashe. ³⁴ Èbi adsho tantiashe badiad utsi caic: “Aid badiadën ¿atotsimbi nape?” quec dacuëdenda. Aid badiadën Nuquin Papan ambi tantiacpadomben mibi nametsiashe. Nëid ushëmbi: “Naden naimbi,” quequin tantiec tabadnuna dacuëdenquo yec —quequin chuipondash Esusën.

7

Utsibo icsaid chienda, quiaid
(Duc 6.37-38, 41-42)

¹ Naden Esusën Nuquin Papan chiacpadec tabadte chuipondash. —Mibi icsaid ucudambobi utsibo icsaiduidi chienda. Adembidi Nuquin Papan: “Icsambo iquec,” mibi canushe. ² “Icsambo aid iquec,” mimbi cac adembidi aidontsen mibi adoatsiashe. Adembidi Nuquin Papantsen: “Mibi icsambo iquec,” canushe. Utsibo icsaiduidi chienda. ³⁻⁴ ¿Abi bëtsiadaid bëchish nua bëuequid bëbedadabi icquidënda: “Mibi bëtsiadaque. Bëbednu,” capatsiashe utsi chuiquin? Padenquio. ⁵ Abi bëtsiadaid abia bëbedadashien: “Mibitsen bëbednu,” quetsiashe. Adembidi mimbia mibi icsaid ënshun: “Icsaid ënash bëdamboequien tabadtiad,” quequin utsibo bëdamboen chuita. Bëdambo icquid damianquidën abi icsaid ënabi: “Aid icsambo iquec,” quequin utsibo icsaid chuibanec. Adquid tanenda. ⁶ Mimbi bëdamboen chiqui tantienquio icsho chuidonenda. Nuquin Papan chiquid chuibudaqui tantiatiapimbo icquin niac-niacsho isun adenuidi chuidonenda. Opa icsan abi pemequid piacbimboen mibi chieshëntsiashe. Chanchon icbon dashcute nebudshun bëchish uaqin tin-tincacchimboen Nuquin Papan chiaid niac-niactsiashe. Adquid chuidonenda — quepondash Esus.

Ënenquio icquin Nuquin Papa chianete chiaid
(Duc 11.9-13)

⁷⁻⁸ Nadembidi Esusën chuipondash. —Nuquin Papa ënenquio icquin chuidoneta. Bacuëbon: “En na,” cado-niacchimboen chuidoniac Nuquin Papan mibi tantiatsiashe. Adembidi: “Ëbi bëdamboen name, Papa,” mimbi cacpadomboen bëdamboen mibi nametsiashe. Adembidi:

“Ëbi nashunquin ëbi bédambo icmeta, Papa,” quequin chuidoniac Nuquin Papan mibi bédambo icmendac.

⁹ ¿Icsambo icquidta Nuquin Papa icpadic? Padenquo. Bédambo icquidquo nec. Bacuëmpi: “Bundobique. Penu. Beccho, papa,” ¿queshoda amèn cudasénquin cuënotebi menepadic? Padenquo. ¹⁰ ¿Adembidi aton bacuën: “Nuëcquid chenu. Beccho, papa,” cacta cudasquin nisimbo menepadic? Padenquo. ¹¹ Matses yec icsaquido icquimbi min bacuëbo abimbo mimbi menubien Nuquin Papan ambi uaido matses: “Ëbi nashunta, Papa,” qesho tantiashun bédamboen nashuntsiashe. Nuquin Papa chianeta.

(Duc 6.31)

¹² Nuquin Papan tantiaido icquin utsibo bédamboen isquin bédamboen nashunta. Utsibo caic: “Aidon nashumpashuni,” quequin mimbi otacquo tantiacpadomboembidi utsibotsen nashunta. Aden Nuquin Papan chiaid Moisesbëdtan nuquin tsusedpabo utsibon dada uaqun chiampicpadomboen mimbi natsiaque. Aden utsibo nashunta —quequin chuipondash Esusën.

Daëdpactsëcshun Esus tantiabente chiaid

(Duc 13.24)

¹³⁻¹⁴ Adshumbic Esusën naden chuipondash. —Nuquin Papabëd tabadnuec aid tantiec bédamboec tabadta. Shëcuë aniambo icquidën matses abentse-abentsec puduedac bimboec abentse-abentsec Nuquin Papa yacno puduednuec aid tantiec bédamboec tabadec. Padnuen antied dapan abi maisi nidac bimboec matses dadpenquo abi tantiesabo yec Nuquin Papan icsaido nësecacno nidendac —quepondash Esus.

Icsambo icquid nec, quequin tantiante chiaid
(Duc 6.43-44)

¹⁵ Abi macuësh dapa poctse tsadquin naden Esusën chuipondash. —Utsibo: “Nuquin Papan chiaidquio chuiquid nebi,” quec bēdambo icquid damianquid iquendac. Adquid choshon Nuquin Papan chiaid niac-niacmequin icsamendac. Bēdi dapa nēish yua pete bunquiacbimboec mibi icsamete bunquieque. Adquidēn chuisho tantienda. ¹⁶ “¿Mitsipadembimbi muaquid tantiapatsia?” ¿quecta ique? Ambi naid isun mua quequin mimbi tantiatsiac. Adembidi Nuquin Papan chiaidquio chienquio icsho tantishun: “Utsi uain chiec,” mimbi catsiac. Chetequid isun cuēte dada matsesën tantiec. Aden tantiec nisanquidēn bacuē bēsho isash: “Dadainēn bacuē nec,” quesa matses nec. Adecbidi echo bacuē bēsho isash: “Bata nec,” quesa matses neoaic. ¹⁷ Cuēte bēdan bacuē adquibidi bacuēec. Cuēte icsan bacuē adquibidi bacuēoaic. ¹⁸ ¿Cuēte bēdan bacuē chetemaidda nepec? Padenquio. ¿Cuēte icsan bacuē chetequidda icpec? Padenquio. ¹⁹⁻²⁰ Chetemaiddimboec muaquid bēdambo ictiapimbo iquec. Nuquin Papan chiaid niac-niaquec icsamboec tabadsho isun: “Muaquid nec,” quequin mimbi tantiatsiac. Adembidi Nuquin Papan chiaidquio chienquio icsho: “Muaquid nec,” quequimbidi mimbi tantiatsiaque. Adquidēn chuisho tantienda. Cuēte bacuēesa dēdshun nēdēncacimboen: “Nuquin Papan chiaid chiembi,” quec muaquid Nuquin Papan icsaido cuidacno nēsecaindac — quepondash Esus.

Nuquin Papa yacno puduednu, queuidte chiaid
(Duc 13.25-27)

²¹ Utsitsen Esusën chuipondash. —Ēbi caic: “Con Icbo mibi nec. Mibi tantiembique. Mibi yacno ēbi

puduedme,” ¿quequidtedida Nuquin Papa yacno puduedpatsiash? Padenquoio. Nuquin Papan chiacpadomboen naquidquien abi yacno puduedtsiash. ²² Nuquin Papa yacno ěmbi yuedte ushěn matses dadpenshun ěbi chuiuidendac. “Con Icho mibi nec. Mibi caic: ‘Aiděn namiaidquoio nebi,’ quequin dadpen naombi. Nuquin Papan chiaid chuiquinc, podobitsi icsabo matses dapuduedaido cuemequinc comapenen tantiaquin ismequinc caombique. Nuquin Papa yacno ěbi puduedme,” ²³ qesho ěbimbo tantiec Nuquin Papan chiacpadec bědamboec tabadabi icsho: “Ěmbi tantiacmaidquoio mibi neque. Baded cuenta. Icsamboec tabadquid mibi neque,” caindambi. Ěbi adsho tantiash muainquoio yec bědamboec tabadta —quepondash Esus.

Shubu uaquidbimboecquid chiaid
(Duc 6.47-49)

²⁴ Adshumbic Esusěn padpiden chuipondash naden chuiquin. —Ěmbi chiacpadomboen nata. Aden mimbi bědamboen natsiaque. Shubu uaquin bědamboen tantiaquidbimboec mibi ictsiaque. Tantia. Chuinu. Bědamboen tantiaquiděn mananěnquoio shubu uaquin buintad nitsinquid. ²⁵ Aden shubu uan ue dapa conquequidbědi chonoc shubu chimeshadenquoio icquid. Shubu nuntan anchiuidenquoio icquid. ²⁶ Aden ěmbi chiacpadomboen naquid icnubi utsibo ěbi tantiesa iquendac. Aido shubu uaquin tantienquoio icquidbimboec iquec. Tantienquoio icquiděn nadoquid. Acte cuidi cuěmanquiobi shubu uaquin badedi uněstsěcquidquoio cueste nitsinquid. ²⁷ Adquid nitsinaid ue dapaběd conquequid choquin shubu chimeshquid. Adecbidi acte cubudtoquiděn shubu nuntan mauanquid. Aden tantesa uatsěcquidbimboec ěbi

tantiesa iquec. Adquid Nuquin Papan cuidtequido neque. Ēbi tantiata —quequin chuipondash Esusën.

(*Mad 1.22*)

²⁸⁻²⁹ Adsho tantiash: —Ma comapenen tantiaquidquio Esus neyoc. Nuquin matses tsusiobon Moisesën chiampid bëdiactsëc tantiatsëcquin chuitsëccosh. Padnuen Esusënquio comapenen tantiaquin chuiposh —quecuededpondash matses dadpenquio.

8

Esusën daicsaid bëdamiaid

(*Mad 1.40-45; Duc 5.12-16*)

¹ Ambobi macuësh poctse tsadquin ënquin chuitanequien Esus macuësh budpondash. Adec budanec nidsho isumbien matses dadpenshun tsibanampondash.

² Adnubien dada ushumbo yec daicsaidquio choshon Esus ismenuen danëshën sebudpondash. —Ēbi bëdamete bunquin mimbi ěbi bëdametsiaque. Ēbi bëdame, Icbo —caquien Esus: ³ —Ai, mibi bëdamete bunebi. Mibi bëdanendac —quequin mishtemaidquiobi mishnubi badedquio bëdampondash daicsaid nibëdquiec. ⁴ Adsho Esusën: —Utsibo chienquio yec nëish yua abided unës uaquido ismenuec nidta. Mibi isash: “Bëdamiaid nec,” quequin ma aidon tantianu. Moisesën chuiampicpadomboen nanuen: “Nuquin Papan bëdamioshi,” quequin Nuquin Papa menetequid buanquin ismec nidta —quequin Esusën chuipondash. Adtanec shubu dadpen icquid Capednaun caid yacno chopondash Esus.

Sondado chuiquid dapan yua Esusën bëdamiaid

(*Duc 7.1-10*)

⁵ Capednaun yacno choash Esus tabadpondash. Adnubien Doma yacnoquido sondado 100ted chuiquid dapan Esus chuituidpondash. ⁶ —Tantia. Chuinu, Icbo. Con

shubun icquid con yua shëquëquenquo iccosh. Natiambo yec unëstiadtsëcquio iccoshe. Bëdameta ⁷—quesho tantishun: —Ai, bëdamec nidnu. Nid —caquien: ⁸—Padi. Mibi bëdamboshë icquidquio nec. Ĕbibi icsactsëcquid icquin mibi con shubun puduedmetiapimbo iquebique. Nëshunquiobi bëdameta. Nidenquio icquin nëshunquiobi mimbi: “Bëdanta,” cac con yua bëdantsiashe. Mimbi tantiacpadomboen namequidquio mibi nec. ⁹ Ĕbibic chuiquid dapan namiac sondado utsibo namequid nebi. Ĕmbi: “Nid,” cac badedi nidec. Ĕmbi: “Baded cho,” cac badedquio choec. Con yuan Ĕmbi: “Nata,” cac Ĕmbi chiacpadomboen naic. Mibi adquidquiobidi neque. Con yua bëdameta —quepondash sondado chuiquid dapa.

¹⁰ Adsho tantishun Esusën abi tsibambëquido chuipondash. —Bëdamboen nëidën chuipec. “Comapenen tantiaquin chuiquinuidi con yua bëdametsiashe,” quequin Ĕbi bëdamboen tantiaquid nec. Isadaidbo adquid nibëdec. Isadaidbon Ĕbi bëdiactsëc tantiabedtsec. ¹¹ Tantia. Chuinu. Matses utsi icquimbi sondado chuiquid dapan Ĕbi bëdamboen tantiec. Adec nidaid utsi-utsiec yacnocquido isadaidpembo Ĕbi tantiaquido yanash Nuquin Papa yacno puduedendac. Ambo puduedash isadaidbo tsusedpabobëd tabadendac. Abadauan caid yec Acobo caid yec Isac caid yec quequidobëd tabadendac. ¹² Padnuen Nuquin Papan con matses caido isadaidbo dadpenquio Nuquin Papa yacno puduedenquio iquendac. Abi tantiesabo icsho Nuquin Papan cacumequin icsaido nësecacno mibi nidmendac. Adoac mibi tënquebudquiendac —quequin abi tsibambëquido isadaidbo chuipondash Esusën. ¹³ Adshumbic sondado chuiquid dapa chuiquin: —Nidec nid. Mimbi tantiacpadec min yua bëdaneque —cac nidshun isquien bëdanac Esusën chuibocpadequi.

Petedon nachi Esusën bēdamiāid
(Mad 1.29-31; Duc 4.38-39)

¹⁴ Adash yuec-yuecpactsēc ictanec Esus Petedon shubun puduedpondash. Puduedshun isquien Petedon nachi chumbo yec ueten uepec. ¹⁵ Uesho istuidshun mēdinquin Esusën bēdamepondash. Aden bēdamiac Esus pemepondash.

Esusën matses dadpen bēdamiāid
(Mad 1.32-34; Duc 4.40-41)

¹⁶ Petedon nachi bēdamiāid inchēshbudtsēqui Esus ismenuequin matses daicsaido dadpen bē-bēpondash. Bē-bēshobien podobitsi icsa dapuduedaido comapenec cuēdquin cuemeshumbic daicsaidotsen Esusën bēdamebampondash. ¹⁷ “Nuqui icsaid ucquin nuqui daicsaidobi bēdamiac,” quequin ěndenquio Nuquin Papan Esusën nate Isayas dada uamepampicpadomboen nanuen adopondash Esusën.

Abēd icte bunquido Esusën chiaid
(Duc 9.57-62)

¹⁸ Adashic abi isnuec matses dadpenquio datsidadsho isash abēd icquido chiec: —Chian potec nidnu. Nid —quianec chian yacno nidec puduampondash Esus. ¹⁹ Pudianec nidaneshobien Moisesën dada uampid chuibanquidēn Esus chinuntuidpondash. —Con Icbo mibi caindami. Mibēd nidendabi —caquien: ²⁰ —ĴĒbēdta nide? Tantia. Mibi chuinu. Bēdi chēshē shēcuēn ushquid. Uicchun shubu uash abuc ushquid. Padnueni con shubu nibēdnuc Nuquin Papan matsesmiaid yec quenenenquio yec capucuenendac. ĴAda mibi adpatsia? —capondash Esusën Moisesën chiampid chuibanquid chuiquin.

²¹ Adnubien abēd capucuneboed utsin: —Chiata, Icbo. Con pa unēsoshe. Chococatambono —caquien: ²² —Padi.

Cho. Ma unësaidën tantienquo yac bimboen ëbi tantienquo icquidon ma papa chococanu. Ëbëdtan bëdamboen naic cho —capondash Esusën amë unësaid chuiquin. Adobidanec nidanepondash chian yacno.

Natiambo cunquenuc acte tēcguasquiaid Esusën ënëdmiaid (Mad 4.35-41; Duc 8.22-25)

²³ Chian budash Esus chedo cano antabëdtopondash. Adashic potenuec puduampondash. ²⁴ Aden potenubi nënantanquo icnuc cunquetuidpondash. Adnubien acte comapenec tēcguasquiampondash. Adec acte tēcguasquenuc cano acte ancushad-ancushadquieci yampondash cano mentoadtiadtsēcquo yec. Adsho isun abëd icquidon: —Dacuëdampambo iquec —quetanquin isquien Esus ushpec.

²⁵ Adshobien tinquin: —Nuqui mentoadeque. Isucun, Icbo. Baded ëbi nashun —caquien: ²⁶ —¿Atotsi quia sh dacuëde? Ëbi bëdiactsēc tantiatsec dacuëdquidquo mibi neque. Istac —quetanec nidtoshon actebëdtabi cunquequid chuipondash. —Padi. Ënëdta —caquien natiambo cunqueboedi badedquo ënëdpondash cano mentoadtsenquionobi. Actetsen tēcguasquenquo yampondash. ²⁷ Adsho isashien: —¿Mitsipadquidënquo actebëdta cunquequid ënëdmepashba? —quecuededpondash Esusbëd icquido.

Dada daëd dapuduedaido podobitsi icsabo Esusën cuemiaid (Mad 5.1-20; Duc 8.26-39)

²⁸ Aden chian potia sh pudundonobien Cadada yacnocquid podobitsi icsa dadpen dapuduedaid dada daëd choshon Esus chuituidpondash. Aid daëd unësaido chococaid shëcuëmbi tabadpondash. Matses cuesunete bunquieci dacuëdampambo icsho isash aid yacno matses

nidenquo icpondash. ²⁹ Aidon podobitsi icsabon on-camiacpadomboen comapenec cuëdquin Esus chuituid-pondash. —¿Nuquin Papa caidën Madombo icquin ëbi natiamequin cuidnuecta cho? ¿Nuquin Papan cuidte ushë choabi icnubida ëbi cuide? —capondash dada daëdshun abi oncamequidën chiaid chuiquin.

³⁰ Uano chanco dadpeshun natiacquin udquin pebededpondash. ³¹ Adnubien podobitsi icsabon aid dada daëd oncameoac: —Ëbitedi cuemiac chanco icbo-icboec dapuduedtsiabi —quecuededpondash podobitsi icsabo.

³² Adsho tantiashun Esusën: —Ai, mimbi tantiacpadec nid —cac nidash chanco icbo-icboec dapuduednubi chanco abitedi macuësh budec acte nësebudec mentoadbudnepondash nibëdquiec yec. Adec podobitsi icsabo dapuduenanec nidnubi dada daëd bëdambo yampondash.

³³ Adsho istanequien chanco pemequido aton matses chiec niqianec shubu dadpen yacno nidanepondash. Chanco mentoadbudneboedbëdta podobitsi icsabo dapudumeboed uesquin chuituidpac caondash. —Nuqui dacuëdëmboedobi bëdambo yanosh —quequin ³⁴ chuituidaquien anocquido abitedi Esus isec cho-chopondash. Adec cho-choshombien: —Dacuëdampambo mibi iqueque. Ëbi yacno choenda. Nidec nid —cabededpondash. Adoac Esus nidpondash.

9

Shëquëquenquo icquid Esusën bëdamiaid

(Mad 2.1-12; Duc 5.17-26)

¹ —Nid —cac nidanec chian budash cano antabëdtoshon chian potiasch abi iccondacnobidi Esus choapondash.

² Adnubien utsibon dada shëquëquenquo icquid Esus ismenuen aton uetechobi bëpondash. Bësho isumbien Esusën: —Ëbi caic: “Aidën bëdametsiash,” queshun bëac

—quequin daicsaid chuipondash naden. —Dacuëndenda, madosio. Ambi chiaid niac-niaquec icsaboedi cuidmenquo icquin Nuquin Papa mibi bēdamboen ismembique —capondash Esusēn.

³ Adsho tantiash aid datsidadash tabadquido Moisesēn dada uampid chuibanquido: —¿Adpecta matses icquid? “Nuquin Papapadquidquibini nec,” quepequien iquec. Icsamboen chiec —quecuededpac caondash Esus caic.

⁴ Uanuēsh adsho ambembi tantiashumbien Esusēn aido chuipondash. —¿Atotsi quequin mimbi ēbi chieshēmpe?

⁵ Ambi namiaid icquin ěmbi: “Nuquin Papa cuidmenquo icquin mibi bēdamboen ismembique” cac Nuquin Papan nēid cuidenquo iquendac. Adembidi ambi namiaid icquin ěmbi: “Caputa,” cac nēid capuendac. ⁶ Istac. Mibi ismembique. “ ‘Nuquin Papan chomiaid nec. Icsaidobi Nuquin Papa bēdamboen ismequid nec,’ mabi canu,” qeshun naimbique. Istac —quetanquin dada shēquēquenquo icquid chuiquin: —Caputa —capondash Esusēn. ⁷ Adoac bēdanash aton shubuno nidpondash. ⁸ Adsho isashien: —Adquidshenda nepec. Nuquin Papan namiaid icquimbien adochitec. Abi namequid Nuquin Papa bēdambo iquec —quecuededpondash isquido.

Ĕbēd iquec cho, quequin Esusēn Mateyo chiaid

(Mad 2.13-17; Duc 5.27-32)

⁹ Adnubini con matses aton piucquid bedshunuec podqued cuēman tsadquid shubumpin tsadpondac. Con matses yuaquid ancaquid dapan: —Min matsesēn na ěmbi chiactedi piucquid bedshun ěbi meneta —cac niondabi. Ambo tsadshobini Esusēn istuidpondash. Istuidshumbini Esusēn: —Nuquibi icnu. Cho —capondash. Adoac badedi tsibananec ¹⁰ nidequi con shubun Esusbēd puduedpondabi.

Adec puduedsho isashien matses dadpen pudued-puduedpondash. Esusbéd pec tabadnuec ëbédtan piucquid bedshunquidobédi con matsesën: “Icsaido nec,” caidombo pudued-puduedpondash. ¹¹ Adsho isumbien Esus chieshénquido Padiseyobo caidon Esusbéd icquido chuituidpondash. —¿Atotsi quiash mibi chuiquid Esus caid icsaquidobédi pec tabadpec? Icsambo iquec —capondash Esus chieshénquidon.

¹² Adsho tantiash Esus nadpondash. —¿Bédambo icquidta dauëchoquidën dauë menepadic? Padenquio. Ma daicsaidi dauëchoquidën menepaid yoc. Adembidi icsaidobi abi icsaid ucquin bédambo icmenuec nebi. ¹³ Nuquin Papan naden dada uamiampid pausudshun bédamboen naic nid. “Ëmbi chiacpadomboen abentse-abentsen mimbi naic. Adoquimbi ëmbi chiaid utsi niaquec mimbi icsaido caido mimbi bédamboen isti-apimbo iquec. Adsho isun: ‘Mibi bédambo iquec,’ catiapimbo iquebi” quequin Nuquin Papan dada uamiampid pausudta. Èbibi matses bédamboen ismequid nebi. Muaquido: “Bédambo icquid nebi,” qesho bédambo icmetiapimbo iquebi. Icsaquidobi: “Nuquin Papan chiaid niac-niaquec icsapobi,” qesho: “Icsainquio yec ënédta,” canuec nebi —quepondash Esus abi chieshénquido chiec.

Esusën buna mëmunquido chiaid

(Mad 2.18-22; Duc 5.33-39)

¹⁴ Adnubien Uan acten mentoanquidbéd icquidon choshon Esus chuituidpondash. —Nuquin tsusedpabon nacpadomboen Nuquin Papauidi tantianuen buna mëmunquidquio nebi. Padiseyobo adembidi naquidquio nec. ¿Atotsieshun mibéd icquidon aden nainquio icpec? ¿Natiapimboda iquec? —caquien ¹⁵ Esus nadpondash. —¿Icbon: “Pec cho,” cacta aid tantiec sedenquecuededquin

buna mëmumpadic? Padenquio. Adquidbëdtan pec cuishonquec tabadquid. Icbo nibëdanan sedenquecuededquin buna mëmunquid. Èbi nibëdanan ëbëd icquidon ëbiuidi tantianuen buna mëmunendac —quepondash Esus.

¹⁶ Adshumbic Esusën naden chuipondash. —Dashcute chuca cuëshun dashcute shëni nedesquiaidbëdta tuscasa. Aden tuscashun panac shëni badedquio nedesquequid. ¹⁷ —¿“Machi sandono,” qeshun tsitsan shënimbida sandopadic? Padenquio. “Machi sebudnushe,” qeshun tsitsan shënin sandoenquio icquid. Tsitsan chuca daëdcashumbien machi sandoquid —quepondash Esus. — Adembidi tsusedpabon: “Naden nata,” quequin chiaid chienquio icquin ambi bëdamboen iste chuiquin Nuquin Papan chiaid utsi chiec nebi —quequin tantiec adpondash Esus Uan acten mentoanquidbëd icquido chiec.

Champi uincuemiaidbëdta chido bëdamiaid

(Mad 5.21-43; Duc 8.40-56)

¹⁸ Aden chuishobien Nuquin Papan chiaid chuibante shubun tabadsho isquid dapan chuituidpondash. — Con champi unëstiadtsëcquio iccoshe. Mishec cho. Mimbi mishac bëdantsiashe —capondash. —Mibi con Icbo canu —quequin danëshën sebudquin ismepondash.

¹⁹ Adoquien Esus aidbëdi nidpondash.

²⁰⁻²¹ Nidnubien chido intac budted-budtedec seta 12tedi matamec bëdanenquio yec nacchoadbudquidën Esusën cachochtsëqui choquin: —Bëdamianquidën dashcute mishec bëdampatsiash icmanendac —qeshun ismenquio icquin dashcute cuëmano mishtsac caondash.

²² Adoquien bidiadquin isun Esusën chuipondash. — Dacuëdenda. Mibi: “Aidën nac bëdantsiabi,” quiacpavec mibi bëdanendac —Esus quenubi bëdampondash.

²³ Aid bédamebidanec nidequi chuibante shubun tabadsho isquidën shubun puduedshun isquien matses dadpen tabadec. Champi unësacsho isash sedenquecuededec tabadec. Nëidic matses unësan con matsesën nacpadomboen shoncate shoncaquido. Nëidic comapenec sedenquecuededquido dadpen. Aidedi icpondash. ²⁴ Adshobien Esusën abitedi chuiquin: —Baded umanuc niecun. Champi unësabi iqueque —capondash. Adoac: —“Champi unësabi iquec,” quepequien iquec —qeshun Esus mamënshumbedepondash. ²⁵ Niecunan Esusën champi uiacno quënën puduedtanquin mëdinac champi uincuenash bédambo yec capupondash. ²⁶ Adsho isun champi unësaid uincuemaiid chuibenepac caondash shubu utsin-utsinquien. Anocquido Capednaun caid yacno pauequidotedishun tantianuc chuibeniac caondash.

Bëshuaid daëd Esusën bédamiaiid
(Duc 18.35-43)

²⁷ Auëshquio puduanec nidshobien bëshuaid daëdshun chinunshun comapenec cuëdquin Esus chuituidpondash. —Dabidën tsyuecquid Nuquin Papan chomiaid icquin bédamboen isquin ëbi bédame —quebud-quebudpondash. ²⁸ Shubu utsin puduedash abëdi tabadshobien Esusën: —“Ëbi bédametsiash,” ¿caindabi ique? —caquien: —Ai, adebi —quepondash.

²⁹ Adshobien aid daëdi bëmishquin: —Mimbi tanticpadec bédanta —cac ³⁰ bédampondash. Adsho isun Esusën: —“Bédamioshi,” quequin utsibo chienda —capondash. ³¹ Adoboqui anocquidotedi chuibenchuibempac caondash.

Esusën onquesa bédamiaiid

³² Bëshuaid bëdamiaid puduenubien podobitsi icsa dapuedaid onquesa dada Esus ismenuen bëpondash.

³³ Bëacsho isun Esusën podobitsi icsa dapuedemiac bëdanash onquiampondash. Aden bëdamesho isash: — Nuquin nidaid Isadaid caidënsnun adoen ictenec — quecuededpondash isquido.

³⁴ Adnubien Esus chieshënquido Padiseyobo: — Podobitsi icsan icbon namiaid icquin podobitsi icsa cuemequidien nechitec — quecuededpondash Esus caic.

Esusën matses tantiaquiaid

³⁵ Aden onquesa bëdamianec nidash capucuen-capucuenquin shubu dadpen icquid yacno Nuquin Papan chiaid chuibante shubun puduedshun Nuquin Papan matses icsaido bëdamboen iste chuipondash. Adshumbic anocquido daicsaidotedi bëdamebampondash. Adenuidi shubu dadpen yacno-yacnomboen chuibanquimbi matses bëdamebampondash. ³⁶ Abi tantienquio icquido dadpen cho-chosho isash unësquio icnuc shubiantiadquio icpondash Esus. —Abi isquid nibëdnuc bacuëbo icsamboec tabadacimboec icsambo iquec. Nuquin Papa bëdamboen ismete chiabi yac tantienquio yec natia chieshëmë nec bëdamboec tabadtiapimbo iquec —quiash shubiantiadquio icpondash Esus.

³⁷ Adshumbic abëd icquido chuipondash. —Pete dadpen nitsinaid caniacsho bedtanenquio icnuc sinash chodquebudnequid. Adecbidi Nuquin Papan chiaid chuibanquid nibëdnuc matses icsamboec tabadec. Aden chuibanquid nuquipadquid daëdpactsëcquio iqueque.

³⁸ Nuquin Papa chianeta. “Matses dadpenshunquio mimbi bëdamboen iste tantiabi iqueque. Mimbi chiaid chuibanquid dadpen icmeta, Papa,” quequin Nuquin Papa chianeta —quequin chuipondash Esusën abëd icquido chuiquin.

10

Esusbëd icquido 12tedi chiaid
(*Mad 3.13-19; Duc 6.12-16*)

¹ Adshumbic Esusën abëd icquido 12tedi chuipondash. —Ëmbi naid chuibeneta. Ëmbi namiaid icquin ëmbi nabocpadomboen podobitsi icsa matses dapuedaid mimbi cuemendac. Adembidi daicsaido abitedi mimbi bëdamendac —quequin chuipondashi nëidtedi. ² Nëidic Petedo caidbidi Simon cuëmëdquid. Nëidic abëdta tishaid Andedes cuëmëdquid. Nëidic Sebedeyon mado abi daëdi. Abentsëc Acobo icnuc utsi Uan icpondash. ³ Nëidic Uedipe. Nëidic Badtodome cuëmëdquid. Nëidic Tomas. Nëidic ëbibi Mateyo con matses piucquid bedshundenedi. Nëidic Acobo cuëmëdquid utsi Adpeon mado. Nëidic Debeyo caidbidi Tadeyo cuëmëdquid. ⁴ Nëidic Simon cuëmëdquid utsi con matses yuaquido cuemete bunquid. Nëidic Iscadiote caidbidi Udas cuëmëdquid abi chieshënquido Esus bedmequid. Aidtedi abëd icquido icsho chuipondashi.

Abëd icquido: Chuibeneta, caid
(*Mad 6.7-13; Duc 9.1-6*)

⁵ Adshumbic: —Ëmbi chiacpadomboen chuibenenuc nidshun isadaidpembo chienda. Aido yacno nidenda. Nidaid cuëshë Samadia caid yacnocquidon shubu datambidanta. ⁶ Nuquin matses isadaidboudi chuibeneta. Bënudshun podqued tantienquio yacbimboen nuquin matsesën Nuquin Papambo tantienquio iqueque. ⁷ “Mibi icsaid ënash bëdamboec tabadta. Nëbi abëd tabadtequido icmequin Nuquin Papan matses bëdamboen tabadmendac,” quequin chuibeneta. ⁸ Adembidi daicsaido bëdamequinc unësaido uincuemequinc dada ushumbo yec daicsaido bëdamequinc podobitsi icsa dapuedaido

cuemeshunquinc cabeneta. Adoshon: “Piucquid beccho,” cainda. Ĕmbi nabocpadomboembidi mibi namembique. “Piucquid beccho,” quequin nainquio iccombique. Adembidi nashumbanta. ⁹ Aden chuibenec nidquin min piucquid buanenda. ¹⁰ Adembidi pete sandoaid buanenda. Dashcute utsibēdta tapucudte utsi sandoshon buanenda. Mibi tidinquete cuate abentsēqui buanta. Adec mēdadauidquio chosho isun mimbi bēdamiidon: “Mibi bēdambo iquec. Ĕbi yacno ushec cho,” mibi cac bēdambo ictsiash. Adembidi: “Mitsana nibēdsho isun mibi menenu,” mibi cac bēdambo ictsiash.

¹¹ Aden chuibenec shubu dadpen icquid yacno nidshun bēdambo icquid istuidta. Istuidshun: “Min shubu yacno ushec nidnu,” mimbi cac: “Ai,” qesho tantiasch aidēn shubun ushta. Auēshquio nidabi yec aidēn shubunuidi ushta. ¹² Aidēn shubun puduedshun: “Mibi isnuec chopobi,” cata. Adoshombic: “Nēid shubun icquido Nuquin Papan bēdambo icmepashun,” quequin aido bēdamboen ista. ¹³ Adoac anocquidon mibi bēdamboen iso: “Nuquin Papan bēdambo icmepashun,” mimbi canubi Nuquin Papan aido bēdambo icmendac. Anocquidon mibi chieshēnsho Nuquin Papan aido bēdamboen istiapimbo iquec. ¹⁴ Shubu dadpen icquid utsi yacno mibi nidacsho anocquidon cuemiac naden ismeta. Auēshquio puduanec nidnun: “Nuquin Papa tantiesabo yec Nuquin Papan cuidtequidombo mibi nec. Icsaidombo mibi nec,” quequin ismec nidaid putu tasequeta. ¹⁵ Mimbi adosho isun matses cuidte ushēmbi Nuquin Papan aido comapenen cuidendac. Ĕndenquimbo shubu dadpen yacnocquidotedi cuidquin Nuquin Papan uesquin unēs uapampic. Aid shubu dadpen icquid abentsēc Sodoma canubi shubu dadpen icquid utsi Comoda capampic. Aid daēd yacnocquido bēdiactsēc cuidshun mimbi chiaid tantienquio icquido

comapenen cuidendac —quepondash Esus aböd icquido chiec.

Esus tantiaquido chieshënte chiaid

¹⁶ Adashic padpiden chuioaic: —Ëmbi naid chuibenequido icsho utsin-utsinquien mibi chieshënendac. Bëdi nëish yua acte bunacbimboec chieshëmënquido mibi cuate bunendac. Aidoböd chieshënanenda. “¿Mitsipadomboen chiac Nuquin Papan chiaid tantiabempatsiash?” qeshun bëdamboen tantiaquin bëdamboen chuita. ¹⁷ Mibi chieshënquin cuesunetiadquio iquendac. Mibi bedshun: “Cuesmenu,” qeshun abi chuiquido mibi cuidmenuen Nuquin Papan chiaid chuibante shubuno mibi buanendac. Ashunquio mibi cueshcaten cueshcaindac. ¹⁸ Utsibombic adembidi cuesmenuen chuiquid dapa cobenadod yacno mibi buanendac. Adembidi chuiquid dapa utsi yacnotsen mibi buanendac. “Ma ëbi chuiquidon chuiquid dapabëdta isadaidpembo ëmbi naid chuibanu,” ëbi quenuc mibi aden buanendac. ¹⁹ Adoac dacuëdenda. “Chuiquid dapa yacnoshon ¿atotsimbi chuiPATSIABA? ¿Adambi bëdamboen chuiPATSIABA?” quec dacuëdenda. Chuiquid dapa mimbi bëisnubi Nuquin Papan ambi tantiacpadomboen mibi oncamendac. ²⁰ Aden aton Mayanën ambi tantiacpadomboen mibi oncamendac —quepondash Esus.

²¹ Adashic padpidec onquec: —Ëbi chieshënquidon ëbi tantiaquidotsen comapenen chieshënendac. “Esus tantiaquid nec,” qeshun aton buchimbi aton utsi cuesunemendac. Amëmbi ambi tishmiaid cuesunemendac. Aton bacuëbombi chieshtoshon anibëdta amë cuesunemendac. ²² “Esus tantiaquid nec,” qeshun matses dadpeshun aden chieshënaqui chieshtoenquio icquin ëbi tantiasho Nuquin Papan abi yacno mibi puduedmendac.

²³ Shubu dadpen yacno nidacsho chieshënac shubu dadpen icquid utsi yacno cuenta. Anoshontsen ëmbi naid chuisho chieshënoac shubu dadpen icquid utsi yacnotsen cuenoata. Adecuidi cuendeneta. Nëid nidaid Isadaid caidën shubu dadpen icquid abitedi yacno nidabi icnubi choaindabi. Nuquin matses isadaidbo abitedi chiabi icnubi Nuquin Papa yacnuësh choaindabi.

²⁴ Mibi tantiamequid nebi. Ëmbi tantiamiaido icsho ëbi icbocpadomboembidi mibi chieshënendac. Abi chuiquid dapa chieshënacpadembidi ambi namiaidotsen chieshënquid. Icho chieshënquimbi yuabotsen chieshënquid. ²⁵ Adembidi ëmbi chiacpadomboen natiadquio icsho mibitsen chieshënendac. Nuquin Papa yacno puduedmianquid icsho: “Ma podobitsi icsan icbo Betsibu caid neyoc,” ¿cainquiodabi ictiosh? Adembidi mibi Nuquin Papa yacno puduedtequido icsho mibitsen chieshënendac —quequin chuipondash Esusën abëd icquido chuiquin.

Dacuëdenquio icquin chui, quequin chiaid

(Duc 12.2-7)

²⁶ Adshumbic padpiden chuiquin: —Mibi chieshënquido dacuëdënenda. Aidon ompodshon icsamboen naid Nuquin Papan utsibo ismendac. Adembidi aidon shoshquetsëcquin chiaid Nuquin Papan utsibo tantiamendac. Adembidi mimbi bëdamboen naidtedi Nuquin Papan utsibo tantiamendac. ²⁷ Nëbi ëmbi mibitedictsëqui chuiboed dacuëdenquio icquin utsibo chuibeneta. ²⁸ Chuibenesho min dadauidtsëqui cuesunetequid dacuëdënenda. Min tantiate unëstiapimbo icquid icsho nibëdametiapimbo iquec. Min dada unësan min tantiate abi icsho cuidnuequin chian anëdënquequid nësecanquid tantiaata. Adquid Nuquin Papa icsho dacuëdënta.

²⁹ Utsibon chieshënaqui dacuëdenda. Nuquin Papan mibi tantieque. ¿Padichucu cuesaid isashta unësquo icti? Padenquo. Padnuen ambi tantiacpadomboembi padichucu dadpen icquid abentsëc cuesac paëdsho Nuquin Papan tantiec. ³⁰ Adembidi min manëdaid Nuquin Papan tambanaidquo nec. Aden min manëdaid abentsëc paëdsho aidën tantiec. ³¹ Aden min manëdaid tambanquid icquin padichucu bëdiactsëc tantiatsëcquin mibien comapenen tantieque. Mibi chieshënquido dacuëdënenda —quequin chuipondashi Esusën.

Esus con Icbo nec, quequido chiaid

(Duc 12.8-9)

³² Adshumbic padpiden chuiquin: —Utsibo chuiquin: “Con Icbo Esus nec. Nuquin Papa yacno ëbi puduedmequid nec,” quequin chianequid Nuquin Papa yacno chosho isun: “Nëid ëbi tantiaquid neque. Puduedmeta, Papa,” quequin Nuquin Papambo chiendambi. ³³ Padnuen utsibo chieshec: “Con icbo Esus catiapimbo iquebi. Tantiatiapimbo iquebi,” quequid bëdamboen istiapimbo iquebi. “Nuquin Papa yacno puduednu,” qesho: “Padi. Ëbi tantiaquidpenquo neque. Puduedmenda,” quequin Nuquin Papa chiendambi —quequin Esusën chuipondashi.

Esus tantiaquidobëdi cuëshëdte chiaid

(Duc 12.51-53; 14.26-27)

³⁴ Adshumbic padpiden chuiquin: —Ëmbi chuiboed tantishun: “Nuquin Papa yacnuësh choquid icquin abitedimbo bëdamboen tabadmetsiash,” ¿caquindabi ique? Padenquo ictsiambi. Ëbi tantiaquidobëd ëbi tantiesabo cuëshëdenquo icte danenda. Ëbi tantiaquidobëdi ëbi tantiesabo cuëshëdendac. ³⁵ Amëbëd aton mado cuëshëdendac. Adecbidi anibëd aton champi

cuëshëndendac. Adecbidi aton chayaböd aton babanën cuëshëndendac. ³⁶ Aden aton shubun icquidombi ëbi tantiaquid chieshënendac.

³⁷ Padnubic aton matsesuidi tantiaquidën ëbi bëdiact-sëc tantiatsëctsiash. Aton tita tantiaquinc aton papa tantiaquinc cain aidën chiacpadomboenuidtsëqui naquidën ëbi bëdiactsëc tantiatsëcquin ëmbi chiacpadomboen natiapimbo ictsiash. Adembidi aton mado tantiaquinc aton champi tantiaquinc cain aid bëdambo icmeteuidtsëqui bunquin ëbi bëdiactsëc tantiatsëcquin ëmbi chiacpadomboen natiapimbo ictsiash. Adquido bëdamboen istiapimbo iquebi. Ëbi tantiesabo nec. ³⁸ Utsibon chieshënac ëbi tantiatsëcboedi badedi chieshtoshon ëmbi chiacpadomboen natiapimbo yantsiash. Adquidotsen ëbi tantiaquidpenquio iquendac. ³⁹ Matses ambi naiduidi naquid Nuquin Papa yacno puduedtiapimbo iquendac. Padnuen ëbi tantiaquin ëmbi chiacpadomboen naquid Nuquin Papa yacno puduedendac. Adquid chieshënaqui chieshtoenquio ictsiash —quequin Esusën chuipondashi.

Nuquin Papan bëdambo icmete chiaid
(Mad 9.41)

⁴⁰ Adshumbic Esusën ëbi chedo padpiden chuipondash. —Mibi chieshënquido icnubi mibi bëdamboen isquid iquendac. Ëmbi naid mimbi chuisho tantiash: “Ai, abimbo caic,” qeshun ëbi tantiabenquin ëbi chomequidtsen tantiabenendac. ⁴¹ “Naden naindambi,” quequin ambi chiaid chuibenequid Nuquin Papan bëdamboen isaido nec. Adquid shubu utsi yacno nidacsho isash: “Nuquin Papan chiaid chuibenequid choeque. Bëdamboen chuisho tantianu,” quequid icsho Nuquin Papan bëdamboen isendac. Adembidi abi tantiec ambi chiacpadec bëdamboec tabadquid Nuquin Papan bëdamboen isaidobidi nec. Adquid shubu utsi yacno nidacsho isun:

“Nuquin Papan chiacpadec tabadquid nec,” queshun bēdamboen isquidotsen Nuquin Papan bēdamboen isendac. ⁴² Adembidi ěbi tantiaquid yec acte bundoacsho acte menequid Nuquin Papan cuidnanquin bēdambo icmendac. Adembidi utsibon Esus tantiaquido bēdamboen nashunsho Nuquin Papan bēdambo icmendac —quequin Esusēn chuipondashi. Adshun: —Chuibenetan —cac nidshumbimbi chuibenepondac.

11

Uan acten mentoanquidēn chuimiaid

(Duc 7.18-23)

¹ Esusēn: —Chuibenetan —cac abēd icquido nidanenubi auēshquiobi puduanec nidquin shubu dadpen icquid shubu dadpen icquidquien Esusēn Nuquin Papan chiaid chuibeniac caondash. Aid nidaid cuēshĕ Cadidia caidēn capucuenequin adoac caondash. Adnubini yuec-yuecpambo ictanec Esusbēd icoaic cho-chopondac.

² Adnubien Uanēn Esus acten mentondaidēmbi quēnēn nauedaid icquin Esusēn naid tantiapac caondash. Adshumbic abēd icquido chuiquin: —¿Nuquin Papan chomiaid nuqui cainaidta nepec? Esus chuitan —cac choshon Uambēd icquidon Esus chuituidpondash. ³ —Uanēn: “Chuitan,” cac chobi. ¿Ěmbi cainaid Nuquin Papan chomiaidquioda mibi nepe? Mibi adquidpenquio icnuc ¿ada utsi chopatsiash? —caquien ⁴ Esusēn: —Ěmbi nadatiambo icquin nabamboedbēdta ěmbi chuiboed Uan chiec nid. ⁵ “Bēshuacboedēn isbenosh. Canite icsaidi capucuenosh. Daushumbo icquid nami mishadenquio icquid bēdanosh. Pashuacboedēn tantiabenosh. Adoshombic unēsaidi uincuemiosh. Adoshombic Nuquin Papa tantienquio icquido Nuquin Papan bēdamboen iste chuiposh,” quequin Uan

chiec nid. Aden chiac Uanën: “Nuquin tsusedpan chiacpicpadquid Nuquin Papan chomiaidquio nec,” quequin ëbi tantiendac. ⁶ Adshumbic nadentsen chuita. “‘Muambo nec, ëbi cainquio icquin: Ambi chiacpadquid Nuquin Papan chomiaidien nec, quequin ëbi tantiaquid Nuquin Papan bëdambo icmendac,’ quiosh,” quequin chiec nid —cac nidanepondash Uambëd icquido.

Uan acten mentoanquid chiaid

(Duc 7.24-35)

⁷ Aido nidanebon Esusën Uan acten mentoanquid chuiquin abi datsidadquido naden chuipondash. — Matses nibëdacno ¿atotsi quenuc nidonda? ¿Cunquequidën ishacunaid isnueta nidtionda? Padenquio. ⁸ ¿Dashcute bëdaidquio dasiuidaid isnueta nidtionda? Padenquio. Icsactsëcquid Uan dasiuidpondash. Dashcute bëdamboshë icquid dasiuidquido ancanquidën shubu dapan tabadquido nec. ⁹ Ad icnuc ¿atotsi quenuc nidonda? “Naden naindambi,” quequin Nuquin Papan chiaid chuibenequid chuisho tantianuec ma mibi nidondac. Adec Nuquin Papan oncamiaidquio Uan nec. ¹⁰ Uanën abia choshon chuite chuiquin Nuquin Papan naden dada uamepampic.

“Mibi chote chuiquidba chomembi, Mado.

Aid: ‘Bëdambo icquid choeque. Icsainquio yec ënëdta,’ quequin mibi chote chiendac, Mado,”

quequin Nuquin Papan ambi chiaid dada uamepampic.

¹¹ “Nuquin Papan chomiaidquio choec,” quequin chuiquid Uanpadquid utsi nibëdec. Adquid yequi: “Abi choec,” quequin ambi chuiboedën ëmbi nabansho isabi yequi bëdapabi Uan ictsec. Padnuen ëmbi Nuquin Papan chiacpadomboen nabansho isash ëbi tantiaquido bëdamboshë iquendac. ¹² Uanën chuisho Nuquin Papa tantibenacpadomboen ëmbitsen Nuquin Papan bëdamboen

iste chuisho tantiashun adembidi abi icsaid ënshun icsaboedon dadpeshun Nuquin Papa tantiendac. ¹³ Nēbi Uanën: “Nuquin Papan abi yacnoshon bēdambo icquid chomendac,” quequin chuipondash. ¿Ambiada adopondash? Padenquo. Ēdenquimboshē tauamboen nuquin tsusedpa Moisesēn chuibempampic. Adshumbic utsintsen. Adshumbic utsintsen. Aden Nuquin Papan ambi bēdambo icquid chomete chuiquin dada uamianepampic. ¹⁴ Adembidi Uan chote chuiquin dada uamepampic. “Nuquin Papan ambi tantiacpadomboen oncamiaidquo Edias cuēmēdquid choendac,” quequin Ediasbimboecquid Uan chote chuiampic. Bēdamboen tantiaquin: “Nuquin tsusedpa Ediasbimboecquid Uan nec,” mibi catsiac. ¹⁵ Bēdamboen tantiaquidēn adembidi tantiatsiash —quepondash Esus abi datsidadquido chiec.

¹⁶ Aden chuisho tantiash chieshtoshobien Esusēn chuipondash naden. —Nuquin Papan chiaid tantienquo icquido yec nēmbo icquido ¿midapadquidoen nec? Bacuēbo nēishnanacbietsēcquieci mibi iquec. Bacuēbo: “Ēmbi chiacpadomboen nanuna,” queuidash ambi chiacpadomboen aton utsibon nainquo icsho isash nēishash chushcananquid. ¹⁷ “ ‘Cuēdēnuna,’ queuidbosh ēbi cuēdēnubi ma mibi cuēdēnenquo icboc. ‘Sedenquenuna,’ queuidbosh ēbi sedenquenubi ma mibi sedenquenquo icboc,” quetsash bacuēbo nēishnanacbietsēcquieci ma mibi iqueyoc. Adec nēishēmēnquido yec icsambo ma mibi iqueyoc. ¹⁸ Uan pete utsi-utsien pesa iccosh. Adecbidi acte paēmbo icquid aquesambo niosh. Adquid icsho isash nēishash: “Ēmbi nacpadomboen naisa nec. Podobitsi icsa dapuduedashien nechitec,” mibi quepondac. ¹⁹ Ēbien nuquin matsesēn piacbimboen pequid nec. Adembidi actequid acquid nebi. Adsho isash nēishun ēbitsen icsam-

boen chuishunquin: “Peteuidi tantiaquin nua pequid nec. Tantiadenuen acte paëmbo icquid acquid nec. Adecbidi nuquin matses piucquid bedshunquidobëd onquec icsambo icquid caidobëd onquec quequid ma aidobëdi icsambo icquid nepayoc,” mimbi ëbi capec. Padnuen bëdamboen tantiaquidën Nuquin Papan chiacpadomboen nasho isun Uambëdta ëbi: “Bëdambo iquec,” caindac — quepondash Esus abi chieshënquido chiec.

*Shubu dadpen icquidën tabadquido cuidte chiaid
(Duc 10.13-15)*

²⁰ Adshumbic Esusën padpiden chuipondash. — Nëbi shubu dadpen icquid shubu dadpen icquidquien comapenen tantiaquid icquin dadpen nabanquin ismebeniombi. Aden ismiac: “Icsaboedi bëdamboec tabadtiadquio iquebi,” quetiadquidi chieshec adenquio iquec —qeshun Esusën naden chushcapondash. ²¹ —Shubu dadpen icquid Codasin caid yacnocquidobëdi shubu dadpen icquid utsi Betsaida caid yacnocquido Nuquin Papan cuidtequido nec. Ëmbi aido ismebocpadomboen ismiac isadaidpembo cuidadenquio ictsempampic. Aden ismiaqui: “Ai, icsapobi,” quiash shubibudequi icsainquio yec ënëdtsempampic. Shubu dadpen icquid Tido caid yacnocquidobëdi shubu dadpen icquid utsi Sidon caid yacnocquido adtsempampic. ²² Nuquin Papan matses abitedi cuidte ushën: “Nadatiambo icquin nabanquin ismiacmaido nec,” qeshun Tido caid yacnocquido Sidon caid yacnocquidobëdta bëdiactsëc cuidendac. Adoshombic: “Comapenen tantiaquin ismiaqui tantienquio icquido nec,” qeshun Codasin caid yacnocquidobëdta Betsaida caid yacnocquido comapenec sidquenuc cuidendac. ²³ Adembidi nëmbo icquido Capednaun caid yacnocquido mibitsen Nuquin Papan cuidendac. “Nuquin Papa yacno

tabadtequido nuquitedi nec,” ¿quecta ique? Adquidpen-
 quio yec Nuquin Papa chieshênquido cuidacno nidme-
 tequido ma mibi nepayoc. Ēndenquimboshē yampido
 shubu dadpen icquid Sodoma caid yacnocquido cuidquin
 Nuquin Papan nibēdamepampic. Ēmbi mibi ismeboc-
 padomboen ismiac aidon abi icsaid ěntsempampic. Abi
 icsaid ěnsho Nuquin Papan cuidenquio ictsempampic.
 Cuidenquio yac nēbi aton matses abi ictsias. ²⁴ Nuquin
 Papan matses abitedi cuidte ushēn: “Comapenen tan-
 tiaquin ismiacmaido nec,” qeshun Sodoma caid yac-
 nocquido bēdiactsēc cuidendac. Nuquin Papan cho-
 miaid icquin ěmbi ismeboedo Capednaun caid yacnoc-
 quidoen comapenec sidquenuc cuidendac —quequin abi
 tantiesabo Esusēn chushcapondash.

Esusēn dayacquiobimboecnuc icmete chiaid

(Duc 10.21-22)

²⁵ Adshumbic Esusēn Nuquin Papa chuipondash. —
 Mibi bēdambooshē iquec, Papa. Mibi yacnocquidotedishun
 Icbombo yec nidaidēn tabadquidotedishun Icbobidi mibi
 nec. Mimbi tantiamiabi: “Dadpen tantiaquid nebi,” que-
 quidombi ěbi tantiabi iquec. Mimbi tantiamiac nēidon ěbi
 tantiec. Aden mimbi bēdamboen naic. ²⁶ Mimbi tantiac-
 padomboen mimbi bēdamboen naic. Mibi bēdambooshē
 iquec, Papa —quequin Esusēn Nuquin Papa chuipondash.

²⁷ Adshumbic abi datsidadquido chuipondash. —
 Nuquin Papan ambi tantiaidtedi ěbi chuimec. Ēmbi
 naboedbēdta ěmbi nate abitedi con Pan ambentsēqui
 tantiec utsibon tantienquio icnuc. Adembidi Nuquin
 Papan natebēdta ambi naboed abitedi ěmbentsēqui
 tantiembi. Aden Nuquin Papa tantiaquin: “Nēidtedi mat-
 ses bēdamboen tantiamembi,” qeshun: “Nuquin Papa
 nadquio iquec,” quequin tantiamembi. ²⁸ Ēbi tantiata.
 Dayacquo yacbimboecnuc mibi bēdambo icmembique.

“¿Mitsipadequibi Nuquin Papa yacno puduedpe?” quec
 ¿uimambo yacbimboecta mibi icpe? Adquidën ëbi tanti-
 asho Nuquin Papa yacno puduedtequid mibi icmembique.
 Ëbi tantiata. ²⁹ Con Icbo ëbi cata. Con yuambo icquin
 ëmbi chiacpadomboen nasho mibi bëdamboen isquin
 dayacquio yacbimboecnuc mibi bëdambo icmembique.
 Ancanesambo yec bëdambo icquidini neque. Con Icbo ëbi
 cata. Adsho mibi bëdambo icmembique. ³⁰ Mibi ancain-
 quio icquin dayacquio yacbimboecnuc bëdamboen mibi
 tabadmembique. Con Icbo ëbi cata —quequin chuipon-
 dash Esusën.

12

Esusbëd icquidon petsëcsho istuidshun chushcaid

(Mad 2.23-28; Duc 6.1-5)

¹ Adshumbic chonoadtemaid ushën Esusbëd capu-
 cuenequin tied matanquin bundotsëcshun tiedën caniq-
 uid ëshchicshun petempi petsëccondambi. ² Pesho istu-
 idshumbini con tsusedpabon chiampid namequido padis-
 eyobon: —Is. Mibëd icquido chonoadtemaid ushëmbi
 chonoadequi —capondash Esus chuiquin.

³ Adoaquien Esus: —Ma icsapenquio icpayoc. ¿Nuquin
 tsusedpa Dabidën bundoshon ambi petemaidquio
 pepampid chuiquin dada uapampid isamboda ictio?

⁴ Aidën Nuquin Papa tabadte shubu uashunaid abi
 puduedtemaidën puduedshun ambi petemaid pan sanaid
 istuidpampic. Aid panëmpi nëish yua abided unës
 uaquidon petequid nepampic. Aid panëmpi bedshun
 abëd icquidobëdtan Dabidën pepampic. Aden nuqui
 bëdambo icquid caidën ambi natemaidi napampic.

⁵ Adembidi chonoadtemaid ushën natemaid chiaid
 niacquimbi nëish yua abided unës uaquidon aid ushëmbi
 Nuquin Papa tabadte shubu uashunaidën puduedshun

nacnendenepec. Nuquin Papan chiacpadomboen naiqui icsainquio icpec. ⁶ Nuquin Papa tabadte shubu uashunaid tantiaquin adopec. Aid shubu bēdapabi icnuc bēdamboshē icquid nebi. ⁷ Nuquin Papan naden chiaid mimbi bēdamboen tantienquio iquec.

“Ēmbi chiacpadomboen abentse-abentsen mimbi naic. Adoquimbi ěmbi chiaid utsi niaquec mimbi icsaido caido mimbi bēdamboen istiapimbo iquec.

Adsho isun: ‘Mibi bēdambo iquec,’ catiapimbo iquebi.” quequin Nuquin Papan chiaid bēdamboen tantiashun ěbēd icquidon bēdamboen nasho mimbi chushcainquio ictsenoc. ⁸ Tanta. Nuquin Papan chomiaid icquin chonoadtemaid ushē ěmbibi chiampid icnuc ěmbi tantiacpadomboen aid ushēmbi ěbi tantiaquido namembique —quepondash Esus ěmbi petsēcsho istuidquido chiec.

*Mēicsatsaid bēdamiaid
(Mad 3.1-6; Duc 6.6-11)*

⁹ Adanec nidec Nuquin Papan chiaid chuibante shubun puduedshun ¹⁰ isaquien mēicsatsaid icpondash. Adnubien padiseyobon: —Chonoadtemaid ushēmbi bēdamequid Nuquin Papan chiaid niacquidien nechitec. Nuquin Papan chiaid Esus niacmenuna. Aden niacmeshun: “Icsambo mibi iquec,” canuna —queshun Esus chuituidpondash. —¿Nadquid chonoadtemaid ushēmbi matses bēdamequinda Nuquin Papan chiaid niacpec? —caquien ¹¹ Esusēn: —¿Ada min nēish yua obeca caid icpec? Adquid chonoadtemaid ushēn shēcuē uquēduc ampaēdacsho istuidshun ¿chiquenquioda mimbi icpatsia? Ai, mimbi chictsiac. Chonoadtemaid ushēmbi mimbi chonoadquin chicpatsiac. ¹² Aden min obeca bēdiactsēc tantiec mibi bēdapabi icnuc matses tantiaquioquin nashunquid bēdamboshē ictsiash. Nadquid chonoadtemaid ushēmbi matses aden bēdamboen nashunquidēn Nuquin Papan

chiaid niaquenquo ictsiaſh —quequin Esusën abi ic-samenu caquido chuipondash.

¹³ Adotanquimbien Esusën mëicsatsaid chuiquin: —Mëcueta —cac mëcuc bëdampondash aton mëdante abiuc daëdi bëdambo yec. ¹⁴ Adsho isashien abi chieſhënquido padiseyobo nëiſhquiopac caondash. Adec nëiſhanec nidash aton matses utsibobëd: —Cuesunequimbien Esus ictiad —quecuededpac caondash.

Esusën nate ëndenquimboshë chiampid

¹⁵ Adnubien Esus: —Ëbi cuesunetiadquo iquec —quianec auëſhquiobi puduanec nidpondash. Nidsho isumbien matses dadpenſhun tsibanampondash. Adshumbic aidon bëaid daicsaidotedi bëdamebampondash. ¹⁶ Adshumbic ambi bëdamiaido chuiquin: —“Bëdamioſhi,” quenda —quequin chuipondash Esusën: —Ëbi abi chuiquid dapa icmenushe —quiash adpondash Esus. ¹⁷ Aden Esusën nate chuiquin Nuquin Papan isadaidbo tsusedpa Isayas dada uamepampic naden chuiquin.

¹⁸ “Ëmbi chomiaid ëmbi chiacpadomboen naquidquo nec. Aid tantiaquiec bëdambo iquebi.

Con Mayan bëdambo icquid abëdi tabadmembï.

Adoac ëmbi bëdamboen iſte isadaidbobëdta matses ut-sibo abitedi bëdamboen chiendac.

¹⁹ Chushcanante bunenquo yec ancanenquo iquendac. Chuiquid dapa ictiapimbo iquendac.

²⁰ Icsambo icquido yec ſhubiquido yec natiaic tabadquido yec daicsaido yec quequidon abi bëdiactsëc tantiabentsëcſho bëdamboen iſquin bëdamboen tantiamendac.

Nuquin Papan chiacpadec cuidte uſhë choabi icnuc adoendac.

²¹ ‘Nuquin Papan tantiacpadomboen matses bédamboen namendac,’ qeshun nidaid utsi-utsiec yacnocquidon matses dadpeshun aidi tantiendac,” quequin Esusën bédamboen nate chuipampic Isayasën.

Podobitsi icsan namiaidi Esus nec, quiaid
(*Mad 3.20-30; Duc 11.14-23; 12.10*)

²² Adnubien Esus ismenuen daicsaid bëpondash. Dapuduedshun podobitsi icsan bëshu uain eme uaidi onquesa nepondash. Isenquio yec onquenquio icshobien Esusën bédamepondash. Adoac isbenequi onquiampondash. ²³ Adsho isashien Esus datsidadquido: — Is. Comapenen tantiaquin nabanquidquido nëid neque. ¿Nuquin tsusedpa Dabidën tsyuecquidta nepec? Adquid yec nuqui cainaidquio Nuquin Papan chomiaidien nechitec —quecuededpondash.

²⁴ Adsho tantiaish Esus chieshënquido padiseyobo: —¿Aidta nedic? Ma aidpenquio neyoc. Betsibu caidën podobitsi icsan icbon namiaid icquimbien Esusën podobitsi icsa cuemechitec —quequin otacquio tantiapanëdash.

²⁵ Adshobien Esusën aidon otacquio tantiaid ambembi tantiaishun naden chuipondash. —¿Adquidënda aton yuabi cuemepatsiash? Padenquio. Chuiquid dapan aton yuabo nëishtanquin chushcac cuësh-cuëshêdec aton yuabo uesadec nietsiash. Aido nibëdnuc chuiquid dapa ictiapimbo ictsias. Adecbidi shubu dadpen icquidën tabadquido chushcananash cuësh-cuëshêdec niqian shubu dadpen icboedi daëdpactsëc yanec. ²⁶ “Betsibu caidbidi Satanas caidëmbi namiaquien podobitsi icsa cuemechitec,” mimbi ëbi capoc. ¿Ambi naid nashobida Satanasën aton yuabo podobitsi icsabo cuemepatsiash? Padenquio ictsias. Satanasën cuemiac aidbëdi aton

yuabo cuësh-cuëshëdtsiash. Adnuc Satanash aton icbopenquo yantsiash. ²⁷ Mibëd icquidon podobitsi icsa dapuduedaid cuemiac caosh. ¿Cuemesho isun mimbi ëbi chiacpadomboen: “Betsibu caidën namiaquien nachitec,” cainda ictio? Ma mimbi padenquo icpaboc. Mimbi adoac: “Mimbi icsamboen chiec,” quetsenosh podobitsi icsa dapuduedaid cuemequido mibëd icquido. ²⁸ Nuquin Papan Mayanën namiaquimbi podobitsi icsa cuemioc. Ëmbi adosho isash: “Nëbi matsesbëd icquin Nuquin Papan namiaidën naosh,” quetiadquidi mibi nec —quepondash Esus.

²⁹ Adashic abi onquec: —Tantia. Mibi chuinu. Ampenusho icbon istuidac ampequidën icbo uidën uabi ampeshuntiapimbo iquec. Icbo uidënquo icquid bucun cataneshun ampeshunquid. Adecbidi Satanash bëdiactsëc tantiaquid icnuc ëbien comapenen tantiaquidquo nec. Uidën uacbimboen nadatiambo icquin nabanquin aton yua cuemepombi. ³⁰ Ëbi con icbo cainquo icquido Satanashën yuabo nec. Adquid icquin ëbi chieshënquin ëbi tantiatsëcquido cuëshëdmendac. Adquidbidi mibi nec —quequin Esusën abi chieshënquido chuipondash.

³¹ Adshumbic nadentsen chuipondash. —Nuquin Papan chiaid niac-niacboedëmbi ënacsho Nuquin Papan bëdamboen isec. Nuquin Papan icsamboen chuishunquidëmbi abi icsaid ënacsho Nuquin Papan bëdamboen isec. Aton Mayanën namiacsho isash: “Icsambo iquec,” quequin bëdamboen tantienquo icsho Nuquin Papan bëdamboen istiapimbo iquec. ³² Ëbi chieshënquin icsamboen chuishunquidëmbi ënacsho Nuquin Papan bëdamboen isec. Aton Mayanën namiacsho isash: “Icsambo iquec,” quequin icsamboen tantiasho Nuquin Papan bëdamboen istiapimbo iquec. Aden ënenquo icquin icsamboen tantiasho adembidi ënenquo icquin bëdamboen

istiapimbo iquendac —quequin abi chieshënquido Esusën chuipondash.

Bëdambo icquid nec, quequin tantiatae chiaid

(Mat 7.15-20; Duc 6.43-45)

³³ Adshumbic naden bëdamboec tabadte Esusën chuipondash. —Cuëte bëdan bacuë bëdambo iquec. Cuëte icsan bacuë icsambo iquec. Chetequid isun cuëte dada matsesën tantiec. Adembidi matses bëdambo icquid bëdamboec onquec bëdamboec tabadsho isun: “Aid bëdambo icquid nec,” quequin matsesën tantiatsiash. ³⁴ Ma mibi adquidpenquo neyoc. Nisibimboec icsa uanquido mibi nec. ¿Icsambo icquinda mimbi bëdamboen chuidio?. Ma mimbi padenquo icboc. Mimbi icsamboen tantiaid ma mimbi utsibo icsamboen chuiboc. ³⁵ Bëdambo icquidën ambi bëdamboen tantiaid bëdamboen chuitsiash. Icsambo icquidëmbien ambi icsamboen tantiaid icsamboen chuitsiash. Aden mimbi icsamboen chuipoc. ³⁶ Ambi cuidte ushën Nuquin Papan: “¿Ada bëdamboen tantiaquin chuidenio?” quequin matses abitedi chuimendac. ³⁷ Adoac abimbo chiec: “Ai, bëdamboen nadeniombi,” qesho icsano nidmenquo iquec. Padnuen utsi: “Padenquo. Icsamboembimbi chuidenechitoc,” qesho icsano nidmequin cuideque. Icsamboec onqueboedi ënëdta —quequin Esusën abi chieshënquido chuipondash.

Padiseyobon: Èbi isme, quequin Esus chiaid

(Mad 8.12; Duc 11.29-32)

³⁸ Aden chuisho tantiashumbien abi chieshënquido utsibon Esus chuituidpondash. —“Nuquin Papan cho-miaidini nec,” quequin ëbi ismequin nadatiambo icquin nabanta. Isnu —quepondash padiseyobo Moisesën dada uapampid chuibanquidobëdi.

³⁹ Adoaquien Esus: —Padi. Nuquin Papan chiaid niacniaquec mibi icsamboshë iquec. Ëbi tantiate bunenquio icquimbi mimbi: “Ëbi isme,” ëbi capec. Adsho nëbi mibi ismenquio iquembi. Yuecshumbimbi mibi ismendac. ¿Ada nuquin tsusedpa Onas caidën nampid tantie? Aid yampicpaden naindambi. ⁴⁰ Chishcambieccquid dapan chebudac aidën pucun uec daëdec ushacsho ucbudac Onas padpidec nidpampic. Adecbidi unësacsho chococac Onas yampicpadec daëdec ushash uincuenendabi. Aden ismendambi. ⁴¹ Ëbi tantienquio yec mibi icsambo iquec. Padnuen Nuquin Papan chiaid Onasën chuibanac shubu dadpenquio icquid Ninibe caid yacnocquido badedi ic-sainquio yec ënëdpampic. Nuquin Papan chiaid chuibanquid Onas bëdambo icpampic. Ëbien bëdamboshë icquidquio nec. Adquid icquin nadatiambo icquin dadpen ismiaqui mimbi ëbi tantienquio iquec. Aden ëbi tantienquio icquido icsho Nuquin Papan matses abitedi cuidte ushën Ninibe caid yacnocquidon: “Icsambo iquec,” mibi caindac. ⁴² Adquid cuidte ushëmbi matses utsi Sud yacnocquido ancaquidën nuquin tsusedpa Sadomonën chuisho tantiec chopampidëntsen: “Icsambo mibi iquec,” mibi caindac. Aid ancaquid chido nepampic. “Isadaidbo ancaquid Sadomon cuëmëdquid dadpen tantiaquid nec,” quequin chuituidac Sadomonën chuisho tantianuec nidshun aid chidon tantiatuidpampic. Adash: “Nuquin Papan tantiamiaidënquio Sadomonën bëdamboen chuipec,” quepampic. Ëmbien abitedi tantiaquid icquin nadatiambo icquin ismeuidpoc. Ado aqui mimbi tantienquio icpec —quepondash Esus abi chieshënquido chiec.

*Abi nianaid podobitsi icsa dapuduedoaid
(Duc 11.24-26)*

⁴³ Adshumbic naden Esusën chuipondash. —Icsaquido mibi nec. Podobitsi icsa dapuedaidbimboecquid mibi nec. Tantia. Mibi chuinu. Abi dapuedaid matses nianashi podobitsi icsa abi dapuedtequid nibëdacno yuec capucuen-capucuenec. Adtanequi: “Ëbi icbocnobi dapuedoic nidebi,” quianec choec. ⁴⁴ Chonobi ambi niamboed matses: “Ëbi dapuedaid podobitsi icsa nibëdnuc bëdambo iquebi. Adquid chomeoatiapimbo iquebi. Ëmbimbo naic bëdamboec tabadquidquo nebi,” queuidpec. Adshobien ambi niamboed podobitsi icsan istuidopec. Istuidoashic: “Dapuedtequidquo nëid nec,” quianec ⁴⁵ abipadquid utsi bedec nidoaic. Nidshumbic 7tedi icsamboshë icquido istuidshun bëash aidobëdi dapuedec. Adnuc podobitsi icsa abentsëc dapuedaid yec ënden icsambo icboedi aido dadpen dapuedaid yec buëdanquiec aid matses icsamboshë yanec. Adquid mibi iquec. “Bëdambo iquebi,” queboedi nëbi mibi icsamboshë yanec —quequin Esusën chuipondash.

*Anibëdi Esusën utsibo choaid
(Mad 3.31-35; Duc 8.19-21)*

⁴⁶ Adanec shubun puduedshun Esusën abëd puduedquido dadpen chuinubi aton utsibo aton titabëdi Esus isnuec chopac caondash. Umanuc tabadnubi ⁴⁷ utsin puduedshun Esus chuituidpondash. —Mibi isec tita min utsibobëdi choaccosh. Umanuc tabadec —caquien batedi nidenquo yec ⁴⁸ Esus: —Utsitsen con ta caimbi. Adembidi utsitsen con utsi caimbi —quetanquin ⁴⁹ abëd icquido mëdquin ismepondash. —Nëid ëbëd icquido con utsibo caimbi. ⁵⁰ Nuquin Papan chiacpadomboen naqidquidquo icsho con matses caimbi. Con utsi caquinc con chibi caquinc con ta caquinc caimbi —quepondash Esus.

13

Piacbo ëshë siaid chiaid
(Mad 4.1-9; Duc 8.4-8)

¹ Adtanec nidec chian budash cuëmano tabadtuid-pondash. ² Tabadtuidsho isash matses dadpenquoio cho-choash tsucus-tsucustsëcquoio yec Esus datsidadpondash. Adsho istanec cano dapa antabëdtoash cuëma anoentsëc canon nuadquin Esusën chuipondash cuëmano tabadquidon tantianubi.

³ Adshumbic abi tantiate chuinen naden ompoacbimboen chuipondash. —Piacbo ëshë siaid utsi-utsiec bëdamboec caniec. Utsi-utsiec padenquoio. ⁴ “Abitedi ansecanu,” caidi utsi-utsiec shëcuë nibëdacno paëdec. Paëdacsho paëdaid uicchunën chequid. ⁵ Èshë utsibic nidaid tsasimbo yacno siac badedi dëyucuidash ⁶ aton tapun nidaidën puduedenquoio icnuc ushë chënquequidën badedi unësquid. ⁷ Èshë utsibic nisanquid diadacno siaid dëyucash canidouidtsëcsho nisanquidën dayunac unësquid. ⁸ Padnuen ëshë utsi-utsiec nidaid bëdanquoio siac dëyucash caniaash dadpenquoio ëshëquid. Utsi-utsiec 100ted ëshëquid icnubi utsi-utsiec 60ted ëshëquid icnuc utsi-utsiec 30ted ëshëquid —quepondash Esus.

⁹ Adashic: —¿Min pabiate shëcuë nibëdquietta iquec? Èmbi chuiboed bëdamboec pausudta —quepondash Esus.

Ompoacbimboen chiec nebi, quiaid
(Mad 4.10-12; Duc 8.9-10)

¹⁰ Adsho tantiashun abëd icquidon Esus chuipondash. —¿Atotsieshun ompoacbimboen nëid matses dadpen chie? —caquien ¹¹ Esus nadpondash. —Utsibo tantiamenquoio icquin Nuquin Papabëd tabadte chuiquin

nëbi mibiuidtsëqui tantiamembi. ¹² Nuquin Papa tantiatadquo icquidën ëbi tantiasho bëdamboen tantiamendambi. Nuquin Papa tantiauidtsëcquidën ëbi tantienquo icsho ëmbi ompoacbimboen chiac tantienquo ictsiash. ¹³ Ompoacbimboen aido dadpen chuibanembi. Ëmbi naid isun ëbi tantienquo iquec. Ëmbi chuisho pamumëdacbimboen tantienquo iquec. Adsho aidon tantiatiapimbo icnuc chiembi. ¹⁴ Nëidon tantienquo icte chuiquin Nuquin Papan nuquin tsusedpa Isayas caid naden dada uamepampic.

“Chiac tantiaboshombi tantienquo iquendac.

Ismiac isquioboshombi: ‘Ai, aidi nec,’ cainquo iquendac.

¹⁵ Ai, ëmbi chiaid tantiatiapimbo iquec.

Ushacbimboen tantienquo yec pamumëdacbimboec chieshëmëñquidombo iquec.

Ëbi tantiate bunenquo iquec.

Ëmbi chiaid tantiaquidombien paposhquiacbimboen bëdamboen tantiabentsiash.

Pausunacbimboen tantiashun ëmbi chiacpadomboen natiadquo yansho aton chiesh bëdametsiambi. Aton chiesh bëdamete bunenquo iquec,”

quequin Nuquin Papan dada uamepampic —quepondash Esus abëd icquido chiec. ¹⁶ Adashic aidobidi chiec: — Isayasën chiacpadomboen utsibon ëbi tantienquo icnubi mimbien ëbi tantiec. Ëbi isec mibi tabadec. Ëmbi chuibansho tantias: “Ai, abimbo caic,” quec mibi bëdambo iquec. ¹⁷ Ëbi chote chuipampidobëdtan bëdamboec tabadquido dadpenshun mimbi ëbi isacpadomboen ëbi iste bunequi ëbi isambobi unëspampic. Mimbi ëmbi chuisho tantiacpadomboen tantiatiadquo yequi tantiambobi unëspampic —quepondash Esus.

Piacbo siaid sebadënquo chiaid

(Mad 4.13-20; Duc 8.11-15)

¹⁸ Adashic abi onquec: —Tantia. Ęmbi piacbo ęshę siaid quequin chuiboed sebadęnquo mibi chuinu. ¹⁹ Nuquin Papabęd tabadte chiaid piacbo ęshę siaidbimboecquid nec. Nuquin Papan chiaid chiaqui tantiadenquo icsho Satanasęn nac badedi bęshumpec. Uicchunęn piacbo ęshę paędaid badedi chiacbimboen adopec. ²⁰ Utsibic Nuquin Papan chiaid chiaqui będiactsęc tantiauidtsash: “Będambo iquec,” quec cuishonqueuidtsec. ²¹ Adsho: “Nuquin Papan chiaid tantiaquid nec,” qeshun utsi-bon chieshęnac badedi chieshtoshon tantienquo yanendac. Piacbo ęshę tapunuidtsash unęsacimboen adoendac. ²² Utsibic Nuquin Papan chiaid tantiatsashi ambi dacuędquin tantiauidi tantiequi chieshtopec. Utsibic tantiauidtsash ambi bedtequiduidi tantiequi chieshtopec. Nuquin Papan chiaid tantienquo icpec. Isitodon daynac unęsacimboen adoendac. ²³ Padnuen utsibon tantiate nidaid będan siaidbimboecquid nec. Nuquin Papan chiaid chuisho tantiaquioshon ambi tantiaid bęnuainquo icquin tantiabudec będamboec tabadec. Adshun aidęn chiac utsi dadpenquioshę ębi tantiaquid yanendac. Utsin chiac dadpen adecbidi ębi tantiaquid yanendac. Utsin chiac daędpactsęc adquidbidi yanendac —quequin abi tantiate chuipondash Esusęn.

Ęshę icsambo icquid seuanaid chiaid

²⁴ Adshumbic Esusęn naden chuipondash. —Tantia. Nuquin Papan namiaid tantiamenuen utsi chiacbimboen chuinu. Tiedęn caniquid pete adosbiecquid icbon siac caondash. ²⁵ Adanec nidambic inchęshęmbi choshon chieshęmęnquidęn ęshę icsambo icquidtsen daęd uain seuanac caondash. ²⁶ Adoac adosbiecquid canidotsęcnubi abędi tancandaędpamboec icsambo icquid canidotsac caondash. ²⁷ Adsho istanquin yuabon aton icbo chuituidpac caondash. “¿Pete ęshęda sio?” cac: “Ai,” qesho tan-

tiash: “Icsambo icquidbëd tancandaëdec canidopacboc. ¿Mitsipaden sio?” quequin yuabon icbo chuipac caondash. ²⁸ Adoaquien: “Chieshëmëncuidëmbien seuanchitash,” cac: “¿Chicshunetanquindambi icpe?” yua quesho: ²⁹ “Padi. Petebëdi chiquidtsiash. ³⁰ Aidbëdi ma canipana. Èshëacsho tacuesquimbi teshun sianun nanuna. Adoshombic icsambo icquid tsindobanshun nëdëncanun nanuna. Icsambo icquid nëdëncatanquimbic pete bedshun sandoshon shubun dectandonon nanuna,” quepac caondash tied icbo —quequin Esusën chuipondash.

Esus tantiaquido dadpen yante chiaid

(Mad 4.30-32; Duc 13.18-19)

³¹ Adshumbic abi tantiaquido dadpen yante tantiamenuen Esusën naden chuipondash. —Cuëte bacuë èshëmpi ³² pistsëcquidi nuamboshë caniec. Aid cuëte cuidin uicchun dadpen tabadtonec. Adecbidi ëbi tantiaquid abentsëcshun bëdamboec tabadquin ismiac ëbi tantiaquid dadpenquio yanendac —quepondash Esus.

Abi bëdamboen tantiate Esusën chiaid

(Mad 4.33-34; Duc 13.20-21)

³³ Adshumbic Esusën abi bëdamboen tantiate chuipondash. —¿Mitsipad nami uaid icpec? Aniactsëc nami uashun utsibëdta daëd uain cabiunac abichobi batambo yanec. Adembidi ëbi bëdiactsëc tantiatsëcboedi ëmbi chiaid tantiash ëbi bëdamboen tantiaquid yanendac ³⁴ —quequin Esusën chuipondash. Sebadënquio chienquio icquin ompoacbimboenuidi Esusën chuipondash. ³⁵ Aden Esusën chuite chuiquin Nuquin Papan dada uamepampicpadomboen nanuen adopondash. Nuquin Papan dada uamepampid nad iquec.

“Sebadënquio chienquio icquin ompoacbimboenuidi chuibanendambi.

Ëndenquimboshë matses uaboshombi Nuquin Papan
ambi tantiaidi ambi uaido chiambo iquec. Adem-
bidi aidon tsyuecquidotedi chiambobidi iquec.

Nëbimbi chuibanendac,”

quequin nuquin tsusedpan Esusën chuite dada uapampic.

Ëshë icsambo icquid seuanaid sebadënquio chiaid

³⁶ Adashic matses dadpen tabadacnuësh nidec Esus
shubun puduedondash. Puduedshobien abëd icquidon
chuipondash. —“Chieshëmëncquidën ëshë icsambo icquid
siaid nec,” quequin mimbi chuiboed en sebadënquio chui,
Icbo. Tiantianu. ¿Atotsi chuitiadquio icquin aden chio?

³⁷ —caquien Esusën chuipondash naden. —Tantia. Mibi
chuinu. Pete ëshë bëdambo icquid sequidbimboecquid
nebi. Nuquin Papan chiaidquio tantiaimequin matses
bëdambo icmequid nebi. ³⁸ Padnuc tied dapabimboec-
quid nidaidën tabadquidtedi nec. Padnuc pete ëshëbim-
boecquid ëbi tantiaquid nec. Nidaid utsi-utsiec yacno
tabadquido utsi-utsien ëbi tantiaquid icmendambi. Pad-
nuc ëbi chieshënquid Satanasën yuaido icsambo icquid
siaidbimboecquid nec. ³⁹ Padnuc ëshë icsambo icquid
sequidbimboecquid Satanas nec. Aidën yuaido matses
icsambo icquidon ëbi tantiaquidobëd tabadquin icsameti-
adquio iquec. Adsho badedi cuidenquio icquin Nuquin Pa-
pan cuidte ushë choabi icnuc matses icsambo icquidobëd
bëdambo icquido tabadmendambi. Padnuen ambi chiac-
padën Nuquin Papan abi yacnoshon uaido mayan bëd-
abon ëmbi chiacpadomboen naindac. ⁴⁰ Icsambo ic-
quid tsindoshon nëdëncabimboen Nuquin Papan cuidte
ushëmbi icsambo icquido cuidendac. ⁴¹ Ëmbimboen
mayan bëdabo namendac. “Icsamianquidobëdta ic-
saidotedi bedshun chian anëdënquiacno nëseca,” que-
quin ëmbi chiac ⁴² bedshun chian anëdënquiacno nëse-
caindac. Adoac natiaic mëyadbudec sidquequindac.

⁴³ Padnuen ëbi tantiec bédamboec tabadquido Nuquin Papa yacno nidash icsatiapimbo icquid iquendac. Ëmbi aden chuiboed tantiashun ëmbi chiacpadomboen nata — quepondash Esus.

Nuquin Papabëd tabadte bunquiota, quiaid

⁴⁴ Adshumbic padpiden Esusën chuipondash. —Tantia. Matses ambi istuidaid bedte comapenec bunquiaid mibi chuinu. Utsin tied nantan nidshun dadan ëndenquimbo ompoampid piucquid dadpenquio icquid istuidpac caondash. Istuidash aid bedte comapenec bunquiopac caondash. Adshun aton na abitedimbo menequin piucquid bedshun tied icbo aid piucquid meneshun: “Nëbi con tied nec,” qeshun piucquid ompoampid bedpac caondash. Adomboen matsesën Nuquin Papabëd tabadte bunquin aton nauidi nainquio icquin Nuquin Papan chiacpadomboenuidi nac bédambo ictsiash.

⁴⁵ Tantia. Casëdu bédaidquio bunaidtsen mibi chuinu. Dadan casëdu bédaidquio bunquin bednuen nibënbenepac caondash. ⁴⁶ Adshun bédaidquio istuidash: “Nadquid utsi nibëdec,” quiash comapenec bunquiac caondash. Adshun aton na abitedimbo menequin piucquid bedshun casëdu icbo menequin aid casëdu bedac caondash. Adomboen Nuquin Papabëd tabadte bunquin matsesën ëbi tantiaquiac bédambo ictsiash —quepondash Esus.

Nuquin Papan cuidte ushë Esusën chiaid

⁴⁷ Adshumbic Esusën naden chuipondash. —Tantia. Mibi chuinu. Nuëcquid nibedacimboen naindambi. Isaidaidbon nuëcquid dadpenquio bedte nëshaid dapa acte nënequin ⁴⁸ nëshaid cubu-cubuctsëcquio icnuc nuëcquid bedshun acte cuëman tabadquin nuëcquid nibedquid. Nuacquid sandobanquin pistsëcquid acte

nësecaquid. Aden Isadaidbon nuëcquid bedquid.
⁴⁹ Adomboembidi namendambi. Nuquin Papan cuidte ushë chonoc ambi abi yacnoshon uaido mayan bédabo namendambi. Adoac choshon nibedacimboen matses bédambo icquido Nuquin Papa yacno nidmequimbi
⁵⁰ icsambo icquido chian anëdënquiacno nësecaindac. Adoac natiaic shubiquendac —quequin Esusën Nuquin Papan cuidte chuipondash.

⁵¹ Adshumbic: —¿Ada ëmbi chuiboedtedi tantie? —caquini: —Ai, tantiembi —quepondac. ⁵² Adsho tantiashun Esusën chuipondashi. —Nuquin Papan chiaid chuibanquid mibi iquendac. Matsesën aton na ëndenquimbo dayun uanëdaidbëdta aton na chuca ismequin chiacimboen mimbi naindac. Nuquin Papan chiaid ëndenquimbo dada uampidbëdtabi Nuquin Papan chiaid utsi ëmbi chuiboedquio mimbi chiendac —quepondash Esus.

Nasaded yacno Esus nidaid

(Mad 6.1-6; Duc 4.16-30; Uan 4.44)

⁵³ Adanec auëshquiobi nidequi ⁵⁴ abi caninëdacno shubu dadpen icquid Nasaded caid yacno chopondash. Ambo choshombic Nuquin Papan chiaid chuibante shubun puduedshun aton matses chuipondash. Adoaquien: —¿Mitsipaden comapenen tantiabempash neba? ¿Mitsipadec comapenen tantiaquin bédamequid yampash? ⁵⁵ ¿Nuqui isacmaidta nedic? Ma aton papa cuëte nacnenquid nepaboc. Ma aton tita Madia nepayoc. Aton utsibo nëidtedi iccosh. Nëidic Acobo. Nëidic Ose. Nëidic Simon. Nëidic Udas. Aidtedi aton utsibo iccosh. ⁵⁶ Aido nëmbo tabadosh. Aton chibichedotsen nëmbo tabadosh. ¿Comapenen tantiaquidta nedic? Ma adquidpenquio neyoc —quequin ⁵⁷ Esus chieshënquin tantienquio icpondash.

Adsho tantiashun Esusën nadopondash: —Nuquin Papan: “Ëmbi tantiamiacpaden chuibanta,” caidën chiac ut-sibon tantiaquid. Adquidën abi caniacnoshon chuibansho tantienquio icquid —quepondash Esus. ⁵⁸ Adshun nadatiambo icquin nabanquin daëdpactsëc ismetsëccondash: —“Nuquin Papan chomiaidquio nec,” quetiapimbo iquec —qeshun.

14

Uan acten mentoanquid

unës uaid

(Mad 6.14-29; Duc 9.7-9)

¹ Adnubien ancaquidën Edodes caidën Esusën comapenen tantiaquin nabanaid chuisho tantiapac caondash. ² Adshumbic aton yuabo chuipac caondash. —Uan pado acten mentoandened nepash icnui. Ëmbi mapi butemiondaidi uincuempash icnui. Adquid icquin comapenen tantiaquin nabampash icnui —quepac caondash Edodes.

³⁻⁴ Edodesën Uan cuesuniac caondaïd chuïnu. Tantia. Uanën: —Mimbi bedaid Edodias caid min chidopenquio nec. Min utsi Uedipe caidën chido bedshun Nuquin Papan chiaïd mimbi niaquec —cadoniaquien Edodesën chieshtoshon uidën uameshun Uan quënën nauedmepac caondash.

⁵ Adshumbic Uan cuesunetiadquio icquimbi aton mattses: —Nuquin Papan chiaïd chuïbanquidquio nec —quesho tantiashun aïdo dacuëdënquin Uan badeï cue-sunenquio icpac caondash.

⁶ Adshumbic Edodesën: —Ëbi tishaid ushë nec —qeshun mattses dadpen aton shubun puduedmeshun pemepac caondash. Adnubien ambi inaidën champin Edodesën pemiaïdo baidaquin ismepac caondash. Adsho

isumbic Edodesën: —Bëdamboenshë mimbi naic —queshun ⁷ naden chuipac caondash. —Tantia, champi. ¿Atotsi buneque? Mibi bunaidquio mibi menenu. “Nuquin Papan cuidnushe,” quiash muatiapimbo iquebique. En ëbi chui —capac caondash Edodesën. ⁸ Adoaquien champin aton tita chuitampac caondash. Chuitanec choshon anin chiaid chuituidpac caondash. —Uan acten mentoanquidën mapi butetanquin pada-padaid dapan ananshun baded ëbi mene —capac caondash champin Edodes chuiquin. Uanën —Min bënë nianshun utsi bedmec mibi icsaic —cac champin tita Uan cuesunemete bumpac caondash.

⁹ Adoaquien Edodesën: —¿Atotsi quepequini ado? ¿Adoenquio ictiadtsimbi icpoba? —quequin ambi chui-boed niactiadquio icpac caondash. —Ëbi isedquidon: “Mibi muambo nec,” canushe —quetanquin champin chiacpadomboen aton yuabo: —Uan mapi butetan —capac caondash.

¹⁰ Adoac quënën tsadacnobi Uan mapi buteshun ¹¹ mapi pada-padaid ananshun buanshun champi menepac caondash yuabon. Adoaquien champin ani menenun buampac caondash.

¹² Adnubien Uanbëd ictenedon Uan mapi butiacsho dada bedanquin buanshun chococatampac caondash. Adotanec Esus chiec nidpac caondash.

Comapenen tantiaquin 5000tedi pemiaid

(Mad 6.30-44; Duc 9.10-17; Uan 6.1-14)

¹³ Nidshumbic: —Mibi acten mentondaid mapi butiac-cosh —catuidpondash. Adsho tantianec cano antabëd-toshon chian potias pudundoanec matses nibëdac-nombo Esus nidanepondash. Aden chian potesho isash: —Nuquitsen nidnu. Nid —quianec matses dadpen chian dëquiadec podqued nidquidën nidanepac caondash.

¹⁴ Adnubien Esus matses nibëdacno istanec chian yacno choapondash. Choashun isquien abi cainec matses dadpen tabadec. Adsho isun aido tantiaquidquo icquin daicsaidotedi bédamebampondash.

¹⁵ Ushë budambi Esusbëd icquidon: —Inchësheque. Pete nibëdacno nuqui tabadeque. Nidaneme, Icbo. Shubu dadpen icquid utsi-utsiec yacno nidshun ma piucquid menequin ma pete bednu —caquien ¹⁶ Esusën: —Padi. Ma tabadnu. Mimbibi peme —capondashi.

¹⁷ Adoaquini: —Ma panëmpi 5tedpactsëc icpayoc. Nuëcquidëmpi daëdquiobi ictsec —quepondac. ¹⁸ Adsho: —Aidtedtsëqui beccho —cac meniondambi.

¹⁹ Adoaquien Esusën abi datsidadquido chuiquin: —Uasinën tabadbud —capondash. Adoac tabadbudnubi abuc isquin Nuquin Papa chuipondash. —Mimbi uaid pete bédambo iquec, Papa —quetanquin panëmpi cuësh-cuëshun abëd icquido menebanac aidontsen matses abitedi menebampondash. Adembidi nuëcquidëmpi bushtebantsëcshun menebampondash.

²⁰ Adoaquien nua cubudcuededquin pebededpondash abitedishumbi. Piacsho isun napi uaid bedtanequin tsitsan dapan sandotanquin isquien tsitsan dapa 12tedi cubu-cubuctsëcquo iquec pete cuësh-cuëshaid napi uaid.

²¹ Aden matses dadpenquo pemebampondash. Aido dadatedi tambanac 5000tedi icpondash. Aton chido aton bacuëbobëdta tambanambo iccondambi.

*Acte bëntse Esus choaid
(Mad 6.45-52; Uan 6.16-21)*

²² Adshumbic Esusën abëd icquido chuiquin: —Chian potec nidta —capondash. Adoac cano antabëdtoanec potec nidnubi Esusën abi datsidadquidotsen: —Nidanec nid —cac nidanepac caondash. ²³ Adec nidanebon

Nuquin Papa chuinuec macuësh dectatoash abentsëqui Esus inchëshpac caondash.

²⁴ Adnubien chian dapa potequi abëd icquidotsen inchëshpondash. Chian nënantanquio yanubi cunque-tuidpondash. Adnuc acte comapenec tëccuasquiampondash uncadenquio yec. Comapenec acte ish cudnuc cano mentoadtiadpambo icpondash.

²⁵ Adnubien badiadte anoentsëqui acte bëntse Esus chopondash. ²⁶ Acte bëntse chosho isashini: —Podobitsi nec —quiash dacuëdtanec sidquecuededpondac. ²⁷ Adshobini Esusën: —Ëbien neque. Dacuëndenda —capondash. ²⁸ Adoaquien Petedon: —¿Con Icbombobida ne? Con Icho icquin: “Acte bëntse cho,” ëbi ca —capondash.

²⁹ Adsho tantiashun Esusën: —En cho —caquien Petedo canonoësh budanec acte bëntse Esus bëquedbanec niduidtsëccondash. ³⁰ Esusuidi isec bëdamboec niduidtsequi acte comapenec tëccuasquesho isash dacuëdtanec acte bëntse niduidtsëcboedi mentoadtsempondash. —Ëbi bed, Icho. Mentoadebique —caquien ³¹ Esusën badedquio bedtanquin indopondash. Aden indoequi: —“Con icbon ëbi bëdamboen nametsiash,” queboedi ¿atotsi quiash dacuëdtano? Ëbi bëdiactsëc tantiatsëcquid mibi nec —quepondash Esus Petedo caic.

³² Adtanec Petedobëdi cano antsadtonobien cunqueboedi cunquequio yampondash. Actetsen tëccuasquenquio yanondash. ³³ Adsho isun cano antabëdquidon: —Mibi bëdamboshë iquec. Comapenen tantiaquidquio yec Nuquin Papan Madombo mibi nec —quequin Esus tantiabededpondash.

*Quenesaded yacnoshon Esusën bëdamiaid
(Mad 6.53-56)*

³⁴ Adashic chian potiash Quenesaded yacno pudundopondash. ³⁵ Pudundosho isun anocquidon: —Esus chosh —quequin uanocquido abitedi chuibeniac daicsaido abitedi bë-bëpondash. ³⁶ Bë-bëshumbic: —Dashcuteuidtsëqui mishashi bédantsiash —queshun Esus chuituidquin: —Min dashcute cuëmano daicsaido mishme —cac mishmiaqui bédampondash abitedi.

15

Padiseyobo icsaid Esusën chiaid

(Mad 7.1-13)

¹ Adnubien padiseyobo Moisesën dada uampid chuibanquidobëdi shubu dadpen icquid Edusaden caid yacnuësh cho-choquin Esus istuidpondash. ² Istuidashic: —¿Atotsieshun mibëd icquidon nuquin tsusedpabon chiaid niac-niacposh? Penush mëpamëdenquo icquin nuquin tsusedpabon chiaid ma niac-niacpaboc — quepondash Esus chieshënquido.

³ Adsho tantiashun Esusën: —Ma mimbi. ¿Atotsieshun Nuquin Papan chiaidquo niac-niaque? Nuquin tsusedpabon chiacpadomboen naquin ma mimbi Nuquin Papan chiaidquo niac-niacpayoc. ⁴ Tantia. Mibi chuinu. “Titabëdta papa chieshënenquo icquin bédamboen tantiata,” quequin Nuquin Papan chiampidquo ma mimbi niacpaboc. Adembidi: “ ‘Con pa unëshashun,’ quec chieshëmënkuid icsho unës uaquid. Adembidi ani ic-samboen chuishunsho unës uaquid,” quequin Nuquin Papan chiampid utsi mimbi niacpec. ⁵ Aid niacquin nuquin tsusedpabon ambembi chiaidien mimbi chiec. “Anibëdta amë naden cudasënac bédambo ictsiasht,” mibi quepec. “ ‘Nuquin Papa menetequid nëidted con piucquid iquec. Mitsana nibëdsho menetiadquidi mibi menenquo iquembi. Nuquin Papa menetequid nec,’ quequidën

⁶ cudasēnac bēdambo ictsiaſh,” mibi quepec. Aden nuquin matsesēn chiaid naquin Nuquin Papan chiaidquio ma mimbi niac-niacpayoc. ⁷“Nuquin Papa tantiaquidquio nebi,” quec muaquid mibi nec. Ĕndenquimboshē Nuquin Papan chuimiac nuquin tsusedpa Isayas caidēn mimbi icsamboen tantiate chuiquin dada uapampic naden.

⁸“Isadaidbo: ‘Nuquin Papambo tantiemi,’ quepec.

Adboedēmbi ěmbi chiaid niacquin ěbi tantienquio iquec.

⁹‘Ma Nuquin Papan ěbi bēdamboen isnu,’ queboedēmbi ěbi bēdamboen tantienquio iquec.

Ĕmbi chiaidquio namenquio icquin aton matsesēn chiaiduidi namepec,”

quequin Isayasēn Nuquin Papan chiaid dada uapampic — quequin Esusēn abi chieshēnquido chushcapondash.

Ana shēcūēnuēsh choaid chiaid
(*Mad 7.14-23*)

¹⁰ Adshumbic abi isec datsidadquido ompoacbimboen chuipondash. —Tantia. Mibitedi chuinu. ¹¹ Ana shēcūēn puduedaidēn matses icsaten mimbi dampec. ¿Adquidēnda matses icsapec? Padenquio. Ana shēcūēnuēsh choaidēmbien matses icsatsiaſh —quequin Esusēn chuipondash. ¹² Adnubien abēd icquidon: — Mimbi aden chuiboed tantiashun padiseyobon mibi chieshēnosh, Icbo —caquien: ¹³ —Dacuēdenda. Icsa bescatanquin tsindoshon nēdēncacimboen ambi tantiamiabi yaido ambembi chuiquido Nuquin Papan cuideque. ¹⁴ Dacuēdenda. Padiseyobo bēshuaidbimboec icquido neque. Bēshuaidēn aton matses bēshuaid utsi bēdamboen buantiapimbo iquec. Buanuec abi shēcūē ampaēdtsiaſh. Adembidi Nuquin Papan chiaidpenquio namequin aton matses bēdamboen tantiametiapimbo iquec —quepondash Esus abēd icquido chiec.

¹⁵ Adshobien Petedon: —Mimbi ana shëcuënuësh choaid quequin chuiboed tantiambo iccombique. Aid sebadënquoio chui. Tantianu, Icbo —caquien: ¹⁶ — ¿Tantiamboda icco? ¹⁷ Chuinu. Tantia. Ana shëcuën puduedaid mimbi peboed min pucun uedoash chimute shëcuënuësh choec. Adquidën Nuquin Papan chiaid niacmenquoio iquec. ¹⁸ Matses onquiaidimbi ana shëcuënuësh choaid caoc. Abibi uquëducuësh onquec: “Adoembi,” quequin otacquio tantiaquin naic matses icsatsiash. ¹⁹ Icsambo icquido yec: “Ai, adoembi,” quequin otacquio tantiashun Nuquin Papan chiaid niactsiash nadquidën. Nëidic unës uanquid. Nëidic aton chidopenquoio chudquid. Nëidic aton bënëpenquoio chudmequid. Nëidic aben uequid. Nëidic ampequid. Nëidic muaquid. Nëidic icsamboec chuishumënquid. ²⁰ Adquidtedi: “Ai, adote bunebi” quequin otacquio tantiash icsaquid nec. Padnuen penush mëpamëdenquoio icquin Nuquin Papan chiaid niaquenquoio ictsash —quepondash Esus abëd icquido chiec.

Isadaidpembo chidon Esus tantiaid

(Mad 7.24-30)

²¹ Adanec auëshquiobi Esus nidpondash. Shubu dadpen icquid Tido caid anoentsëqui datambidanec choec shubu dadpen icquid utsi Sidon caid anoentsëqui chopondash.

²² Adnubien anocquid cananeyabo chidon Esus cuëntuidpondash. —Tsusedpa Dabidën tsyuecquid Nuquin Papan namiaid icquin ëbi bëdamboen ista. Con champi podobitsi icsa dapuduedaid yec natiambo iqueque. Con champi bëdameta —caquien ²³ Esusën ëcbedenquoio icpondash. Ëcbedenquoio yaqui chidon tsibanbanquin cuënbampondash. Adsho tantiashun Esusbëd icquidon: —Chieshanquiec cuëdpeque. Cuemepa —caquien ²⁴ Esusën cuemenquoio icquimbi aid chuiquin:

—Nuquin Papan chiacpaden Isadaidbo matsesba Nuquin Papa bēdamboen ismete tantiamenuec nebi. Bēnudac bimboec icquin Nuquin Papa tantienquo icsho aidoba tantiamenuec nebi —quepondash Esus.

²⁵ Adsho tantiash nidenquo yec chido cuēdboed Esus ismequin danēshēn sebudtsec: —Ēbi nashunta, Icbo. Con champi bēdameta —queshobien Esusēn: ²⁶ —¿Aton bacuēbo pemenquo icquimbi aton opa pemiacta bēdambo icpatsiash? Padenquo. Adembidi Nuquin Papan con matses caidotedi tantamiabi utsibo ěm̄bi nashunac icsambo ictsias̄h. Isadaidboba tantiamenuec nebi —quepondash Esus.

²⁷ Adsho tantiashun chidon: —Ai, abimbo mimbi caic. Padnuen bacuēbon pequin paēdmiaid opashēmpin petsēcquid. Adembidi mimbi comapenen tantiaquin nabanaqui isadaidbo dadpen bēdanubi isadaidpembo abentsēc tantiaquid icsho ěbi nashunquin con champi bēdameta ²⁸ —caquien Esusēn: —Ai. Ēbi tantiaquidquo mibi nec. Mimbi chiacpadec min champi bēdanendac —quesho tantianec aton shubuno nidshun isquien aton champi bēdanac Esusēn chuinubi.

Daicsaido dadpen Esusēn bēdamiaid

²⁹ Adanec auēshquiobi nidec chian dapa Cadidia caid cuēman nidquid podquedēn nidanepondash. Adashic macuēsh dapa dectatoec poctsebi tabadtuidpondash.

³⁰ Tabadtuidsho isun matses dadpenquo chochoquin daicsaido dadpen Esus ismenuen bēbēpondash. Tidinquequido yec bēshuaido yec shēquēquenquo icquido yec onquesabo yec daicsaido utsibotedi yec quenuc bē-bēpondash. Adsho Esusēn bēdamebampondash. ³¹ Bēdamiac onquenquo icboedi onquianondash. Bēshuacboedēmbi isbenondash. Capuenquo icboedi capucuenondash. Daicsaido utsibo

adecbidi bēdanondash. Adsho isquido nadpondash. —
 ¿Adquidta ictenec? Nuquin matses isadaidbon tantiaidēn
 Nuquin Papan namiaid icquin bēdamepash icnui. Nuquin
 Papa bēdambo iquec —quepondash Esusēn bēdamiaid
 tantiaish.

Matses 4000tedi pemiaid
(Mad 8.1-10)

³² Adec tabadsho isashien Esus: —Nēido tantiac
 unēsquio iquec. Ĕmbi nabansho isnuec choash 3tedec
 ushquin piac ambi bēboed pete naimēdaccosh. Ĕmbi:
 “Nid,” cac nidnuequi bunambi padishtiash. Pemiabi nid-
 metiapimbo iquebi —quepondash. ³³ Adsho tantiaishun
 abēd icquidon: —¿Midambo pete bedtiapimbo iquec?
 Pemetiapimbo matses dadpen iquec —capondash.

³⁴ Adoaquien Esusēn: —¿Tedtsi panēmpi iquec? —cac:
 —Sieteted ictsec. Nuēcquidēmpi daēdpacksēc ictsec —
 quesho ³⁵ tantiaishumbien abi datsidadquido chuiquin: —
 Nēmbo tabadbud —capondash. Adoac tabadbudpondash
 abitedi.

³⁶ Adshumbic panēmpibēdta nuēcquidēmpi bedshun
 Nuquin Papa chuipondash. —Nēid mimbi uaid bēdambo
 iquec, Papa —queshun pete cuēsh-cuēshbantsēcshun
 abēd icquido menebampondash: —Pemeban —quequin.
 Adoac abitedimbo pemebampondash. ³⁷ Aden pemi-
 abitedimbo nua cubudcuededpondash. Piacsho isun
 pequin napi uaid bedbanquin tsitsan 7ted icnuc cubu-
 cubuctsēcquio icnuc sandobampondambi. ³⁸ Esusēn
 pemiaido dadpenquio icpondash. Tambanac 4000tedi
 dada icpondash. Chido bacuēbobēdta tambanambo ic-
 condambi. ³⁹ Adashic: —Nidanec nid —quepondash Esus
 ambi pemeboedo caic. Aido nidanenubi chian budash
 cano antabēdtoshon Esusēn chian potepondash. Chian
 potiash nidaid Mactada caid yacno pudundopondash.

16

Saduseyobon: Ĕbi isme, quiaid

(Mad 8.11-13; Duc 12.54-56)

¹ Pudundoanec nidshobi anocquidon abi chiesh nquidon Esus chuituidpondash. —“Nuquin Papan chomicaid nebi,” quequin comapenen tantiaquin nabanquin  bi isme —cabededpondash padiseyobob dtan saduseyobon.

² Adshobien Esus n: —Nuquin matses n chiaid mimbi tantiec. “Inch shbudts qui abu piumbo icsho isash: ‘Tanunquio badiadec,’ quequid. ³ Badiadnubi abu inch shpambo icsho isash: ‘Ue dapa choec,’ quequid,” quequin nuquin matses n chiaid mimbi tantiec. Aden chiaid tantiacimboen b damboen tantiatiadquidi Nuquin Papan n bimbobi naid mimbi tantienquio iquec.

⁴ Icsambo icquid icquimbi mimbi: “ bi isme,” cadednepec. N bi mibi ismenquio iquembi. Nuquin Papan nuquin tsusedpa Onas chishcambiecquid dapan chebudacsho da dec ushun ucbudmiacimboec un s uacsho chococac da dec ushash uincuenendabi. Aden  bi tantiesabo ismendambi —quianec nidpondash Esus.

Padiseyobon chiaid tantienda, quiaid

(Mad 8.14-21)

⁵ Adanec nidec chian budash cano antab dtoshon chian poteoapondash. Chian potequien Esusb d icquido: —Pete nianchitombi. B tiadquidi nepobi —quepondash. ⁶ Adshobien Esus n ab d icquido chuiquin: —Padiseyob dtan saduseyobon naid pan bidiscametebimboecquid iqueque. Ista —caquien ⁷ tantienquio yec ab d icquido nadec onquecuededpondash. —Nuqui niamboed pete chiequi nepanui —quepondash. ⁸ Adsho ambembi tantiash Esus: — bi b diacts c tantiats cquid mibi nec.  Mimbi pete niamboed chiectabi nedi? Padenquio. ⁹  B shunashta mibi nepe? Pete 5tedts cboedi

ëmbi 5000tedi pemiaidën napi uaid dadpen iccondaïd ¿tantienquioda yano? ¹⁰ ¿Adembidi pete 7tedi ictsëcboedi ëmbi 4000tedi pemiaidën napi uaid dadpen tsitsanën sandoboed tantienquioda yano? ¹¹ ¿Aden comapenen tantiaquid icquimbidambi pete niamboed chuipadi? Padenquio. Pan bidiscamete pictsëc cabiunac pan abichobi nua bidisquiacbimboecquid padiseyobobëdtan saduseyobon chiaïd iquec —quepondash Esus.

¹² Aden chuisho tantiash abëd icquido nadpondash. — Pan chienquio icquimbi nuquin matses tsusiobon chiaïdshenda capec. Aïdo caic: “Icsamenda,” quepecshenda niosh. “Padiseyobon chiaïdbëdta saduseyobon chiaïd tantienda,” quepecshenda niosh —quepondash Esusbëd icquido.

Nuquin Papan Mado mibi nec, quiaïd
(*Mad 8.27-30; Duc 9.18-21*)

¹³ Adash yuectaniash puduanec nidequien Esus nidaid utsi Sesadeya Uedipo caïdën nidanepondash. Adshumbic abëd icquido chuimepondash. —Utsibon ¿tsutsi ëbi caosh? —caquien: ¹⁴ —“Uan pado acten mentoanondaidien nec,” mibi caosh. Utsimbic: “Edias cuëmëdquid Nuquin Papan ambi tantiaïd oncamïampid nepanui,” mibi caosh. Utsimbic: “Edemias cuëmëdquid Nuquin Papan oncamepampid nepanui,” mibi caosh. Utsimbic: “Nuquin Papan oncamïampid utsi nepanui,” mibi caosh —capondash abëd icquidon. ¹⁵ Adsho tantiashun Esusën: —Ma mimbibi. ¿tsutsi ëbi mimbi cao? —caquien ¹⁶ Petedo Simon caïdën: —“Quidistu caïd Nuquin Papan chomïaidquio nec,” caombi mibi. Aton Madombo mibi nec —capondash.

¹⁷ Adsho tantiashun Esusën: —Nuquin Papan aden tantiamiac mimbi bëdamboen chioc, Petedo. Onasën

mado Simon caid yec matsesien mibi nec. Adquid icquimbi matsesën tantiaid chienquoio icquin Nuquin Papan tantiamiaidquoio mimbi abimbo chioc. ¹⁸ Tantia. Êmbitsen mibi chuinu. “Cuënotebimboecquid nec,” quequin mibi Petedo cuë nondambi. “Cuënote dapa utsi ictiapimbo yac bimboec chieshtoenquoio icquid iquendac,” qeshun mibia ëbi tantiaquido chuiquid dapambo icmendambi. Adec mimbi namiaido ëbi tantiaquido iquendac. Satanasën aido: “Nëid yuanu. Utsibic chieshtomenu. Utsibic unës uamenu,” caqui abi ëbi tantiaquido iquendac. ¹⁹ Padnuc Nuquin Papan chiacpadomboen ëbi tantiaquidon nate mimbi chiendac. Adembidi ëbi tantiaquidon natemaidtsen mimbi chiendac —quepondash Esus Petedo chiec.

²⁰ Adashic abëd icquido abitedi chuioaic: —“Nuquin Papan chomiaidquoio nec,” quequin utsibo ëbi chienda —quepondash Esus.

*Abi unës uate Esusën chiaid
(Mad 8.31-9.1; Duc 9.22-27)*

²¹ Adshumbic tauaquin abi unës uate chuidondash. —Shubu dadpen icquid Edusaden caid yacno nidendabi. Anoshon nuquin matsesën ëbi chieshënquiendac nëidtedshun. Nëidic tsusiobon. Nëidic nëish yua abided unës uaquido chuiquid dapabon. Nëidic Moisesën dada uampid chuibanquidon. Aidtedishun mëyanquoioquin ëbi unës uamendac. Adoacsho chococac daëdec ushash uincuenendabi —quequin chuisho ²² tantiaishun Petedon uanotantsëcquin tsadumbudshun Esus chuipondash. —Unësquoio icnuc mimbi chieque. Aden chienda. Ma mibi unës uatiapimbo icpayoc —capondash Petedon. ²³ Adoaquien Esusën: —Satanasën oncamiac Petedo adec onquec —qeshun Petedo isquin Satanas chushcapondash naden. —Cuen, Satanas. Nuquin Papan chiaid mimbi

ëbi niacmetiadquio iqueque. Cuen —quetanec Petedobi chiec: —Matsesën tantiaid chuiquimbi Nuquin Papan tantiaidquio mimbi chienquio iccoc —capondash.

²⁴ Adashic abëd icquidotedi chuioaic: —Ëbi tanti-aquidon aton nauidi nainquio icquin ëmbi chiacpadom-boen natsiash. Adsho chieshëmëncquidon: “Unës uachitomane,” cac chieshtoenquio icquin ëbi tantiat-siash. Adquid ëbi tantiaquidquio nec. ²⁵ Padnuen ëbi tantiat-sëcquid: “Esus tantiashe unës uachitoshe,” quiashe ëbi tantienquio yanec unësash Nuquin Papan cuidaidobëd nidendac. Padnuen chieshtoenquio icquin ëbi tantiaquid Nuquin Papa yacno tabadendac. ²⁶ ¿Nuquin Papa tantienquio yec tabadecta matses bëdambo icpatsiash? Abi bunaidtedi bedquin Nuquin Papa tantienquio yec unësash ¿mitsimbo tabadpatsiash? Nuquin Papabëd tabadte bunquin ¿atotsi menepatsiash? ¿Piucquid meniashta Nuquin Papa yacno tabadpatsiash? Padenquio. Adotiapimbo iquec. ¿Atoda meniantiapimbo iquec? ²⁷ Ëmbien matses cuidte chiendac. Nuquin Papa yacnuësh ambi abi yacnoshon uaido mayan bëdabobëd cho-choshon Nuquin Papan abitedishun icbo icmiaid icquin matses cuidte chiendambi. Nuquin Papa tantiec bëdamboec tabadquid Nuquin Papabëd tabadmequin Nuquin Papa tantienquio yec icsaquido icsano nidmendambi. ²⁸ Tanta. Chuinu. Utsi-utsiec unësabi icquin ëbi tantiaquido dadpen yansho mimbi isendac —quepondash Esus.

17

*Esus bëchamauanquiecsho isaid
(Mad 9.2-13; Duc 9.28-36)*

¹ Aden chiashe 6tedec ushanec nidquimbi Esusën abëd icquido 3tedtsëqui buampondash. Petedo yec Acobo yec Acobon buchi Uan yec quetsëcnuc buanash

macuësh dapa dectatoash mananënquo tabadtuidpac caondash. ² Tabadtuidshun isquien Esus utsiac bimboec isadpec. Aton dashcutebēdi aton bētantete ushēbimboec bēchamauanquiec yanac caondash.

³ Esus bēchamauanquiec icnubien dada utsi daēd isad-cuenash Esusbēd onquiampac caondash. Abentsēc Moises yampid icnubi utsi Edias Nuquin Papan ambi tantiaid oncamiapid icpac caondash. ⁴ Adsho isashien Petedo: —Mibi adec tabadsho isash bēdambo iquebi. Mibi nēmbobi tabadmenun abentsēc chotsecnuc shubumpi uatsēc nuna, Icho. Mitsana natsēcquinc Moisesēn na natsēcquinc Ediasēn na natsēcquinc canuna. ¿Ada bēda icpec? —quenubi ⁵ abu ushu bēchamauanquiec icquidēn isadenquo icnuc bētimpac caondash. Adnubien abu ushu nēnantanuëshquo Nuquin Papa onquiampac caondash. —Nēid con Madombo nec. Ēmbi tantiaidquo yec ēmbi bēdamboen isaidquo neque. Nēidquo tantiaata —quec dacuēdampamboec onquenubien ⁶ uinte paēdtampamboec dacuēdtanec uebudcuededpac caondash Petedo chedo.

⁷ Adshobien Esusēn camishquin: —Dacuēdenda. Nidto —cac ⁸ nidtoquin isquien Esus abentsēqui iquec.

⁹ Adtanec macuësh budequi Esus: —Mimbi isboed nēbi utsibo chienda. Unēs uac ēbi uincuenacsho isun chianta —quepac caondash abēd icquido chiec.

¹⁰ Adsho tantiaish Petedo chedo: —“Nuquin Papan chomiaidquo nec,” quequin nēbi mibi tantiembi. Mibi adquid icnuc ¿mitsipadquid nuquin matses tsusiobon chuiposh? Nuquin Papan chiaid isash: “Nuquin Papan chomiaid choabi icnuc Edias yampidba choendac,” quepequien iccosh —queshobien ¹¹ Esusēn: —Abimbo chiosh. “Edias yampid bēyuc choshon: ‘Nuquin Papan chomiac bēdambo icquid choeque. Bēdamboec tabadta,’ quequin

chiendac,” quequin abimbo chiosh. ¹² Adquid Ediasbimboecquid chondash. Choacsho tantienquo icquin masesën abi bunacpaden unës uapac caondash. Adembidi Nuquin Papan chomiaid icsho ëbitsen chieshënquin unës uaindac —quesho tantiashien: ¹³ —“Ediasbimboecquid nec,” quequinshenda chuiposh. Uan pado acten mentoanded caquinshenda Edias capec —quepac caondash Petedo chedo.

*Madompi dapuedaid podobitsi icsa cuemiaid
(Mad 9.14-29; Duc 9.37-43)*

¹⁴ Bëchamuanquiecictanec choequi abëd icquido ut-sibo yacno choquin matses dadpen aido datsidadacsho Esusën istuidpondash. Adec Esus chosho isumbien unësanetsëcquidën papan Esus ismequin danëshën sebudshun chuipondash. ¹⁵ —Con mado bëdamboen isquin bëdameta, Icbo. Baded-badedquieci unësanec cuëten pichiquianec. Adecbidi unësanec acten mentoadtsenacosh. ¹⁶ Mibëd icquidon bëdamete danquin bëuidombi. “Në bëdame,” cac bëdamenuen tanuidosh. Bëdamenquio iccoshe. Mimbimbo bëdameta —caquien ¹⁷ Esusën ambo icquidotedi chuipondash. —Ëmbi nadatiambo icquin nabanquin ismiaqui mimbi ëbi tantienquo iquec. Adsho isash chieshtoash cuentiadquo icchitebi. Adtiadquo yequi padenquo iquec nebique. Min mado beccho —cac ¹⁸ bësho istanquin Esusën podobitsi icsa chushcapondash. —Padi. Daicsa uainda —cac podobitsi icsa cuenubi madompi bëdampondash.

¹⁹ Adsho isun abëd icquidon Esus chuipondash ut-sibo tantiamenquo icquin. —Ëmbi: “Cuemenu,” cac çatotsi quiaish podobitsi icsa cuenenquo icposh? —caquien: ²⁰ —Nuquin Papa bëdamboen tantiaquin mimbi bëdamboen natsenoc. Mimbi bëdiactsëc tantiatsec. Pete

ëshëmpi mostasa caid pistsëcquidi siac nua yec canit-siash. Adecbidi Nuquin Papa tantiatsëcboedi: “Ambi natiapimbo ictequid nibëdec,” quequin abimbo tanti-aquidquio yanshun comapenen tantiaquidbimboec mibi ictsiac. Adquidën nëid macuëshquiobi cain: “Uquë manëd,” cac manëdtsiash. Aden mimbi: “Ëbi bëdamboen nameta, Papa,” quequin Nuquin Papa chianiac aidëmbi mimbi: “Ëmbi natiapimbo ictequid nec,” caid mibi bëdamboen nametsiash. ²¹ Nëbi ëmbi cuemeboed abembi cuentiapimbo icquid nec. Nuquin Papauidi tantianuen buna mëmunquin Nuquin Papa chianeshun adquid cuemequid —quequin Esusën chuipondashi.

*Abi unëste Esusën chuioaid
(Mad 9.30-32; Duc 9.43-45)*

²² Adanec aton nidaid Cadidia yacnobi capucuenequimbi Esusën abëd icquido chuipondash. —Ëbëd icquid abentsëcshun ëbi chieshënquido ëbi bedmendac. ²³ Bedshun ëbi unës uamendac. Aden unës uamiacsho chococaquini daëdec ushash uincuenendac —quesho tantiatanequien abëd icquido: —Unësquio icnuc chiec —quiaish shubiantiadtsëcquio icpondash.

Chuiquid dapa menetequid piucquid Petedon istuidaid

²⁴ Aden chianec nidequi shubu dadpen icquid Caped-naun caid yacno Esus chopondash. Adnubien Nuquin Papa tabadte shubu uashunaid nacnemenuequin piucquid bedquidon Petedo chuituidpac caondash. —Nuquin Papa tabadte shubu uashunaid nacnemenuen ¿ada min icbon dos dada uatsaid piucquid shocoshëmpi abentsëc menepatsiash? —cac ²⁵ Petedo: —Ai, menetsiash —quepac caondash. Adanec nidec shubun puduedshobien Esusën ambia Petedo chuipondash. —¿Atotsi mimbi chie, Simon? Aton matsesën na nacnemenuen ¿tsutsi chuiquid dapabon piucquid bedshumpec? ¿Ada aton matses

piucquid bedshumpec? Aido bedshunenquio icquin ¿ada ambi bedaido aton yuabo piucquid bedshumpec? — caquien ²⁶ Petedo: —Ma aton yuabo bedshumpaid yoc. Aton matses piucquid bedshunenquio iquec —quesho tantiashien: —Adembidi aton Mado icsho aton shubu nacnemenuen Nuquin Papan ěbi bedshuntiapimbo iquec. ²⁷ Aden tantiaquimbi: “Nĕishnushe,” queshun menenun nanuna. Chianĕn ansemetan. Tauaquin ansemiaidi ancanshun anisquin 4 dada uatsaid piucquid shocoshĕmpi abentsĕc mimbi istuidendac. Aid bedshun piucquid bedshumĕnquido menetanta. “Nĕ con icbon nabĕdi con na nec,” quequin menetanta —capondash Esusĕn. Adoac Petedon Esusĕn chiacpadomboen menetampac caondash.

18

¿Mitsicquid chuiquid dapa mimbi icmepatsia?

quequin chiaid

(Mad 9.33-37; Duc 9.46-48)

¹ Adshumbic abĕd icquidon Esus chuipondash. — Abitedishun Icbo icquin matses mimbi namendac. Ĕbi chedo caic ¿mitsicquid mibĕdtan chuiquid dapa mimbi icmepatsia? —quesho ² tantiashun abi tabadacno nĕnantanquio bacuĕ tsaduntsĕcshun Esusĕn chuipondash. ³ —Tantia. Mibi chuinu. Mitsanauidi tantiec Nuquin Papan namiaid mibi ictiapimbo iquec. Mitsanauidi tantiaboedi nadquid bacuĕn amĕn chiacpadomboen nacbimboen ěbi tantiaquiota. Adash ambi namiaid yanash Nuquin Papa yacno mibi puduedendac. ⁴ Aden ěmbi chiacpadomboen naquidquio icsho mibi Nuquin Papan: “Bĕdamboshĕ iquec,” caindac. ⁵ Nadquid bacuĕbĕdta ěbi tantiabentsĕcquid bĕdamboen tantiaquidĕn ěbitsen bĕdamboen tantiendac —quepondash Esus.

Tantiabentsēcquido icsamete chiaid

(Mad 9.42-48; Duc 17.1-2)

⁶ Adshumbic padpiden chiec: —Ĕbi tantiabentsēcquid caic: “Nuquibi Nuquin Papan chiaid niac-niacquiec icsaquionona,” quequid Nuquin Papan cuidendac. Icsamiabi yec unēsacsho isun: “Bēdambo iquec,” catsiambi. “Cuēnote yuēmboshē icquid tēdectanshun acte nēnepatecnēdan,” caimbi icsamiente bunquidquio. ⁷ Aden Ĕbi tantiatsēcquid utsibon icsamendac. Adec icsamianquid Nuquin Papan cuidendac.

⁸ Aden Nuquin Papan cuidte chuisho tantiequi icsainda. Mēdanten naic mibi icsaic. Mēteshuniac bedtiapimbo yac bimboec icsainquio yec ĕnēdta. Taēn capuec mibi icsaic. Tateshuniac caputiapimbo yac bimboec icsainquio yec ĕnēdta. Ĕnēdenquio icsho Nuquin Papan mibi cuidendac. ⁹ Adecbidi ĕshēn isec mibi icsate bunquiec. Ĕshē chicshuniac bimboec icsainquio yec ĕnēdacsho: “Bēdambo iquec,” catsiambi. Ĕnēdenquio icsho Nuquin Papan chian anēdēnquiacno nēsecaindac —quequin Esusēn chuipondash.

Matses Ĕbi tantiamete Nuquin Papa bunaid

(Duc 15.3-7)

¹⁰ Adashic padpidec: —Nadquid bacuēmpin Ĕbi tantiatsēcsho isun: “ĶAdtsēcquidēmpin quibida bēdamboen tantiapec?” cainda. Nuquin Papan abi yacnoshon uaid mayan bēda aid bacuēbo dayun uaquid icquin Nuquin Papa yacno puduedshun mimbi mamēnshumboed Nuquin Papa chuinushe. Adtsēcquidēmpi mamēnshunenda. Ĕbi tantiabentsēcquido con Pan tantiaquieque. ¹¹ Ĕmbitsen aido tantiemi. “Bēnudaid istu idac bimboen Ĕbi tantienquio icquidobi Ĕbi tantiaquido icmenu,” quiash matsesondabi —quepondash Esus.

¹² Adashic padpidec: —¿Mitsipadquio nuquin matses icpec? Nēish yua obeca dadpen 100ted dayun uaquidēn aton yua tambanac abentsēc nibēdsho istanquin utsitedi nianshun aid abentsēc nibēnbenequin istuidquid. ¹³ Aden istuidash comapenec cuishonquequid: “Con yua nibēdantsenquiac,” quiash. Aton yua utsi yacno bēash abi icboctedi icsho isash bēdambo icquid. Adecbidi matsesēn ēbi tantiabensho isash Nuquin Papabēd cuishonquebi bēnudaaid istuidacimboec. ¹⁴ Icsaido cuidacno matses nidmete Nuquin Papa bunenquio iquec. Matses bēdamboen isquin abēd tabadmete Nuquin Papa bunquiec —quepondash Esus.

Chieshēnquidobēdi onquete chiaid

(Duc 17.3)

¹⁵ Adashic padpidec: —¿Ada ēbi tantiaquid utsin mibi icsa uaosh? “Ai, icsa uaoshi. Chieshēmiantiadquio icchitosh,” qeshun nadoac bēdambo ictsiash. Aid abentsēqui chuiquin aidbēd bēdamboec onquequin: “Ēbi icsa uaquin Nuquin Papan chiaid mimbi niacniaccoc. Adec icsainquio yec ēnēdta,” mimbi cac: “Ai, adebi,” quiash mibēdi bēdamboec tabadtsiash Nuquin Papa tantiesabimboec icuidboedi. ¹⁶ Mimbi: “Icsainquio yec ēnēdta,” caqui: “Padi. Adequi icsaibi,” qesho tantishun ēbi tantiaquid utsi beduanshun aidbēdtan chuitanta. “Nuquin Papan chiaid niac-niacsho isun daēdshun chiaid abimbo chiaid nec,” quequin chiaid tantiaquin adota. ¹⁷ Mimbi buanaidēntsen: “Adec icsainda,” caqui: “Adequi icsaibi,” qesho tantiatanec choashun mibēdtan ēbi tantiec iccuededquido chuiquido chuituidta. “Mimbitsen chuitanta,” cac aidontsen chiaqui tantienquio icsho isun: “Nuquin Papan chiaid niacniacquid yec Esus tantiesabimboecquid nec,” qeshun ēbi tantiaquido cuēdēnacno chomenda. ¹⁸ Aden mimbi: “Esus

tantiesabimboecquid neque. Cuëdënacno chomenquio ictiad,” casho Nuquin Papan: “Bëdamboen naic,” mibi catsiash. Adembidi mimbi: “Adec icsaboedi icsainquio yec ënëdsho isun cuëdënacno chomeoanuna,” qeshun chomeoasho Nuquin Papan: “Bëdamboen naic,” catsiash.

¹⁹ Padpiden chuinu. Tantia. Mimbi: “Nuquin Papa chuinuna,” cac: “Ai, adonona,” qesho tantiashun aidbëdtan mimbi Nuquin Papa chianiac mimbi chiacpadomboen Nuquin Papan natsiash. ²⁰ Èbi tantiec daëd tabadnuc aidbëd con Mayan yec ëbëd yacimboec tantiadendac. Adec tabadsho isun: “Con Mado tantiaquido nec,” qeshun aidon chianiaid Nuquin Papan tantiendac.

Yuan bëdamboen istiapimbo yaid

²¹ Adec: —Icsa uanec chieshtomiantiadquio iquec — Esus qesho tantiashumbien Petedon Esus chuipondash. —¿Icsa uanec chieshtomianquid tedentsimbi chieshenquio icquin bëdamboen ispe? Chieshënquin padpiden icsa uac ¿padpidendambi bëdamboen isoape? ¿Mëdante utsiuc daëd tauadoquin sietetedembi nashun padpiden bëdamboen isenquio icquin ënacta bëdambo icpatsiash? —caquien ²² Esusën: —“Mëdante utsiuc daëd tauadoec sietetedi” quequin daëdpactsëcquio mimbi chuipec. 70 por 7 caid ¿tedtsi icpec? Aidteden 490tedembi ënenquio icquin bëdamboen isoadoniac bëdambo ictsiash — quepondash Esus.

²³ Adashic abi onquec: —Nuquin Papan chiacpadomboen matses bëdamboen iste mibi chuinu. Tantia. Tsusion yuabo dadpen icpac caondash. “Ma bënu,” quequin ambi meniactedi piucquid bednuen aton yuabo aton shubuno chomepac caondash. ²⁴ Abia chomiaidën piucquid dadpenquioshë bedshun aton icbo meniambo icpac caondash. ²⁵ Adsho icbon: “Mimbi bedactedi beccho,” cac: “Nibëdec,” quepac caondash yua. Adshobien icbon:

“Aidtedi piucquid bednuen matses utsibo mibi yuamenu. Min chido min bacuëbobëdtabi cuësh-cuëshëdmeshun aidtedi piucquid bednu. Mibi icsambo iqueque,” cac ²⁶ yua abi yuaquid ismequin danëshën sebudash: “Padi. Èbi yuamenuen cuësh-cuëshëdmenda. Chiata. Yuecshun aidtedi bedshun mibi menenun nanu,” capac caondash. ²⁷ Adoquien icbon bëdamboen isquin: “Padi. Èbi menenda. Mibi utsibo yuamenquo iquembique. Dacuëndenda. Nidec nid,” quequin icbon aton yua bëdamboen nidmepac caondash.

²⁸ Adoac nidquimbien aid yuan icbon bëdamboen isboedën ambi: “Ma bënu,” quequin piucquid daëdpactsëc meniaid yua utsi istuidpac caondash. Istuidshumbic bedtanquin tëtëdinquin: “Mimbi bedactedi piucquid beccho. Unës uachitomane,” caquien ²⁹ aidtsen ambi piucquid bedshunondaid ismenuen danëshën sebudtsec: “Chiata. Èbi unës uainda. Yuecshun bedshun mibi menenun nanu. Chiata,” quepac caondash yua utsi. ³⁰ Adsho tantiashun icbon bëdamboen isboedëmbi chieshënquin: “Padi. Mibi cuidmembi,” qeshun quënën nauedmepac caondash. “Piucquid aidted abi menianenquo yacpadequi ma quënënuësh mëyadbudchitono,” qeshun nauedmiac caondash.

³¹ Aden chieshënquin quënën nauedmiacsho isumbien yua utsibon: “Chieshanquiec,” qeshun icbo chuituidpac caondash. “Mimbi bëdamboen isboedëmbi min yua utsi quënën nauedmiac: ‘Piucquid menianenquo iquec,’ qeshun,” quequin icbo chuipac caondash. ³² Adsho tantiashun icbon ambi cuidenquo icquin bëdamboen isboed chomeshun chushcapac caondash. “Icsambo icquidquo mibi nec. ‘Chiata. Mibi menenun nanu,’ mibi qesho: ‘Padi. Èbi menenda,’ quequin mibi bëdamboen isombi. ³³ ;Èmbi mibi adobocpadomboen utsi bëdamboen

istiapimboda icco? ‘Ma bënu,’ qeshun mimbi meniatedi bëabi icsho bëdamboen isec mibitsen bëdambo ictsenac. Mibi yacpadec nëishun mibi cuidembi,” quepac caondash icbo. ³⁴ Adshun quënën nauedmepac caondash. “Ambi bedactedi piucquid dadpenquo meniash ma puduempantu,” qeshun quënën nauedmiac caondash. ³⁵ Aden matses yuan icbon nacpadomboen Nuquin Papan naindac. Utsibon chieshënaqui chieshënanasho Nuquin Papan mibi bëdamboen istiapimbo iqueque. Chieshënanenda. Mibi chieshënidobi bëdamboen ista — quepondash Esus.

19

Chidobëd cuëshëdte Esusën chiaid (*Mad 10.1-12; Duc 16.18*)

¹ Adanec nidaid cuëshë Cadidia caid yacnuësh puduanec nidec nidaid cuëshë utsi Udeya caidën nidquin acte Odan caid potebidanec Esus nidpondash. ² Adec nidshobien matses dadpenshun tsibanampondash. Abi tsibanansho isun nidtuidshun daicsaidtedi Esusën bëdamepondash.

³ Adnubien tsusedpabon chiampid namequido padiseyobon chieshënuquin: —Nuquin Papan chiaid niacmenu — quequin Esus chuituidpondash. —¿Atotsi mimbi chuipe? Dada uashun aton chidobi nidmete ¿mitsipaden mimbi chuipe? En chui. Tantianu —capondash.

⁴ Adoaquien Esus: —¿Nuquin Papan chiaid isamboda ictio? “Nuquin Papan dadaba uashun aton chido uapampic,” quequin dada uaid ma mimbi ispaboc. ⁵ Adembidi: “Dadan canite chido uaid icsho dadan aton chido bedquid. Amë chedobëd icboedi aton chido bedash aid nianenquo yec aibëd tantiananquiec dada aton chidobëd abentsëc yacbimboec tabadquid,” quequin

dada uaid ma mimbi ispaboc. ⁶ Aden Nuquin Papan tantiacpadomboen aton chido nianenquio yec aibdëdi tantiananquiec abentsëc yac bimboec tabadac bëdambo ictsiash. Padnuen aton chido nianec aibdëdi cuëshëdquin Nuquin Papan chiaid niactsiash. Adecbidi chido aton bënë nianec icsaquid —Esus quesho ⁷ tantiashumbien abi chieshënquidon: —¿Abimboda mimbi capadi? Nuquin Papan chiaid dada uaqin ¿atotsieshun Moisesën naden chui pampic? “Aton chido bunenquio yanshun dadan naden dada uashun menequid. ‘Mibi intiapimbo yanobi,’ quequin dada uashun aton chidobi menequin nidmequid,” quequin Moisesën dada uapampid ma icpayoc —quequin chui pondash Esus chieshënquidon.

⁸ Adsho tantiashun Esusën chui pondash. —Ai, Nuquin Papan chiacpadec aton chidobëd bëdamboec tabadtiapimbo icsho isun Nuquin Papan Moises aden dada uamepampic. Tauamboen matses uaqin Nuquin Papan aden chiambo icpampic. ⁹ Tantia. Mibi chuinu. Aton chidobëd cuëshëdshun chido utsi bedquin Nuquin Papan chiaid niactsiash. Padnuen aton chidon bënëpenquio chudmesho istuidash aibdëd cuëshëdquin Nuquin Papan chiaid niaquenquio ictsiash —quepondash Esus.

¹⁰ Adnubien abëd icquidon: —Adotiapimbo icte mimbi chuipec. Aton chidobëd cuëshëdenquio icte mimbi chuisho tantiashun: “Aton chido bedesambo dada bëdambo ictsiash,” caimbi —quepondash abëd icquido.

¹¹ Adsho tantiash Esus: —Ai, utsi-utsiec pabiate shëcuë nibëdabimboen ëmbi chiaid tantiatiapimbo iquec. Utsiboen aton chido bedash Nuquin Papan chiacpadec bëdamboec tabadquid nec. ¹² Utsibic mimbi chiacpadquid chido bedesa iquec. Nëidtedi chido bedesa iquec. Nëidic aton padibi impadishtsaid. Nëidic matsesën inicsa uaid. Nëidic: “Nuquin Papan yuambo icquin aidën

chiacpadomboenuidi naquin chido bedtiapimbo iquebi,” qeshun chido bedesa. Adquidtedi chido bedesa nec. Ĕmbi chuiboed tantiashun Ĕmbi chiacpadomboen nac bĕdambo ictsiash —quepondash Esus.

Esusĕn bacuĕbo chiaid
(*Mad 10.13-16; Duc 18.15-17*)

¹³ Adnubien Esus ismenuen bacuĕbo bĕ-bĕpondash. — Mamishquin ma Nuquin Papa Esusĕn chuinu —quequin bĕ-bĕsho isumbimbi: —Padi. Bĕenda —cauidpondac. ¹⁴ Adshobini Esusĕn: —Chĕn. Ma bĕnu. Cuemenda. Bacuĕbimboecquid Nuquin Papa yacno puduedtequid nec. Amĕn chuisho tantiash bacuĕ badedi: “Abimbo caic,” quiacimboen ĕbi tantiaquid Nuquin Papa yacno puduedtequid nec. Bacuĕbo bĕdambo iqueque. Beccho — cac bĕ-bĕpondash. ¹⁵ Adshobien mamishbanquin Nuquin Papa chuipondash. Adobidanec nidondash Esus.

Cania aton na dadpenquo dayun uaquid Esusbĕd onquiaid
(*Mad 10.17-31; Duc 18.18-30*)

¹⁶ Adnubien dada caniampinquo Esus chuituidpondash. —Mibi bĕdambo iquec. Bĕdamboen chuiquidquo mibi neque. Ĕbi chui. Padpidec unĕstiapimbo icquid icmenun bĕdambo icquid Nuquin Papan abi yacno puduedmetsiash. ĤAtotsi nasho Nuquin Papan ĕbi bĕdambo capatsiash? —caquien ¹⁷ Esusĕn: —ĤMitsipadquid bĕdambo icquid cai? Nuquin Papauidtsĕqui bĕdambo icquid nec. Aidbĕd tabadnuen ambi Moises dada uamiampictedi nata —capondash. ¹⁸ Adoquien cania: —Nuquin Papan chiaid Ĥmitsipadquid cai? —quesho tantiashumbien: —Naden chiaid caimbi. “Cuesunenda. Min chidopenquo chudenda. Min bĕnĕpenquo chudmenda. Ampenda. Muainda. ¹⁹ Titabĕdta papa chieshĕnenquo icquin bĕdamboen tantiata. Adembidi mibibi datantiadacimboen matses utsi abitedi tantiaquiota,” quequin chiaid caimbi

—capondash Esusën. ²⁰ Adsho tantiash cania: —Aidtedi niaquenquo icquin nabanquidquo nebi. Bacuëctšëc icquimbi tauaondambi. “Nuquin Papabëd tabadnuen ¿atotsimbi utsi nape?” caimbi —quepondash.

²¹ Adsho tantiashumbien Esusën: —Nuquin Papan chiaid niaquesambo ictiadquo icquin mimbi dayun uaidtedi uesquin menequin piucquid bedta. Piucquid bedshun piucquid nibëdquido min piucquid uesquin menebanta. Adsho abëd tabadmenun Nuquin Papan mibi bëdamboen istsiashe. Adota. Adotanequic ëbëd iquec cho —caquien ²² cania: —Con na dadpenquo icsho uesquin meneti-apimbo iquebi —quiash shubiantiadtsëcquo ictanec nidpondash Esusën chiacpadomboen natiapimbo yec.

²³ Adsho isun Esusën abëd icquido chuipondash. —Chuinu. Tantia. Aton na dadpen dayun uaquid aton na tantiequi: “Nuquin Papa yacno tabadte bunebi,” queboedëmbi ëbi tantiatiapimbo iquec. Aton nauidtsëqui tantiec. ²⁴ ¿Ada nëishamën pinchuc chichte ancumpadic? Padenquo. Adecbidi aton na dadpenquo dayun uaquidën aton nauidtsëqui tantiaquin ëmbi chiacpadomboen natiapimbo yec Nuquin Papa yacno tabadtiapimbo iquendac —quequin Esusën chuipondash.

²⁵ Adec: —¿Ada nëishamën pinchuc chichte ancumpadic? —quesho tantiashien abëd icquido nadpondash. —¿Tsudain Nuquin Papa yacno puduedtequid icchitotsiash? Nibëdchitequien iquec —quesho tantiashumbien ²⁶ Esusën abëd icquido bëisquin naden chuipondash. —Matses namiantiapimbo icnuc Nuquin Papain namianquidquo nec. Ambi natiapimbo ictequid nibëdec —quepondash.

²⁷ Adsho tantiashun Petedon: —Mimbi: “Nuquibi icnu. Cho,” cac con na abitedi nianec mibëd icnuec chopondabi.

¿Mitsimbo tabadtequidini nepe? ¿Atotsimbi nape? — caquien ²⁸ Esusën: —Tantia. Mibi chuinu. Nuquin Papan ambi uaid abitedi chuca uabocnoëshquio ëbëdtan chuiquid mibitedi iquendac ëmbi abitedi namiacnuëshquio. Ëbëd icquido icsho isun Nuquin Papan mibi chuiquid icmendac. Nuquin tsusedpa Acobon mado ¿tedtsi icpampic? Aidedi 12tedshun tsyuecquidon shubu 12tedi shubun-shubunquiec chuiquid dapabo mibitedi iquendac. ²⁹ Utsibontsen ëbi tantiendac. Aton shubu nianquinc abëdta tishaido nianquinc aton tita nianquinc aton papa nianquinc aton bacuëbo nianquinc aton tied nianquinc cain ëbi tantiaquin ëmbi chiacpadomboen naquid iquendac. Adsho nëbi unësabi icsho ambi nianaidobëd tabadac bimboecnuc bëdambo icmendambi. Adoshombic unësacsho Nuquin Papa yacno tabadmendambi padpidec unësenquio icnuc. ³⁰ Nidaidënuësh chuiquid dapambo icboedi Nuquin Papa yacnuësh utsi-utsiec chuiquidpenquio iquendac. Utsibic nëuëshquio chuiquidpenquio icboedi Nuquin Papa yacnoshon: “Bëdambo icquid nec,” quequin chuiquid dapa icmendac —quepondash Esus.

20

Chonoadquido chiaid

¹ Adshumbic abëd icquido Esusën ompoacbimboen chuipondash. —Tantia. Ëbi tantiaquido Nuquin Papa yacnoshon namete mibi chuinu. Badiadnubi tied icbon piucquid menequin aton tied neshcamenuen matses istuidpac caondash. ² Istuidshumbic: “Badiadnubi tauashun ushë budtsambi mimbi ënacsho nëidtedi piucquid mibi menenu. Naic cho,” cac chonoadec cho-chopac caondash. ³ Ushë abucquio yanubi tied icbon pete meni-acno nidshun utsibo nainquio yec samëdsho istuidpac caondash. ⁴ Adoshombic aidotsen chuiquin: “Con tied

neshcaic cho. Mibi bēdamboen cuidquin menenu,” cac ⁵ tied neshcaic nidpac caondash. Ushē cuembo icnubi tied icbon padpidec pete meniagno nidoashun utsitsen istuidshun adembidi aton tied neshcamepac caondash. Ushē budambic padpiden utsitsen. ⁶ Inchēshbudtsēqui nidoaquin utsibo nainquio yec samēdsho istuidoashun: “¿Atotsi quiash samēduidequi ique?” cac ⁷ samēdquido: “Chonoa uanquid nibēdosh,” quesho tantiaashun tied icbon: “Mimbitsen con tied neshcaic cho. Mibi menenu,” cac tied neshcaic nidaneopac caondash inchēshbudtsēqui neshcaquin tauaic.

⁸ Inchēshtsēcñubi tied icbon ambi chonoa uaido isquid chuipac caondash. “Chonoadquido piucquid meneban. Tsyuec choboedba menequin tauatanquin ushē budambi choboedotsen meneta. Adoshombic ushē cuembo icnuc choboedotsen. Adoshombic ushē abuctoan choboedotsen. Adoshombic badiadnubi abia choboedo ēnquimbi meneta,” cac menequin tauapac caondash. ⁹ Inchēshbudtsēqui chonoadec choboedoba menequin badiadnuc chonoadec taēboed tied icbon: “Menenu,” cact-edquio piucquid menepac caondash.

¹⁰ Adosho isashien badiadnubi choboedo: “Aido aden meneshun nuqui chonoadquioboed yuapambo nuqui menec,” queshobi aidtedtsēcbidi piucquid menepac caondash. ¹¹ Aidtedtsēcbidi meniaquien tied icbo chushcapac caondash. ¹² “Tsyuec chonoadboed meniactedtsēcbidi menioshi. Icsambo iquec. Inchēshbudtsēqui chot-sash daēdpactsēc chonoadtsēcquid meniactedtsēc yuec chonoadquid piucquid meniac icsambo iquec. Chun mēyadec yuecquio chonoadobi. Aidtedtsēc menianec mibi chieshanquieq iquec. Ēbi dadpen meniac bēdambo ictsiash,” quequin chushcapac caondash.

¹³ Adoaquien tied icbon: “¿Chieshanquiectabi ique? Ēmbi: ‘Nēidted piucquid menenu. Naic cho,’ cac ma

mibi: ‘Ai,’ quepaboc. Mambi mibi aitedquio menepaboc.
¹⁴ Mimbi bedboed buanec nid. Èbi bunacpaden tsyuec
 choash chonoadquid mibi meniactedquiobi meniombi.
 ¿Icsamboda iquec? ¹⁵ ¿Icbon ambi tantiacpadomboen
 aton na dadpen meniac ada aid icsambo icpec? ¿Ut-
 sibotsen menesho isunda mimbi èbi nëishëmpe? Aden
 nëishënac ¿ada bédambo iquec?” quequin tied icbon
 chuipac caondash —quequin ompoacbimboen chuipon-
 dash Esusën. ¹⁶ Adashic: —Adembidi abi yacnoshon ambi
 tantiacpadomboen Nuquin Papan naindac. Utsi-utsien
 chuiquid dapa icmequin utsi-utsien padenquio icmendac
 —quequin chuipondash Esusën.

Abi unëste Esusën padpiden chuioaid
 (Mad 10.32-34; Duc 18.31-34)

¹⁷ Adanec: —Edusaden yacno nidnu. Nid —quianec
 Esus nidpondash. Adec nidquimbi utsibo tantiamenquio
 icquin abëd icquido 12tedi icquid chuinuen uanotantsëc-
 quin buampondashi. ¹⁸ Buanshun chuipondashi naden:
 —Edusaden yacno nidacsho Nuquin Papan matsesmiad
 icsho èbi chieshënquido èbi bedmendac. Nëish yua
 abided unës uaquido chuiquid dapabobëdtan Moisesën
 dada uampid chuibanquidon èbi bedshun: “Ma unës ua-
 menu,” qeshun ¹⁹ matses utsibo isadaidpembe èbi bed-
 mendac. Aden bedmiac matses utsibon mamënshunquin
 èbi cueshcaten comapenen cueshcaindac. Adshumbic
 èbi unës uanuen cuesten dectanendac. Aden unës uaqui
 daëdec ushash uincuenendabi —quequin Esusën abi unës
 uate padpiden chuioapondashi.

Uanën titan chiaid
 (Mad 10.35-45)

²⁰ Adnubien Sebedeyon chido Uanën titan Esus chui-
 tuidpondash. Uambëdta Acobo aton mado daëdi bëshun

ismequin danëshën sebudtanquin chuipondash. —Ëmbi chiacpadomboen ëbi nashunta, Icbo —caquien: ²¹ —¿Atotsi cai? —capondash Esusën. Adoaquien: —Nëid con mado daëdi nec. Abitedishun icbo icquin mibëdtan chuiquid dapa con mado abi daëdi icmeta. Chuiquid dapa icmequin min dayun tsadmeta. Opioc utsi tsadunquin abiuc utsi tsadunta —caquien Esusën: ²² —Ëmbi naid tantienquo icquin mimbi chuipec —quequin ani chuishumbic Uanbëdta Acobo Esusën chuipondash. —¿Ada ëbi mëyadacpadquiecbidi mëyadtsia? ¿Ada chieshtoenquo icpatsia? —caquien Uan: —Ai, chieshtoenquo ictsiabi. Mibëd mëyadtsiabi —quepondash.

²³ Adsho tantiaquien: —Ai, ëbi tantiaquid yec mibi mëyadendac. Padnuembi ëbëdtan chuiquid dapa icmequin mibi ëbi datsadmetiapimbo iquiec. Nuquin Papambien ambi tantiacpadomboen ëbëdtan chuiquid dapa icmendac —quequin Esusën chuipondash.

²⁴ Adnubimbi: —Chuiquid dapa ëbi icme —Esus casho tantiaquien Uan chedo nëishëmpondac. ²⁵ Adsho Esusën ëbitedi chuipondash. —¿Mitsipadquid matses utsibo isadaidpembo chuiquid dapa icpec? Abi chuiquid dapan baded-badedquien ancabudac dacuëdquin aton yuabon badedi naic. ²⁶ Ëbi tantiaquido icquin mimbi adoenquo iquendac. “Bëdambo mibi iquiec,” Nuquin Papa cametiadquo icquin utsibo tantiaquien mimbi utsibo nashuntsiac. ²⁷ Bëdambo icquid ictiadquo icquin yuan aton icbo nashunacimboen mimbi utsibo nashuntsiac. ²⁸ Adembidi Nuquin Papan matsesmiaid icquin matses nashunquid nebi. Ancainquo icquin matses tantiaquien Nuquin Papa icsaquidobi cuidmenquo icnuec ëbided ciudadec unësendabi —quequin Esusën abëd icquido chuipondash.

Bëshuaid daäd Esusën bëdamiaid
(*Mad 10.46-52; Duc 18.35-43*)

²⁹ Adashic yuecquio ictanec shubu dadpen icquid Edico caid yacno tabadash auëshquiobi Esus nidpondash. Adsho isanec nidquin matses dadpeshun Esus tsibanampondash. ³⁰ Adnubien aid podqued cuëman bëshuaid dada daäd tsadpondash. —Esus cuenec —quesho tantiashien aid daëdi comapenec cuëdpondash. —Tsusedpa Dabidën tsyuecquid Nuquin Papan namiaidquio icquin ëbi bëdamboen ista, Icbo —quepondash Esus caic.

³¹ Adsho tantiashun matses dadpeshun chushcapondash. —Padi. Chën. Adec cuëdec chieshanquiec mibi iqueque —caquien abi niacbidanec buëdanquiec cuëdpondash. —Tsusedpa Dabidën tsyuecquid Nuquin Papan namiaidquio icquin ëbi bëdamboen ista, Icbo —queoapondash.

³² Adoaquien Esusën nidtuidshun ëcbedpondash. —¿Atotsi chuinuec ne? —caquien: ³³ —Isbente bunquiebi, Icbo —quepondash. ³⁴ Adsho tantiash: —Unësquio iquec —quetanquin Esusën bëshuaid daëdi bëmishpondash. Adoac abi daëdi bëdampondash. Bëdانشun aidëntsen Esus tsibanampondash bëshuacboedëmbi.

Edusaden yacnoshon chuiquid dapabimboecnuc Esus bëdamboen isaid

21

Edusaden yacnoshon chuiquid dapabimboecnuc Esus bëdamboen isaid

(*Mad 11.1-11; Duc 19.28-40; Uan 12.12-19*)

¹ Adanec nidequi shubu dadpen icquid Edusaden caid anoentsëqui macuësh dapa Odibos caid poctse shubu daëdpactsëcquid Bedpaque caid yacno Esus nidpondash. Adshumbic anoentsëqui choshon abëd icquido

daëd chuipondash. ² —Nëid podquedën nidquin shubu daëdpactsëc yacno nidshun cabayobitsecquid aton bacuë caniatseëcbëdta mimbi badedquio istuidendac. Istuidshun tènëshaid tëdiadsho tëchicta. ³ Mimbi tëchicsho isquidën: —¿Atotsi acnun nai? —cac: —Nuquin Icbo: “ ‘Bedtan,’ quiosh,” mimbi cac: “Ai, buantan,” quendac —quequin Esusën chuipondash. ⁴ Ambi Esusën nate chiaid Nuquin Papan con tsusedpa dada uamiampicpadomboen nanuen Esusën adopondash. Naden dada uapampic.

⁵ “Shubu dadpen icquid Sion caidën tabadquido chui. Edusaden cain Sion capec.

‘Is. Mibi chuiquid dapa cabayobitsecquidën bacuë caniatseëc catsadtoash choeque. Ancanenquio yec bëdamboshë icquidquio neque. Is,’ quequin chui,” quequin dada uapampic. ⁶ Aden dada uampicpadomboen ambi: —Bedtan —caidon bedtampondash.

⁷ Adotanquin cabayobitsecquid anibëdta caniatseëc bëacshobimbi con dashcute bëntse dasiuidboed chictanquin casanondac. Aden ëmbi cabayobitsecquid casansho isash caniatseëquën Esus catsadtopondash.

⁸ Adanec nidsho istanquin matses dadpenshun aton dashcute abi dasiuidaid bëntse icquid chictanquin Esus nidte podqued ansambampondash. Adnubien utsibon niste podobiecquid tetanequin podqued ansambampondash: —Chuiquid dapa Esus nec —qeshun. ⁹ Matses dadpen bëyuc nidnubi aitedbidi tsyuec nidpondash. Abitedi cuëdënidpondash.

“Adeduya. Nuquin tsusedpa Dabidën tsyuecquid Nuquin Papan namiaid yec mibi bëdamboshë iquec.

Nuquin Papan chomiaid yec mibi bëdamboshë iquec.

Mibi chomequid Nuquin Papatsen bëdamboshë iquec. Adeduya,”

quec cuëdëncuededpondash.

¹⁰ Adec Edusaden yacno matses dadpenquo cuëdënidec nidsho isashien Edusaden yacnocquido: —¿Tsutsi tantiec cuëdëncuededpec? —quepondash.

¹¹ Adsho tantiashun Esusbëd nidquido: —Esusquo tantiec nec. Nuquin nidaid cuëshë Cadidia caidën shubu dadpen icquid Nasaded caid yacnuësh caniondaid Nuquin Papan chiaidquio chuiquid Esus tantiec nec —quepondash.

Esusën chushcaquin cuemiaid

(Mad 11.15-19; Duc 19.45-48; Uan 2.13-22)

¹² Edusaden yacno choash Nuquin Papa tabadte shubu uashunaid umanuc daquënë uabenaidën Esus puduedpondash nuntanquo puduedenquo yec. Adshun isquien piucquid bednuequido dadpen tabadpec. Utsi-utsiec nidaid utsin icquido piucquid dadpen bedshunquimbi muaquin piucquid utsi daëdpactsëc menequid icnubi utsi-utsiec: —Nëid bedquidën: “Ma Nuquin Papan ëbi bëdamboen isnu,” queshun pichicametsiash —quequin aton nëish yua menequin piucquid dadpenquo bedquid nepondash. Adsho istanquin Esusën cuemepondash. Ambi tabëcaid bidiacbanquin aton yua dëbimbitsecquido cuemequin piucquid bednuequidotedi cuemepondash naden chuiquin. ¹³ —¿Adenda mimbi Nuquin Papan chiaid bëdamboen nape? Naden Nuquin Papan chiaid dada uapampic.

“Ëbi tabadte shubu uashunaid ëbi chianete shububidi nec,”

quequin Nuquin Papan chiacpadomboen aton shubun puduedshun aid chianetiadquidi mimbi adoenquo iquec. Mitsana bedteuidi bunec ampec tabadte shubu mimbi icmiaye. Cuen —quequin cuemepondash.

¹⁴ Adnubien Nuquin Papa tabadte shubu uashunaid yacno bëshuaid yec daicsaid yec quenuc bë-bëpondash. Aden bë-bëshobien Esusën bëdamepondash.

¹⁵ Adsho isashien Esus chieshënquido nëishpondash. Adec nëish yua abided unës uaquido chuiquid dapoböd Moisesën dada uampid chuibanquido nëishpondash. Adec comapenen tantiaquin Esusën naban-sho isash nëishboedi bacuëbotsen: —Nuquin tsusedpa Dabidën tsyuecquid Nuquin Papan namiaid yec mibi bëdamboshë iquec —quec Esus caic cuëdëncuededsho tantiaish nëishquiopondash. ¹⁶ Adshumbic: —Icsambo iquec —queshun Esus chuituidec: —¿Ada bacuëbo cuëdënsho tantio? —caquien: —Ai, tantiombi. ¿Nuquin Papan chiaid isabida ictio? Naden bacuëbo cuëdënte chuipampic.

“Nuquin Papan oncamiac bacuëmpin aton bacuë utsibëdtan:

‘Nuquin Papa bëdambo iquec,’ caindac.”

quequin chuipampic —quepondash Esus. ¹⁷ Adanec nidec shubu dadpen icquid Betania yacno nidash ushtuidpondash.

Esusën cuëte unës uaid
(*Mad 11.12-14, 20-26*)

¹⁸ Badiadnubi ënden aucbidi nidoaic Edusaden yacnobidi nidoapondash. Piabi nidec bundoshon ¹⁹ podqued cuëman nidquid cuëtempi icueda caid istuidash: —¿Ada bacuëaye? Chenun isbono —quepondash Esus. Adshun isquien bacuë nibëdec. Podouidquio icpec. Adsho isumbien Esusën: —Adequi bacuëesambo yec unësta —capondash. Adoac badedquio unëspondash.

²⁰ Adosho isun abëd icquidon: —¿Atotsi quiash badedquio unësposh? —caquien ²¹ Esusën: —Tantia. Mibi chuinu. Adembidi mimbi natsiac. “Nuquin Papan ambi chiaid nainquien icchitec,” quenquio icquin: “Nuquin Papan ambi chiacpadomboen naquidquio nec,” qeshun

mimbi Nuquin Papa chianesho aidëmbi mimbi: “Natiapimbo iquec,” caidi mibi nametsiash. Aden tantiaquin mimbi nëid macuësh cain: “Mananuc tabadboedi adquiecbidi acte nantan tabadoata,” mimbi cac nëid macuësh acte nantan tabadoatsiash. ²² “Ambi chi-acpadomboen naquidquio Nuquin Papa nec,” qeshun mimbi aid chianiac mimbi chiaid Nuquin Papan mibi nashuntsiash —quequin Esusën abëd icquido chuipondash.

*¿Tsuntsin: Naic nid, cac nai? quequin Esus chuimiai
(Mad 11.27-33; Duc 20.1-8)*

²³ Adcuidanec Edusaden yacno padpidec nidshun Nuquin Papa tabadte shubu uashunaid daquënë uaidën puduedshun Esusën Nuquin Papan chiaid chuipondash. Adsho tantiashun con matses tsusiobon Esus chieshënquidon chuituidpondash. —¿Tsuntsin: “Naic nid,” cac nai? En chui. Tantianu —caquien ²⁴ Esusën: —En mimbia chui. Ęmbia tantianu. Mimbi chuisho tantiashun ëbi namequidtsen chuinu. ²⁵ ¿Tsuntsin namiac Uan padon acten mentopadenec? ¿Ambembida napadenec? —capondash Esusën. Adoaquien badedquio chienquio yec uanotantsec tabadec onquecuededpondash Esus chieshënquido. —¿Atotsi nuqui chuipeba? “Nuquin Papan namiaidquio Uan pado nepadenec,” cac Esusën: “¿Atotsieshun aidën chiacpadomboen nainquio ique?” canushe. Aden chienquien ictiad. ²⁶ Nuqui: “Ambembi napondash,” qesho tantiashun nëmbo icquidon nëishënushe: “Nuquin Papan namiaid Uan pado niondash,” qeshun. Aden chienquien ictiad —quepac caondash Esus chieshënquido. Isadaidbo tsusiobobëdi nëish abided unës uaquido chuiquid dapabo adpac caondash. ²⁷ Adashien Esus padpiden chuioaic: —Tsaudi. ¿Tsundan

chiaquien nachitondash? —queshobien: —Mimbi chienquio icsho tantiashun ëmbitsen ëbi namequid chienquio iquembi —capondash Esusën abi chieshënquido cuidquin chuiquin.

Mado daëdshun nacbimboecquido chiaid

²⁸ Adshumbic Esusën padpiden chuipondash. —Tantia. Mibi chuinu. Ëmbi chiaid tantiashun ¿mitsicquid: “Bëdambo iquec,” catsia? Dada aton mado daëdpambo icquid icpac caondash. Abentsëc chuiquin: “Neshcaic nid, mado,” cac: ²⁹ “Padi,” quec chieshuidboedi yuec-yuecpectsëctanec: “Tiedimbi neshcatanchitec,” quiash neshcaic nidac caondash.

³⁰ Adshumbic amën aton mado utsi chuiquin: “Neshcaic nid, mado,” cac badedi: “Ai, adonona,” queboedi neshcaic nidenquio icpac caondash. ³¹ ¿Mitsicquidën aton papan chiacpadomboen napac caondash? En chui. Tiantianu —caquien Esus chieshënquido: —Abia chiac chieshuidboedën —quesho tantiashumbien Esusën: —Adquidpenquien mibi nec. Mibi tantiatiapimbo yec tabadnubi mimbi icsambo caido Nuquin Papa yacno puduedendac. Chieshuidac bimboecquid aido nec. Aton matses piucquid bedshundenedo yec aton piucquid bednuen dada chudmeboedo chido yec quequin Nuquin Papa tantiabenash abëd tabadtequido yanendac. Mibien padenquio iquec. ³² Uan pado acten mentoandenedën Nuquin Papan chiaid chuiquin bëdamboec tabadte chuipadenec. Adsho mimbi tantienquio icnubi mimbi icsambo caidombi Nuquin Papa tantiabempondash. Adsho isun Uan padon chiacpadomboen mibi icsaid ëntiadquidi mimbi ënenquio iccondac. Aton papan chiaid niacquid bimboecquid mibi nec —quepondash Esus abi chieshënquido chiec.

Abi chieshënquido icsaid Esusën chuioid
(*Mad 12.1-12; Duc 20.9-19*)

³³ Adshumbic Esusën abi chieshënquido ompoacbimboen chuipondash naden. —Tied icbon chetequid nidtsinac caondash. Adoshombic aid tied daquënë uatanquimbic chetequid chintetsen nacnempac caondash. Adoshombic: “Ampequid chosho isnu,” qeshun shubu abucquio icnuc shubu uapac caondash. Adoshombic: “Nëid tiedën caniquid chetequid iquec. Aid chequin ëbi neshcashunta,” utsibo canec ënapen nidpac caondash. ³⁴ Adash yuectaneshumbien abëd nidondaïdo aton yuabo chuiquin: “Nëen chetequid sinashe. Bedtan,” cac aton yuabo nidanepac caondash. ³⁵ Adec aton icbon tiedno nidaniacshobien neshcaquidon cudasënquin chieshëmpac caondash. Abentsëc cuesunetanquin utsi cuënoten seshunequiopac caondash. Utsibic cuesquin cuemepac caondash. ³⁶ Aden cuemiaïd choshon chuituidaquien icbon nidboedtedpenquio dadpenquio aton yua utsibo chuipac caondash. “Bedtan,” cac nidanec tiedno choacsho isun adembidi cuesun siapac caondash.

³⁷ Adoacsho tantiash aton madombo caic: “Bedtan,” quepac caondash. “Con mado cuesunenquio icquin ëmbi chetequid menetsiash,” qeshun aton madotsen nidmepac caondash ³⁸ Adoac nidec aton papan tiedno choacsho chetequid cudasquidon: “Tied icbo unësan aidën natedi aton madon bedtsiash. Nëbien aton mado cuesunetiad. Aid nibëdnuc icbo unësan aidën natedi nuquin nabi ictsiashe,” qeshun ³⁹ tied tsitsuno buanshun cuesunepac caondash —quequin Esusën chuipondash.

⁴⁰ Adshumbic ambi chuiboedquio abi datsidadquido chuimenuen chuipondash. —Ëmbi chuiboed tantiash ¿atotsi mibi quepatsia? “Min mado cuesuniac-cosh,” cac ¿atotsi tied icbon napatsiash? —quesho

⁴¹ tantiash datsidadquido: —Aido icsamboshë icsho comapenen cuidtsiash. Adshumbic ambi chetequid sinacsho abi cudasënesambo utsibo aton tied neshcametsiash —quecuededpondash datsidadquido.

⁴² Adsho tantiashun Esusën: —Ai, abimbo caic. Adem-bidi ambi chomiaid chieshënsho Nuquin Papan mibi cuidendac. ¿Nuquin Papan chiaid isabida ictio? Naden chiampid ma mimbi ispaboc.

“Buintad bēdambo icquid istuidashi: ‘Nēidquio shubu uanun nitsinemi,’ quetiadquidi isuidacimboen Nuquin Papan namiaid chieshēnac.

Aden buintad isuidaidsin bedshun shubu uanun nitsinacimboen Nuquin Papan tantiamiacpadom-boen utsibon ambi namiaid tantiosh.

Adsho isun: ‘Nuquin Papan namiaid bēdambo iquec,’ caimbi,”

quequin dada uapampic. ⁴³ Aden ambi namiaid ēbi chieshënsho isash mibi caic Nuquin Papa nadpec. “Ēmbi con matses caid isadaidbo ēbi bēdamboen tantiametiadquidi chuiquid dapabon namenquio icsho isun utsibotsen: ‘Ēbi chuiquid icta,’ caindami,” quepec Nuquin Papa. Aden ambi chiacpadquidēn bēdamboen chuibanac abi tantiaquido dadpen yanendac. ⁴⁴ Mibien Nuquin Papan cuidtequido nec. Cuēte uebudquin catashac canite uesadec podquēd-podquēdacimboecnuc mibi comapenen cuidendac —quepondash Esus abi chieshēnquido chiec.

⁴⁵ Adsho tantiashun padiseyobobēdtan nēish abided unēs uaquido chuiquid dapabon: —Nuquien cachitec —quequin tantiabempanēdash. ⁴⁶ Adshumbic Esus cuesunemenuen bedtiadquio icquimbi bedenquio icpanēdash. —Abi datsidadquidon: “Nuquin Papan chiaid chuibanquidquio Esus nec,” queshun Esus bedsho isun nuqui cuesnushe —queshun aton matses dacuēdēnquin bedenquio icpanēdash.

22

Cacuidanaid chiaid (Duc 14.15-24)

¹ Adshumbic Esusën padpiden ompoacbimboembidi chuipondash naden. ² —Tantia. Isadaidbon nacpadomboen aton mado chido bednuesho tantiashun amën mattses dadpen: “Pec cho,” cauidaaid mibi chuinu. ³ Chuiquid dapan aton yuabo chuiquin: “ ‘Con icbon madon chido bedequ. Aidbëd cuishonquenuen pec cho,’ quequin ëmbi tantiaidotedi chuitan,” cac yuabon chuitanaqui choenquio icpac caondash.

⁴ Adsho isumbien chuiquid dapan aton yua utsibo chuiquin: “Nëish nua bëchichoquidquio dadpen codoquiaccoshe. Padpiden chuitan,” cac chuitanoaqui ⁵ choenquiobidi icpac caondash. Adec cacuidanquiec abentsëc aton tied nantan nidnubi utsi piucquid bednuequin ambi aton na menebante shubuno nidpac caondash. ⁶ Utsimbic abi: “Pec cho,” cashobi yuabo mëyanquin cuesun secapac caondash.

⁷ Adoshobien chuiquid dapan nëishtanquin shëpiapac caondash. “Uesquin cuesun siatan,” cac aton sondado chedon aton yuabo cuesun siaquido uesquin cuesun secatanquin aton shubutsen uesquin nëdëncapac caondash. ⁸ Adomeboshombic chuiquid dapan: “Abi pete codocaid dadpen iqueque. ‘Pec cho,’ cac cacuidanoshe. Utsibo chuitan. ⁹ Ëmbi: ‘Pec cho,’ cacmaidobi chuibenetan. Podquedën nidquin mimbi istuidaiddedi: ‘Pec cho,’ cabenetan,” cac nidshun ¹⁰ ambi istuidaiddedi chuibenetanac mattses dadpenquio pec cho-chopac caondash. Icsambo icquidobëdi bëdambo icquido cho-choash chuiquid dapan shubun puduedash pec tabadte quënë dapan tabadcuededpac caondash tsucus-tsucustsëcquio yec.

¹¹ Adshun chuiquid dapantsen puduedshun isquien dashcute bēdaidquio dasiuidabi icquid abentsēc tsadtsec. ¹² Adshobien chuiquid dapan: “¿Atotsi quiash dashcute bēdaidquio dasiuidambobi cho, buchi?” caqui ēcbedenquio yec tsadec. ¹³ Adshobien chuiquid dapan: “‘Chido bedacno isnuec dashcute bēdaidquio dasiuidquid,’ quepadenec. Mibi icsambo iqueque. Mibi cuidnu,” qeshun aton yuabo chiec: “Shēbunshun buanshun icsano netan,” capac caondash. Adoac taneshun netanac mēyadquiec natiaic shubiquiopac caondash.

¹⁴ Adembidi Nuquin Papan ambi matses bēdamboen iste dadpen tantiamiaqui utsin-utsinquien tantienquio iquendac. “Abi yacno puduednu,” queuidboedi bēdambo icte bunenquio yec abi tantiatiapimbo icscho Nuquin Papan comapenen cuidendac. Utsi daēdpacktsēquien Nuquin Papan tantiacpadec abēd tabadtequid iquendac — quequin Esusēn chuipondash.

*Chuiquid dapa piucquid menete chiaid
(Mad 12.13-17; Duc 20.20-26)*

¹⁵ Adsho tantianec nidash abi chieshēnquido padiseyobo: —Esus icsamboen chuimenuna. Icsamboen chuisho tantishun bedshun unēs uamechitono —qeshun ambi chuibanquin tantiamiaido chuipac caondash. ¹⁶ — Icsamboen chuimetan —caquien chuiquid dapa Edo-des caid tantiaquidobēdtan icsamboen chuimenuc chochoshon chuituidpondash. —Bēdamboen chuiquid mibi neque. En ēbi chui. Tantianu. Muesambo icquin Nuquin Papan chiapadec bēdamboec tabadte mimbi abimbo chuipoc. Matses dacuēdēnenquio icquin Nuquin Papan chiaidquio mimbi chuipoc. ¹⁷ Adquid icquin ¿atotsi mimbi chuipe? Tantianu. Chui. Nuquin matses yuaquid chuiquid dapa Sesad caidēn: “Piucquid shocoshēmpi

dadpen beccho,” cac nuqui meniac ¿ada bédambo icpatsiash? —capondash. ¹⁸ Adoaquien Esusën ambe-mbi tantiashun: —Bédambo icquid damianquiec mibi muambo nec. ¿Atotsieshun ëbi icsamboen chuimeti-adquio ique? —quetanquin: ¹⁹ —Chuiquid dapa menetequid piucquid shocoshëmpi beccho —ambi cac ²⁰ bësho bedshun Esusën chuipondash. —¿Në tsutsibimboecnuc dada uaid në iquec? ¿Tsutsi cuëmédquidbëdta dada uac? En chui. Tantuanu —caquien: ²¹ —Ma nuqui yuaquid chuiquid dapambo Sesad neyoc —quepondash. Adsho tantiashumbien Esusën: —Abibimboecnuc dada uaid abi cuëmédquid dada uaid bedtequid shocosh icnuc Sesadën na neque. Icbon: “Beccho,” cac meneta. Adecbidi Nuquin Papa nuquin Icbombo neque. Aidën chiacpadom-boen nabanta —quequin Esusën bédamboen chuipondash. ²² Adsho tantiash icsamboen chuimetiadquio icboedi: —Bédamboen chuipec —quetanec nidanepondash.

Matses uincuemete chiaid
(*Mad 12.18-27; Duc 20.27-40*)

²³ Adnubien aid ushëmbi Saduseyubo: —Matses unë-said uincuenesambo nec —quequidotsen: —Esus icsamboen chuimenu —quec cho-chopondash. ²⁴ —Bédamboen chuiquidquio mibi neque. Mimbi chuisho tantianu. ¿Mitsipaden mimbi chuipatsia? Nuquin tsusedpa Moisesën naden chuiquin dada uapampic. “Aton chido bedash bacuë tishmiabi unësacsho aton utsin aid chido bedshun: ‘Con buchin bacuëbo nibëdeque. Con buchin mado-bimboecnuc tishmenu,’ quequin tishmequid,” quequin Moisesën dada uapampic. ²⁵ Aid tantiaquin chuinu. Dada aton utsibobëd tabadpac caondash. Aton utsibo seistedi icpac caondash. Bëyucquid aton chido bedashi bacuë tishmiabi unëspac caondash. Adsho isun abi

tsibanquidën aidën chido bedash ²⁶ bacuë tishmiambobidi unësoapac caondash. Adsho isun aid tsibanquidën aid chidobidi bedoashic bacuë tishmiambobidi unësoapac caondash. Adenuidi abi tsibanquidën abi tsibanquidënquien aton buchi unësan-unësanquien aid chidoudi beduid-beduidpac caondash. Bacuë tishmiabitishmiabiec abitedi unësbudnepac caondash. ²⁷ Adashic bacuë tishambobi aid chidotsen unëspac caondash. ²⁸ Aid abitedi uincuemiatic ¿mitsicquidën chido icpatsiash? —caquien ²⁹ Esusën: —Nuquin Papan chiaidquio tantienquio icquin Nuquin Papan nadatiambo icquin nabanquin uincuemetemimbi tantienquio iqueque. Chuinu. Tantia.

³⁰ Uincuemiatic dadan aton chido bedesa. Adembidi amën aton champi menesa. Nuquin Papan abi yacnoshon uaido mayan bëdabobimboec matses uincuemiaticaido iquendac. Aden uincuemiaticaidën chido bedesa —quepondash Esus. ³¹ Adshumbic padpiden chuipondash. —Ambi unësaid uincuemetemimbi chuiquin Nuquin Papan dada uamepampid ¿isbanabida ictio? Ma mimbi aid isbampaboc. ³² Naden dada uapampic. “Abadauan caid yec Acobo caid yec Isac caid yec quequidtedishun ëbi Papa capec,” quepampic Nuquin Papa ënden unësampid chiequi. Unësun matses tantienquien mimbi danec. Unësan aton dada chodquiambic aton tantiate unësambo icnuc abi Nuquin Papa tantiatsiash —quepondash Esus. ³³ Adsho tantiash abi datsidadquido: —¿Mitsipadquid nepec? Bëdamboenshëen chuipec —quepondash.

Moisesën dada uampid chiaid

(Mad 12.28-34)

³⁴ Aden unësaid uincuemetemimbi chuisho tantiashumbien Saduseyobon padpiden: —En chui —cainquio icpondash. Adsho isashien Esus chieshënquid utsibo Padiseyobo: —Nuquin Papan chiaid Esus icsamboen chuimenu.

Nid —quianec Esus chuimec cho-chopondash. ³⁵ Cho-choquin abentsëcshun Nuquin Papan Moises dada uami-ampid tantiaquidquo icquin chuimetuidpondash. ³⁶ —Chuiquidquo mibi neque. En ëbi chui. Tantianu. Nuquin tsusedpa Moisesën dada uaqin dadpen chiampic. ¿Mitsicquid abentsëc ëmbi nasho Nuquin Papan: “Bëdam-boshë iquec,” capatsiash? —caquien ³⁷ Esus: —“Nuquin Papa tantiaquieci ambi chiapadec tabadte bunquiota,” quequin ³⁸ chiampidba naic Nuquin Papan chiapadec mibi bëdamboec tabadtsiandac. ³⁹ Adembidi Moisesën chiampid utsitsen naic matses bëdamboec tabadtsiash. “Min dada mibibi datantiadac bimboen utsibotsen tantiaquiota,” quequin chiampicpadomboen nasho Nuquin Papan bëdambo catsiash. ⁴⁰ Aden matses bëdamboen namenuen Nuquin Papan ambi chiaid utsi abitedi Moisesba chuishun nuquin tsusedpa utsibo chuiquin dada uamepampic —quequin Esusën bëdamboen chuipondash abi chieshënguïdo chuiquin.

Nuquin Papan chomiaidquo chiaid

(Mad 12.35-37; Duc 20.41-44)

⁴¹ Adshumbic Esusëntsen abi icsamboen chuimete bunquïdo Padiseyobo chuipondash. ⁴² —Ëmbitsen mibi chuimenu. Tantia. Nuquin Papan chomiaid ¿mitsipadquid nec? ¿Matsesën madouïdida nepec? —capondash Esusën abibi cadquimbi. Adoaquien badedi: —Nuquin tsusedpa yampid Dabidën tsyuecquid icsho Dabidën mado caimbi —quepondash Padiseyobo.

⁴³ Adsho tantiashumbien Esusën: —¿Bëdamboenda chuidio? Mibi chiapadquid aton mado icsho ¿atot-sieshun Nuquin Papan Mayanën tantiamiacpadomboen Dabidën con Icbo capampic? Naden Dabidën dada uapampic.

⁴⁴ “Nuquin Papan con Icbo naden chiendac.

‘Con abiuc tsadash abitedishun Icbombo icnush nēmbo cho.

Mibi chieshēnquidobi con Icbo mibi camenu,’ quequin Nuquin Papan con Icbo chiendac,”

quequin Dabidēn dada uapampic. ⁴⁵ Con mado cainquio icquin con Icbo capampic Dabidēn. ¿Atotsieshun mimbi: “Dabidēn mado nec,” quequin tantiape? —caquien ⁴⁶ ēcbedenquio yec otacquo tabadpondash. Esusēn bēdamboen chuisho tantiash: —Icsamboen chienquien icchitec. Ēmbi padpiden: “Icsamboen chuimenu,” cac bēdamboembidi chuioatsiash —queshun abi chieshēnquido abitedishun Esus padpiden chuimenquio icquin ēnaccondash.

23

Bēdambo icquid damianquido tanenda, quiaid

(Mad 12.38-39; Duc 11.43, 46; 20.46)

¹ Adshumbic Esusēn abēd icquidobēdta abi datsidadquido tantiamequin chuipondash. ² —Tantia. Moisesēn dada uampid chuibanquidobēdtan tsusedpabon chiampid namequido Padiseyobon naid mibi chuinu. Aidon: “Moisesēn chiampicpadomboen nata,” quequin nuquin matses isadaidbo chuidenepec. ³ Aden Moisesēn dada uampid abimbo chiac adenuidi mimbi nac bēdambo ictsiash. Aden naquin padiseyobon nacpadomboen nainda. Aidon Moisesēn chiampid chuiquimbi ambibi aidēn chiaid niac-niaquec. ⁴ Chieshēmēnquido nec. Nuquin Papan chiaid nametiadquidēmbi tsusedpabon ambembi chiaid dadpenquio namepec chushcanquin. “Matsesēn aitedi natiapimbo iquec. Padi icnuna. Nuquin matsesēn chiampidtedi nainda,” catiadquidi adoenquio iquec.

⁵ Aden padiseyobon Nuquin Papa tantiaquidquo damequin matses ismenuenuidi naic. Nuquin Papan chiaid dada uaidëmpi sauedtsash bëdectamëdec abiuc daëdi pëdectamëdec queshun matses ismenuenuidi naic. Adembidi aton dashcute tëdiadte nacnenuequin: “ ‘Nuquin Papa chianequidquo nec,’ ma ëbi canu,” queshun sedquid shoyonaid ënapenpactsëcnuc cuididicash matses ismenuec matses tabadacno capucuenep. Adec Nuquin Papa chianequid damianquiec. ⁶ “Chuiquid dapa nec,” cameteuidi bunec. Isedec puduedash: “Chuiquid dapa icsho icbon abëdi tsadmequid,” quiash icbobëdi tsadte bunquiec. Nuquin Papan chiaid chuibante shubun puduedash: “Tsusio dapambo nec,” camenuc utsibobëd tabadenquio yec tsusiobobëduidi tabadquid nec. ⁷ “Chuiquidquo yec mibi bëdambo iquiec,” camete bunquiec matses dadpen tabadacno nidtenepec.

⁸ Mibitsen adenda. Utsibo: “Mibiuidtsëqui bëdambo iquiec, Icbo,” camenuc adenda. Min Icbo abentsëcquiobi ëbi iquiec. Èbi abentsëqui con Icbo cata. Con yuabo yec con utsibo mibi neque. Bëdamboec isnanta. ⁹ Adembidi mibi chuibanquid chuiquimbi: “Mibiuidtsëqui bëdambo iquiec, Papa,” cainda. Nuquin Papauidtsëqui aden chuita. ¹⁰ Adembidi: “Chuiquid dapa yec mibiuidtsëqui bëdambo iquiec,” utsibo camenuenuidi nainda. Èbiuidtsëqui mibi chuiquid dapa nec. Nuquin Papa yacnuëshquio choquid ëbipadquidquo utsi nibëdec.

¹¹ Padnuen ambi chiacpadomboen utsibo nashunquidquo utsibo dëniacte bunenquio icquid Nuquin Papan bëdamboshë catsiash. ¹² Utsien abibi cadequi: “Èbiuidtsëqui bëdambo iquiec,” quequin utsibo ismenuenuidi naquido Nuquin Papan icsambo catsiash. Utsibic Nuquin Papan chiacpadomboen naquin utsibo nashunquid yec

utsibo ismeteuidi bunenquio icsho Nuquin Papan bēdambo caindac —quepondash Esus abi datsidadaido chiec.

Abi chieshēnquido Esusēn chushcaid

(Mad 12.40; Duc 11.39-45, 52; 20.47)

¹³ Adshumbic abi chieshēnquidotsen chuipondash. — Tantia. Moisesēn chiampid chuibanquidobēdta Padiseyobo mibi chuinu. Nuquin Papan cuidtequidombo mibi nec. Bēdambo icquid damianquiec mibi icsambo iquiec. Nuquin matses: “Nuquin Papabēd tabadte tantianu,” qeshobi mimbi bēdamboen chienquio iquiec. Ĕmbi Nuquin Papabēd tabadte bēdamboen chuisho mimbi tantienquio iquiec. Aden tantienquio icquin: “Aidēn chiaid tantienda,” quequin mimbi utsibotsen Nuquin Papabēd tabadte tantiametiapimbo iquiec.

¹⁴ Nuquin Papan cuidtequido mibi nec. Muaquin unēsboedēn niante piucquid bedshunquido mibi nec. Nuquin Papa tantiaquidquio damenuen utsibo tantiamequinuidi buēdpambo cuēdquin Nuquin Papa chiacbimboen mimbi chianepec. Aid abimbo mimbi chienquio iquiec. Adec chieshanquiecsho isun Nuquin Papan mibi comapenen cuidendac.

¹⁵ Nuquin Papan cuidtequido mibi nec. Mimbi tantiacpadomboenuidi tantiamenuen mimbi matses utsibo chuiben-chuibenec. Nidaid utsi-utsiec yacno nidshun mimbi chuibenesho tantiaquido mimbi tantiacpadquio yanash Satanasēn yuambo yanec Nuquin Papan cuidtequidombo iquendac.

¹⁶ Nuquin Papan cuidtequido mibi nec. Isadaidbo chuiquid icquin bēdamboen tantiamenquien mimbi icchitec. “ ‘Nuquin Papa utsi uatiapimbo yacpaden abimbo caimbi,’ quequid muaisa nec. Muaquidēn Nuquin Papan chiaid niacquid,” quetiadquidi mibi adenquio iccoc. “ ‘Nuquin Papa tabadte shubu uashunaid utsi

uatiapimbo yacpaden abimbo chiombi,' quequid muesa nec," quetiadquidi mibi adenquio iccoc. Padenquio yec: " 'Nuquin Papa tabadte shubu uashunaid dapan icquid shocosh piu nacnenaidquio utsi uatiapimbo yacpaden abimbo chiombi,' quequid muesa nec," quechitequien mibi iquec. ¹⁷ Aden tantienquio icquin mimbi icsamboen chiec. Nuquin Papa tabadte shubu uashunaid Nuquin Papa tabadtequid yec ¿bëdapenquioda icpec? "Aid bëdamboshë icnubi aid nuntan icquid bëdiactsëc bëdambo iquec," caimbi. Mimbien icsamboen tantiec. ¹⁸ Nadentsen mimbi icsamboen chiec. " 'Nuquin Papa tabadte shubu uashunaid dapa yacnoshon: Mabi Nuquin Papan bëdamboen isnu, quequin nëish pichicate nacnenaid dapa utsi uatiapimbo yacpaden abimbo caimbi,' quequid muesa nec," quetiadquidi mibi adenquio iccoc. " 'Nuquin Papa mabi bëdamboen isnuequin pichicatequid nëish utsi uatiapimbo yacpaden abimbo caimbi,' quequid muesa nec," mibi quepec. ¹⁹ ¿Adenda mimbi bëdamboen chuipe? Pashuacimboen mimbi bëdamboen tantienquio iquec. ¿Mitsicquid bëdambo iquec? "Mabi Nuquin Papan bëdamboen isnu," quequin nëish pichicate nacnenaid dapa bëdambo icnuc aidën pichicatequidi nëishquio bëdapabi ictsec. Nuquin Papamboen bëdamboshë iquec. ²⁰ Nëish pichicate nacnenaid caic: "Aid utsi uatiapimbo yacpaden abimbo caimbi," quequin aid nantequid nëish abitedi chiaidbidi nec. Adembidi ambi: "Mabi bëdamboen isnu," caid Nuquin Papatsen chuipec. ²¹ Adembidi Nuquin Papa tabadte shubu uashunaid caic: "Aid utsi uatiapimbo yacpaden abimbo caimbi," quequin ambo tabadquid Nuquin Papatsen mimbi chiec. ²² Adembidi abu caic: "Abu utsi uatiapimbo yacpaden abimbo caimbi," quequin Nuquin Papa tsadaidtsen chiec. Nuquin Papa tsadaid cain Nuquin Papambo chiec. Aidën chiaidquio

tantiec: “Abimbo cacbimboen chuiquid icsaquid nec,”
quetiadquidi mibi adenquo iccoc.

²³ Bëdambo icquid damianquid yec Nuquin Papan
cuidtequido mibi nec. Nuquin Papan chiaid abentsëqui
tantiatsecquin min tiedën canitsëcquid musuquëmpi
bedshun Nuquin Papa mimbi menepec. Aden menequid
icquimbi mimbi Nuquin Papan chiaid utsi dadpen niac-
niacpec. Chieshëmianquid icboedi: “Ëbi bëdamboen
ista,” qesho bëdamboen istiapimbo mibi iquec. Adem-
bidi bëdambo icquidi muauaquin mimbi tsusio icsamboen
cuidmec. Adembidi mimbi Nuquin Papa abimbo tantien-
quo iquec. Aden mimbi Nuquin Papan chiaid niac-
niacpec. Ambi chiacpadomboen Nuquin Papa menequid
icquimbi ambi chiaid utsi abitedi natiadquidi ma mimbi
nainquo icpaboc. ²⁴ Tantesa uatsëcquimbi mimbi utsibo
icsamboen chiec. Manuampi nibedbantsëcquimbi utsi
nuacquid nibedquiabi abi nësamëdpanumbobi acacim-
boembien mimbi nachitec. “Nuquin Papa meneta,” que-
quin chiaiduidtsëqui natsëcshun adenuidtsëqui mimbi
utsibo namepec. Adenuidtsëqui namequimbi Nuquin
Papan chiaid utsien mimbi niac-niacchitec.

²⁵ Nuquin Papan cuidtequido mibi nec. Padisey-
obo yec Moisesën dada uapampid chuibanquido yec
quequimbi mimbi icsamboen naic. Pada-padaidbëdta
dëshote chieshquin cachocuidtsëqui dapanshun anauc
ampanambo icquidi ampanaid damianacbimboec mibi
bëdamboec tabadquid damianquiec. Nuquin Papan chi-
aid dadpen nainquo icquin mitsanauidi bednuen mibi
bunaiduidi mimbi napec. ²⁶ Pamumëdacbimboec tan-
tiatiapimbo mibi iquec. Dëshote abichobi bëdamboen
ampanacbimboec icsaid ucudash bëdambo icta. Adec
icsainquo yec ënëdash Nuquin Papan chiacpadec mibi
bëdamboec tabadtsiac.

²⁷ Bëdamboec tabadquido mimbi damesho isun Nuquin Papan mibi cuidendac. Unësaid chococacno bëdamboen nacenac bëdambo isadec ënden pisenambi. ²⁸ Adembidi bëdamboec tabadquid mimbi damec. Matses ismec bëdamboec tabadshumbic omposhon Nuquin Papan chiaid niac-niacquin mimbi natemaidien mimbi nachitec.

Padiseyobo chedo cuidte chiaid
(Duc 11.47-51)

²⁹ Nuquin Papan cuidtequidombo mibi nec. Nuquin Papan oncamiaidobëdta bëdamboec tabadquido nuquin tsusedpabon unës uampido tantiaquin aido chococampicno shubu uaquin mimbi nacenmpec. ³⁰ Adoshombic: “Nëmbo con tsusedpabon chieshënquin unës uampid chococac. Aïdbëd tabadquin ëmbi unës uainquio ictsenëdac. Ëmbien bëdamboen itsenëdac,” qeshun mimbi aido chococacno nacenmpec. ³¹ Adoboedëmbi nuquin tsusedpabon bëdambo icquid unës uampicpadomboen adoante bunquin mimbitsen chieshtoshon adoaindac. ³² Ai, nuquin tsusedpabon Nuquin Papan oncamiampid unës uacpadombota — quepondash Esus abi unës uate chiec.

³³ Adashic abi padiseyobo chiec: —Nisibimboec icsa uanquido mibi nec. Adquido icsho Nuquin Papan icsano nësecaquin mibi cuidendac. ³⁴ Icsaido icsho isun: “Ma Nuquin Papan bëdamboen iste tantiamenu,” qeshun Nuquin Papan chiaid chuibanquido utsi-utsien mibi yacno nidmendambi. Adquid mibi yacno chochoacsho mimbi dadpen unës uaindac. Utsi-utsien cuesten dectanquin utsi-utsien Nuquin Papan chiaid chuibante shubunoshon cueshcaten mimbi cueshcaindac. Utsi-utsien cuesnuequin nadancatanequin shubu utsin shubu utsinquien mimbi cuemetanendac. ³⁵ Adosho

Mateyon Dada uaid 23:36116Mateyon Dada uaid 2

isun Nuquin Papan mibi cuidendac. Nuquin Papan chiacpadec bēdamboec tabadsho tsusedpan chieshēnquin tauamboen cuesuniampid Abed nepampic. Adoshombic adecbidi bēdamboec tabadsho tsusedpa utsibon utsi-utsien unēs uapampic. Adoshombic ēnquin Bedequias caidēn mado Sacadias caid unēs uapampic. Aidi Nuquin Papa tabadte shubu uashunaid dayunshunquo cuesunepampic. Aidtedi unēs uampido tantiaquin aido unēs uaquido cuidacimboen Nuquin Papan mibitsen cuidquiendac. ³⁶“Yuecshun min tsyuecquido cuidendac,” quec nenquo iquebi. Nēbi caimbi —capondash Esusēn abi chieshēnquido chuiquin.

Edusaden yacnocquido Esusēn shubi uaid (Duc 13.34-35)

³⁷ Adshumbic Esusēn chuioapondash. —Tantia, Edusaden yacnocquido. Mibitsen chuinu. Mibi tantiac unēsquo iquec. Mibi yacnobidi tabadquin Nuquin Papan oncamiaidon chuisho nuquin tsusedpabon unēs uapampic. Adembidi Nuquin Papan: “Isadaidbo chiec nid,” caido chosho utsi-utsien cuēnoten seshunequiopampic. Adembidi mimbi nēbi naindac. Adquidombo icsho mibi tantiaquiembi. ¿Mitsipadec cachina aton bacuē cud-aspec? “Penushe,” quiash aton bacuēmpi nua shoccoshon madadec cudasquid. Adecbidi: “Satanasēn yuanushe,” quiash cudasquiec mibi Nuquin Papa bēdamboen ismete tantiametiadquico iccobi. “Tantiamentu,” cac tantiate bunenquo mibi icchitoc. ³⁸ Ēbi nidambic ēbi tantiatipimbo icsho Nuquin Papan namiac min shububēdtabi mibi nibēdamendac. ³⁹ Nēbi mimbi ēbi isenquo yanendac. Padnuen min matsesēn yuecash chosho ēbi isendac. Aden isash: “Nuquin Papa yacnuēsh choquid bēdambo

iquec,” min matses quendac —quequin Edusaden yacno-
quido Esusën chuipondash.

24

Nuquin Papa tabadte shubu uashunaid nibëdante chiaid

(Mad 13.1-2; Duc 21.5-6)

¹ Adash Nuquin Papa tabadte shubu uashunaid daquënë uacno tabadanec nidequi Esusbëd icquido Nuquin Papa tabadte shubu uashunaid caic: —En is, Icho. Nëid shubu bëdamboen nacnenaidquio neque —quepondash.

² Adsho tantiashun Esusën: —Mimbi isboedquio cuënote bëdamboen nacnenaid matses utsibon cuënote chic-chiquendac nibëdquiecnuc —capondash.

Nuquin Papan cuidte ushë chiaid

(Mad 13.3-13; Duc 21.7-19)

³ Adanec nidequi macuësh dapa Odibos caidën pudundoec poctsebi tabadtuidshun abëd icquidon utsibo tantiamenquio icquin Esus chuipondash. —En mibi chote chui. Tiantianu. “Nëbi choec,” quequin mibi chote ¿mitsipadembimbi tantiape? Adecbidi ¿atotsi isashini: “Nuquin Papan cuidte nëbi nec,” quepe? —capondash abëd icquidon.

⁴ Adoaquien Esusën naden chuipondash: —Tantia. Mibi chuinu. Muaquidoba choendac. Aidon chuisho tantiash: “Abimboen chuichitec,” quenda. ⁵ Adquido choshon: “Nuquin Papan chomaidquio Quidistu caid nebi,” quequin muaquin chiaqui dadpenshun: “Ai, abimboen mimbi caic,” capendac.

⁶ Èbi choabi icnuc: “Matses dadpenquio cuesnancuesnanac caosh,” quecuededendac. Adsho tantiash dacuëdenda. Nuquin Papan matses abitedi cuidte ushë choabi icnuc ambi tantiacpadec matses adonanendac.

⁷ Adec matses utsi dadpen icquido matses utsibobëd cuesnanendac. Nidaid utsi-utsiec yacno pete nibëdquiecnuc

icted-ictedendac. Nidaid utsi-utsiec yacno nidaidquiobi comapenec uëdëquedenendac. ⁸ Adsho isash chido bacuë nëncuenacsho isun: “Nëbien tishchitec,” quequin tanti-acbimboen tantiata. “Nuquin Papan abitedi cuidte nëbi nec,” quequin tantiata —quepondash Esus.

⁹ Adashic abi onquec: —Ëmbi chiacpadquio icnuc chieshëmënguidon ëbi tantiaquido bedshun chieshën-quin utsi-utsien cuesendac. Utsi-utsien unës uaindac. Aden nidaid utsi-utsiec yacno tabadquidon dadpeshun ëbi tantiaquido chieshënquiendac. ¹⁰ Adoac ëbi tanti-atsëcboedëmbi chieshtoshon ëbi tantienquio yanendac. Aidëmbi ëbi tantiaquid ompodacsho istuidmeshun mëya-mendac. Adashic abipadquid utsibobëd chieshënanen-dac.

¹¹ Padnuen muaquido: “Nuquin Papan chuiboedquio chuinu. Tantia,” quependac dadpen. Adsho tanti-ashun dadpeshun: “Ai, abimboen mimbi chiec,” cain-dac. ¹² Matses dadpenquio icsamboecshë tabadsho isun ëbi tantiatsëcboedëmbi ëbi tantienquio yanendac. ¹³ Padnuembi ëbi choabi icshobi ënenquio icquin ëbi tantiaquido Nuquin Papa yacno tabadmendac.

¹⁴ Ëbi choabi icnuc: “Ma matses abitedishun Nuquin Papabëd tabadte tantianu,” qeshun ëbi tantiaquidon nidaid utsi-utsiec yacno nidshun chuiben-chuibenendac. Matses abitedi chuibenequin nainambi choaindabi —quepondash Esus.

*Matses icsamboshë icquid chote chiaid
(Mad 13.14-20; Duc 21.20-24; 17.22-24)*

¹⁵ Adashic abi onquec: —Ëbi chote ushë nëbi yanuc matses icsamboshë icquid Nuquin Papa tabadte shubu uashunaid dapa icsa uanuec puduedshun: “Mimbi Nuquin Papa caid tantienda. Ëmbi chiacpadomboenuidi nata,”

quequin Nuquin Papa chieshënquin chiendac. Ĕndenquimbo nuquin tsusedpa Danied caidën aden icsa uate chuiquin Nuquin Papan chiaid dada uapampic. Aidën dada uampid mimbi isaidquio nec. ¹⁶ Aden: “Nuquin Papa tabadte shubu uashunaid dapa icsa uanuec puduedosh,” qesho tantiash Udeya yacnocquido macuësh dapa yacno ompodec cuenac bëdambo ictsiash.

¹⁷ Adec cuenec shubu dayun icquido puduedenquio yec: “Con na bednu,” quenquio yec umanucuëshu cuenac bëdambo ictsiash. ¹⁸ Adecbidi badedquio cuenuen tied nantan icquidon aton dashcute utsi aton shubuno beduanenquio yac bëdambo ictsiash. ¹⁹ Nidequi bacuë usunquid yec bacuë chishmequid yec quec badedquio cuentiapimbo yec mëyadquiendac. ²⁰ Adec cuente tantiec: “Ue sequenumbo cuemenquio icpashuni,” queta. “Pete bedmianenquio icnushe,” quiash “Chonoadenquio icte ushënquio cuemenquio icpashuni,” queoata. ²¹ Aden Nuquin Papa tabadte shubu uashunaid dapa icsa uate bunquid icsamboshë icquid choan matses dadpenquio natiambo chieshëmënquieci tabadendac. Nuquin Papan tauamboen matses uac adec tabadenquio ictenec. Nëbi adec tabadenquio iquec. Aido icsamboecshë tabadquido nibëdanambic utsibo adquidpenquio yanoaindac. ²² Adec icsamboecshë tabadte tantiaquin Nuquin Papan: “Ĕmbi Esus tantiaquid icmiaido uesquin cuesun sianushe. Matses abitedi nibëdanushe,” qeshun yuenquio icsamboen tabadmenquio icquin ënëdmendac —quepondash Esus.

²³ Nuquin Papan aden ënëdmiabi yac icsamboecshë tabadec utsibo: “Is. Nëid Nuquin Papan chomiaidquio Quidistu neque,” quependac. Utsibic: “Is. Nëidquien Nuquin Papan chomiaidquio Quidistu caid neque,” quequin icsamboen chuioaindac. Adsho tantiashun: “Nuquin Icbo Esus choashien nec,” cainda.

²⁴ Adec muaquidoba choendac. “Nuquin Papan chomaidquio nebique. Is,” quequin comapenen tantiaquin nabanquin ismendac. Utsibontsen: “Nuquin Papan oncamaid nebique. Is,” quequin nadatiambo icquin nabanquin ismendac. Adsho isun dadpenshun: “Ai, abimbo caic,” caindac. Padnuen Nuquin Papan: “Muambo nec,” quequin tantiamiabi yac ëbi tantiaquidontsen: “Ai, abimbo caic,” catsempendac. Nuquin Papan bëdamboen tantiamiaido yec adtiapimbo iquendac. ²⁵ “‘Chieshëmënkuido iquendac,’ quequin tantienquio icquidën ëbi tantienquio yanushe,” qeshun: “Aden ëbi tantiaquido chieshënquidendac,” quequin chiombi —quepondash Esus.

²⁶ Adashic padpidec onquec: —Ëmbi aden chuiboed tantiashun utsibo muasho tantienda. Ëbi caic: “Utsibo ismenquio yec matses nibëdacno choac caoshe. Isnu. Nid,” cac istanenda. Adembidi: “Choash nëid shubun puduedac caoshe. Isnu. Nid,” cac adembidi istanenda. Muambo neque. ²⁷ Ëbimbo padpidec choquimbimbi abitedimbo ismendac. Abu ushëmbo yec bed-bedquetanesho ¿ada matsesën abitedishunquio isenquio icpadic? Ai, isec. Adembidi ëbi choasho matses abitedishunquio isendac. ²⁸ Adec choendabi. ¿Ada edeste pisen chec budenquio icpadic? Ai, budec. Adecbidi Nuquin Papan cuidte ushë chonoc choendabi —quepondash Esus.

*Abi chote Esusën chiaid
(Mad 13.24-37; Duc 21.25-33)*

²⁹ Adashic padpiden chiec: —Aden matses icsamboshë icquidon ëbi tantiaquido natiamenubi ushë chënquenquio yanendac. Inchëshën ushëtsen chënquenquio yanendac. Uispa chedo paëdbudnendac. Uispabimboecquid abitedimbo uëdëquendac. ³⁰ Adnubini abitedishun Icho yec dacuëdampambo yec abucuësh choendac. Ëbi nadatiambo icquin nabanquidquio yec chosho

isash cuidadtequido abitedimbo dacuëdec natiaic shu-biquiendac. ³¹ Adnuc nua shoncanubimbi Nuquin Papan abi yacnoshon uaido mayan bédabo: “Bedtan,” caindac. Adoac nidaid utsi-utsiec yacno nidshun ëbi tantiaquido abitedimbo bedtanendac.

³² Ëmbi chuibocpadquiec yansho isun: “Esus chote nëbi nec,” quequin tantiata. ¿Mitsipaden: “Seta taëec,” quequin tantiapec? Suc seccuduquiaid isun: “Nëbi seta taëec,” quequin tantiaquid. ³³ Adembidi ëmbi chui-boed isun: “Nëbimbobi Esus choec,” quequin tantiata. ³⁴ ¿Muectabi nedi? Ëmbi chuibocpadquio iquendac. Ëmbi chiacpadec yanabi matses abitedi nibédantiapimbo iquendac. ³⁵ Abimbo caimbi. Abu nibédanendac. Nidaidt-sen nibédanendac. Padnuen ëmbi chui-boedquio nibédantiapimbo iquendac. Bënudenquio iquendac. Ucludtiapimbo iquendac. Ëmbi chuibocpadquio iquendac — quepondash Esus abéd icquido chiec.

Esus chote ushë tantienquio icte chiaid

(Mad 13.32-33; Duc 17.26-35)

³⁶ Adashic abi onquec Esus: —Ëbi chote tantienquio iquembi. “Aid ushënquio choendabi,” quetiapimbo iquebi. Adembidi mayan bédabon tantienquio iquec. Ëmbibi Nuquin Papan Madonquiobi tantienquio iquembi. Nuquin Papanuidtsëquien tantiec. ³⁷ Matses ëbi caic: “Nëbi choec,” quetiapimbo icnuc choendabi. Noen cano nacnenubi ¿mitsipaden aton matses icsambo icquidon tantiapampic? ³⁸ Nidaid abichobi mauanabi icnuc: “Nuquin Papan nuqui cuidendac,” quequin tantienquio icquin peshun acquinc aton chido bedquinc aton champi bedmequinc capampic. Adnubien Noe Nuquin Papan chiacpadomboen cano dapa anshubu uaquin nacnenash puduedpampic. ³⁹ Aton matses: “Nëbimbobini Nuquin

Papan cuidchitec,” quenquo icnubi ue dapambo choec mauanquidën matses abitedimbo unësbudnepampic Noe ambi cano anshubu uaidën nuadtonobi. Adecbidi Nuquin Papan cuidtequido ëbi caic: “Choec,” quenquo icnubini choendac.

⁴⁰ Choquin Nuquin Papa yacno tabadmenuen bedu-amendambi. Ëmbi: “Bedtan,” cac tied nantan dada daëd icsho istuidshun ëbi tantiaquid abentsëc icsho beduanendac. Utsibic ëbi tantiesa icsho nianendac. ⁴¹ Adembidi Nuquin Papa yacno tabadmenuen chido daëdshun macueso istuidshun abentsëc ëbi tantiaquid icsho aid abentsëc beduanendac. Chido utsibic ëbi tantiesa icsho nianendac.

⁴² Aden ëmbi chuiboed tantiashun: “¿Nëbida con Icbo chopeba?” quequin ënenquo icquin tantiata. Ëbi chote mimbi tantienquo iquec. ⁴³ ¿“Nëbi ampequidën ampec,” quequinda tantiapadic? Padenquo. Tantiaquidënquien aid ushënquo aton na bëdamboen isquin ampemenquo ictsiash. Aden tantienquo icquin: “Ampesho isnu,” quequin ënenquo icquin isquid. ⁴⁴ Adembidi ëbi chote ushë mimbi tantienquo ye. ¿“Nëbida nuquin Icbo chopeba?” quec Nuquin Papabëd tabadte bunec bëdamboec tabadta. Matses dadpen: “Nëbien chochitec,” quenquo icnubini choendac —quepondash Esus abëd icquido chiec.

Esus bëdamboen cainte chiaid
(Duc 12.41-48)

⁴⁵ Adshumbic abi bëdamboen cainte Esusën chuipondash. —Tantia. Aton icbo tantiaquin yua bëdambo icquidën naid mibi chuinu. Icbon: “Ëbi nidan mibëdta yuaido pete sandoaid musucshun ëmbi chiacpadën ëmbi chiacpadënquien menianeta,” cac yua bëdambo icquidën adotsiash. ⁴⁶ Adnubien icbon choshon ambi chiacpadomboen yuan nasho isun bëdamboen istsiash. ⁴⁷ Adshumbic

aton yua chuitsiash. “Bëdamboen tantiaquid mibi neque. Con yua utsibo namequin con natedi dayun uata,” catsiash icbon yua bëdambo icquid caquin. ⁴⁸ Padnuen yua icsambo icquid: “Ëndenquimbo con icbo nidondash. Choenquien icchitec. Con nauidi nanu,” ⁴⁹ quiampatsiash. Adshumbic chieshtoshon abëdta yuaido cuesanetsiash. Adashic icsambo icquidobëdi icsamboec tabadtsiash. ⁵⁰ Adec: “¿Nëbida con icbo chopeba?” quenquio icnubien aton icbo chotsiash. ⁵¹ Choshon ambi chiacpadomboen nainquio icsho istuidshumbic: “Icsambo iquec,” qeshun comapenen cuesquin cuesunetsiash. Adembidi Nuquin Papan icsambo icquido cuidendac. Bëdambo icquid damianquido cuidacno icsamboshë yacno nidmendac. Adoac natiaic shubiquiendac —quequin abi bëdamboen cainte Esusën chuipondash.

25

Chido 10tedshun cainaid

chiaid

¹ Adshumbic Esusën ompoacbimboen chuiquin abi chote ushë tantienquio icte chuipondash. —Tantia. Mibi chuinu. Nuquin matses isadaidbon nacpadomboen chido bednuequid aton chido bedtanec inchëshëmbi chosho aton matsesën bëquedtanquid. Bëquedtanec choec shubun puduedash cuishonquec aibbëd pec tabadquid. Adquido icpac caondash. Chido 10tedishun: “Champi bedtanec choquid bëquedtanu,” qeshun aton tabote bëchin taboadquid icbo-icboen buanuen sanambededpac caondash. ² Aid chido 5tedi tantienquio icquido icnubi 5tedbidi bëdamboen tantiaquido icpac caondash. ³ Tantienquio icquidon: “Tabote bëchi naimëdsho cushtonon buanu,” quenquio icquin bëchi uesadbudtsaid taboteuidtsëqui sananquin caimpac caondash.

⁴ Padnuen bēdamboen tantiaquidon naimēdsho cushtonoequin tabotebēdta sedunten cushtoaid bēchi sananquin caimpac caondash. ⁵ Aden cainaqui: “Chido bedtanu,” quianec nidboed choenquio icsho isash abitedi ushcastoash ushcuededpac caondash. ⁶ Inchēsh poctsemboen: “Choeque. Bēquednu. Nid,” cac ⁷ isucunshun chidobon tabonoen tabote dēbedpac caondash. Adoshon bēdamboen tantiaquidon ambi bēboed bēchi cushtonobien ⁸ icsamboen tantiaquidon: “Bēchi beccho. Con na naimēdeque,” caquien bēchi bēboedēn ⁹ bēdamboen tantiaquidon: “Padi. Mibi meniac con na uesadtsiash. Aid uesadan shubun puduedabi nuquitedi inchēshtsiac. Piuquid menequin bēchi cushtoquid baded cushtometan,” capac caondash. ¹⁰ Adoac bēchi bedec nidnubien chido bedtanec dada chopac caondash. Chosho bēdamboen tantiaquidon aton tabote taboshon chido bedtanec choquid bēquedtampac caondash. Adtanec abēdi choash puduedshun bētashte puduedtiapimbo icnuc bēdamboen bētashpac caondash. ¹¹ Adnubien bēdamboen tantienquio icquido bēchi bedtanec chopac caondash. Choshon shēcūē bētashacsho isun: “Shēcūē shēcne, buchi. Ēbitsen puduednu,” ¹² caquien chido bedquid: “Padi. Ēmbi tantiacmaido mibi nec,” quepac caondash.

¹³ Ēmbi chuiboed tantiashun chido icsamboen tantiaquido tanenda. Bēdamboen nabi icsho: “Ēmbi tantiacmaid mibi neque. Puduedenda,” aido cacbimboen ėmbitsen Nuquin Papa yacno puduedmenquio icquin cacumechitomane. Ēbi chote ushē tantiadenquio icnuc: “¿Nēbida con Icbo chopeba?” quequin ėbi bēdamboen tantiec ėmbi chiacpadec bēdamboec tabadta —quepondash Esus abēd icquido chiec.

*Icbon piucquid daēd uaid chiaid
(Duc 19.11-27)*

¹⁴ Adshumbic abi tantiaquidon ambi chiacpadomboen nate Esusën ompoacbimboen chuiopondash. Ënapen nidnun aton piucquid dadpen dayun uaquidën aton yuabo: “Ëbi piucquid daëd uashunta,” quequin chuipac caondash. ¹⁵ “Nëidën bëdamboen tantiaquidquo icquin con piucquid ëbi daëd uashuntsiash,” qeshun aton yua piucquid 5tedi meniac caondash. Adshumbic: “Nëidëntsen bëdamboen tantiaquin adembidi con piucquid ëbi daëd uashuntsiash,” qeshun utsitsen 2tedi menepac caondash. Adshumbic: “Nëidëntsen bëdiactsëc tantiatsëcquin adembidi ëbi con piucquid daëd uashuntsëctsiash,” qeshun utsitsen piucquid abentsëcquiobi menetsac caondash. Adanec nidpac caondash icbo. ¹⁶ Adnubien piucquid 5tedi bedboedën aton matsesën nacpadomboen piucquid daëd uanuen utsibo menequin yuecshun ambi meneboed udictsëc dëniacquin bedoapac caondash. Sincoted icboedi 5tedbidi bedoapac caondash 10ted icnuc. ¹⁷ Adembidi piucquid 2ted meneboedën 2bidi daëd uapac caondash 4tedi icnuc. ¹⁸ Padnuen abentsëc meneboedën chieshquin aid daëd uainquio icquin ambi uëdëshcaboed shëcuë anantsëcquin piucquid abentsëqui ompopac caondash.

¹⁹ Yuecquo ictaneshumbien icbon choshon ambi piucquid meniondaido chuituidpac caondash. “¿Atotsi nao?” cac ²⁰ sincoted meniondaidën: “Is, icbo. Mimbi ëbi meniondaidtedbidi daëd uaombi. Nëbi mitsana 10tedi iquec,” caquien ²¹ icbon: “Ai, con na daëdpactsëc icboedi daëd uaquin mimbi bëdamboen nac. Nëbi ëbëdtan chuiquid dapa icta. Ëbëd cuishonquec tabadec cho,” capac caondash. ²² Adnubien piucquid 2tedi meniondaidën: “Is, icbo. Mimbi meniondaid 2ted icboedi daëd uaondambique. Nëbi mitsana 4tedi iquec,” caquien ²³ icbon: “Ai, ëmbi chiacpadomboen mimbi con na daëd uac.

Nëbi ëbëdtan chuiquid icta. Mibitsen ëbëd cuishonquec tabadec cho,” capac caondash.

²⁴ Adnubien piucquid abentsëcquiobi meniondaidën chieshquidëntsen: “Mimbi ancaidon nidtsinaid peteuidi bedquid mibi nec, icbo. Mimbi chiacpadomboen nainquio icsho isash chushcanquidquio mibi nec. ²⁵ Adec dacuëdampambo icquid icsho mibi dacuëdënquin mimbi meniondaid piucquid ompoquin chococaondambi. Në mimbi meniondaiduidtsëqui ictsec,” caquien ²⁶ icbon: “Chieshquiec mibi icsac. Ëmbi chiacpadomboen nambo mimbi iquec. Ëbi caic: ‘Ancanquid icquin ëbi chushcanushe,’ qeshun ²⁷ nuquin matsesën nacpadomboen utsibo meneshun piucquid daëd uaquin mimbi bedtsempac. Adoacsho aid daëd uaquin bedtsenombi. Chieshquin mimbi icsamboen nac,” ²⁸ quepac caondash. Adshun aton yua utsi caic: “Chieshquidën na bedshunshun piucquid 10ted dayun uatsëchoed mene,” cac meniac 10ted icboedi 11ted yanac caondash. Adshumbic chieshquid comapenen cuidpac caondash. ²⁹ Adembidi naindambi. Ëbi tantiaquin ëmbi chiacpadomboen naquid adembidi namequin bëdamboen tantiamendambi. Ëbi tantiesabo ëmbi chiaid niacquid bëdamboen tantiamenquio iquendambi. ³⁰ Aid yua icsambo icquid cuidacbimboen Nuquin Papan ëbi tantiesabo cuidquiendac. Ambi icsaido cuidquiacno nësecac natiaic shubiquiendac —quepondash Esus abëd icquido chiec.

Matses nashunesa cuidte chiaid

³¹ Adshumbic Esusën padpiden chuipondash. —Nuquin Papan abi yacnoshon uaido mayan bëdabobëd choec: “Abitedishun Icbomboeni nec,” quiash bëchamauampamboec dacuëdampamboec choequi chuiquid dapan tsadten tsadtoquin abitedi ismendambi. ³² Adshumbic

matses abitedimbo cho-chomequin tsidadmendambi. Adshumbic icbon aton nauidquio tsinacacimboen ëbi tantiaquido naden chiendambi. ³³ “Ëbëd tabadtequido mibi neque. Nëmbo con abiuc tabadec cho,” caindambi. Adshumbic ëbi tantiesabo chuiquin: “Ëbi tantiesabo cuidadtequido mibi neque. Con copioc tabadec cho,” caindambi. ³⁴ Adshumbic ëbi tantiaquido padpiden chuiocaindambi. “Ëbëdi tabadec cho. Matses uaquin tauabi ëndenquimboshë mibi caic: ‘Aido ëbi tantiaquido icmeshun ëbëdi tabadmendambi,’ quequin Nuquin Papan tantiaidombo yec ëbëdi bëdamboec tabadec cho. ³⁵ Mimbi ëbi nashundenec. Bundoacsho mimbi ëbi pemedenedec. Acte bundoacsho adembidi mimbi ëbi acmedenedec. Mimbi isacmaidquio icsho mimbi ëbi yuedtenec. ³⁶ Con dashcute nibëdsho mimbi ëbi dashcute menenedec. Daicsabudtsash unëstiadtsëcquio icsho ëbi tantiec mibi datsadtenec. Quënën nauedacsho mimbi ëbi isuan-isuandenedec,” caindambi. ³⁷ Adoaquien bëdamboec tabadquido: “Tantiadenquio icnuc mimbi chuipec, icbo. ¿Bundoacshodambi mibi pemedionda? Mambi mibi pemiambo yoc. Mambi mibi acte bundoacsho acmiambo yoc. ³⁸ ¿Ëmbi isacmaidquio icshodambi mibi yuedtionda? Mambi padambo yoc. ¿Dashcute nibëdshodambi mibi dashcute menepacti? Mambi padambo yoc. ³⁹ Mibi daicsacsho datsadambo iquebi. Quënën nauedacsho mibi istaniambo iquembi. Mimbi tantiadenquio icnuc chuipec,” ëbi caindac. ⁴⁰ Adoac naden chiendambi. “Tantia. Mibi chuinu. Ëmbi chiacpadomboen ëbi tantiaquido utsibo bëdamboen isquin mimbi nashundenec. Aden ëbibi nashunacimboen mimbi utsibo nashundeneque. Ëbëdi tabadec cho,” caindambi.

⁴¹ Adoshombic ëbi tantiesabotsen chiendambi. “Nuquin Papan cuidtequido mibi neque. Mibi icsaid ënte bunenquio icquid mibi neque. Nuquin Papan

Satanas aton yuabo podobitsi icsabobëdta ënenquoio icquin cuidacno nid. ⁴² Ëmbi chiacpadomboen ëbi tantiaquido nashunesambo mibi icteneque. Bundoacsho mimbi ëbi pemenquoio ictenec. Acte bundoacsho mimbi ëbi acmenquoio ictenec. ⁴³ Mimbi isacmaid icsho mimbi ëbi cacumedenec. Dashcute nibëdsho mimbi ëbi menenquoio ictenec. Daicsacsho isash mibi ëbi datsadenquoio ictenec. Quënën nauedacsho mimbi ëbi istanenquoio ictenec,” caindambi. ⁴⁴ Aden chiaquien: “Tantiadenquoio icnuc mimbi chiec. ‘Pete bundopash,’ quequin tantienquoio iccondambi. ‘Acte bundopash,’ quequin tantienquoio iccondambi. Ëmbi isacmaid icsho mambi mibi isambo yoc. ¿Min dashcute nibëdshodambi mibi istionda? Mambi padambo yoc. Mambi mibi daicsacsho isambo yoc. Mibi quënën nauedaid tantiambo iccondambi. Tantiadenquoio icnuc mimbi chuipec,” caindabi ëmbi chiacpadomboen naisabon. ⁴⁵ Adoac naden chiendambi. “Ëbi tantiaquido nashunenquoio icquin ëbibi nashunenquoio yacbibomboen ëmbi chiacpadomboen naisabo mibi neque. Nuquin Papan cuidacno nid,” caindambi. ⁴⁶ Adoac icsamboec tabadquido ënenquoio icquin cuidacnombo nidnubi bëdamboec tabadquido Nuquin Papa yacno ënëdenquoio yec tabadendac — quequin Esusën chuipondash.

26

*Esus bedshun unës uanuequin chiaid
(Mad 14.1-2; Duc 22.1-2; Uan 11.45-53)*

¹ Aden abi chote ënquin chuitanquimbic abi unës uatetsen abëd icquido Esusën chuipondash. ² —Daëdec ushun nuquin matsesën obeca bacuë unës uaindac. Tsusedpabon: “Ma con mado unës uainquoio icnu,” qeshun obeca bacuë abided unës uampid tantiaquin badiadshun

penun obeca bacuë unës uaindac. Aid ushëmbi ëbi bedshun cuesten dectamendac —quepondash Esus.

³ Adnubien tsusiobobëdi con matses chuiquid dapa dadpen abi chuiquid dapambo Caipas cuëmëdquidën shubun pudued-puduedpac caondash. ⁴ Adashic: — Nëbien Esus unës uametiad utsibo ismenquio icquin bedshun. ⁵ Nuquin matses obeca pec tabadnuc bedenquien ictiad. “Esus bëdambo icquidi cuesunec,” qeshun obeca penuec cho-choquidon nuqui cuesnushe —quepac caondash.

Chidon Esus machiuinaid
(*Mad 14.3-9; Uan 12.1-8*)

⁶ Adnubien Esus shubu dadpen icquid Betania caid yacno choash ambi daushumbo yec daicsaid bëdamiondaid Simon caidën shubun puduedpondash. ⁷ Puduedshun pec samëdshobien chidon puduedshun ambi piucquid dadpenquio menequin bedaid tëchumpin icquid bëdambo nuadquid Esus machiuimpondash: —Esus bëdamboshë icquid nec —qeshun. ⁸ Adsho isumbien Esusbëd icquidon: —¿Adenda bëdamboen nai? Ma icsambo yoc. ⁹ Utsibo menequin dadpen piucquid bedshun piucquid nibëdquido aid piucquid menetiadquidi mibi nec —quequin chido chushcapondash.

¹⁰ Adsho tantiashumbien Esusën: —¿Atotsieshun chido chushcai? Èbi bëdamboen tantiaquin ëbi ismequin bëdamboen nashunebique. Chushcainda. ¹¹ Mimbi chuiboed piucquid nibëdquido ënëdenquio yec mibëdi tabadendac. Èbien mibëdi tabadenquio yanendac. ¹² Èbi unës uashun chococate tantiacbimboen machiuinoshibique. Chushcainda. ¹³ Èmbi chiaid chuibeniacnoshon nëid chidon ëbi machiuimboed chiendac —quepondash Esus abëd icquido chiec.

Udasën Esus bedmenun piucquid bedaid

(Mad 14.10-11; Duc 22.3-6)

¹⁴ Adnubien Udas Iscadiote caid Esusböd icboedi Esus chieshënquido chuiquid dapabo chiec nidpac caondash. ¹⁵ Nidshumbic chuituidpac caondash. —Utsibo ismenquio icquin mibiuidtsëqui Esus bedmenu. ¿Tedtsi piucquid ëbi menetsia? —caquien badedi pudunquin piucquid shocoshëmpi 30ted icnuc tambantanquin menepac caondash: —Baded ëbi bedme —quequin. ¹⁶ Meniac bedanec nidec: —¿Mitsishunquiemi utsibo ismenquio icquin Esus bedmepeba? —quepanëdash Udas. Adashic Esusbëdi tabadoaic chopondash.

Unësnush aböd icquidoböd Esus pec tabadaid

(ICod 11.23-26)

¹⁷ Adnubien Esusböd icquidon: —Equipito yacnuësh cuenun pan bidiscamiabi yampid 7tedec ushquin tantiaquin tauaid ushë nëid nec —queshun Esus chuipondash. —Nuquin Papan nuquin tsusedpabo unës uamenquio icquin matamiampid inchësh tantiaquin obeca bacuë penuen ¿mitsishunquiemi mibi codocashumpe? —caquien Esusën: ¹⁸ —Edusaden yacno nidshun ëmbi tantiaid dada chiec nid. “Nuquin Icbon: ‘Chiec nid,’ cac chobi. ‘Nëbi Nuquin Papan chiacpadomboen uesquin nabanembi,’ quiosh. Min shubumbo caic: ‘Aidën shubun puduedshun Nuquin Papan nampid tantiaquin obeca bacuë pec tabadcuedednu,’ quiosh,” quequin chiec nid ¹⁹ —cac nidquimbi shubu icbo chuituidac caondash. Adoac: —Ai, ma chobono —quesho tantiaashumbien abia nidboedon aidën shubun puduedshun penuen nëish yua obeca codocapaccondash. Adnubien Esus chedo puduedpondash.

²⁰ Inchëshëmbi aböd icquido 12tedböd samëdquin Esusën pepondash. ²¹ Pec samëdquin Esusën chuipondash.

—Tantia. Mibi chuinu. Ēbi chieshēnquido ēbi bedmequid abentsēc nēmbobi iquec —quesho tantiashun ²² unēsquio yanshun abentsēcshun abentsēcshunquien Esus chuipondash abēd icquidon. —ĴĒbida cai, Icbo? —quequin abi chuishobien ²³ Esusēn: —Ēbēdtan pete codocaid ēnē punquid ēbi bedmequid nendac. ²⁴ Ēbi Nuquin Papan chiaid dada uamepampicpadquid matsesmiaid yec unēsendabi. Padnuen ēbi bedmequid comapenen cuidtequidquio nec. Anin aid tishenquio icpatecnēdan. Cuidac natiaquiendac —quepondash Udas caic.

²⁵ Adoaquien Udasēn abi bedmequidēnquio: —ĴĒbida cai, Icbo? —caquien: —Ai, mibibimbi caic —capondash. Adoac Udas puduenanec nidpondash.

²⁶ Adshumbic Esusēn pete sananquin: —Mimbi pete uaid nēid nec. Mibi bēdambo iquec, Papa —quequin Nuquin Papa chuitanquin cuēsh-cuēshbanshun abēd icquido menebampondash. —Nēid cuēsh-cuēshquin nibēdamicbimboen ēbi mēyanquin unēs uaindac. Ēbi unēs uate tantiaquin nēid peta —cac pebededtsēccondambi. ²⁷ Adshumbien Esusēn dēshoten actequid cushtoshon sananquin: —Mimbi uaid nēid nec. Mibi bēdambo iquec, Papa —quequin Nuquin Papa chuishun: —Nēid abitedishun acbeded —cac dēshoten abentsen cushtoaid pictsē-pictsen acbampondambi. ²⁸ Aid actequid acshobien Esusēn: —Nuquin Papan chiaid nuquin tsusedpan dada uapampicpadec ēbided ciudadec unēsendabi. Nēid acquin: “Esusded Nuquin Papan cuidac aton intac siebudpamboec unēsposh. Aton Madoded cuidshun Nuquin Papan ēbi padenquio iquec,” quequin nēid acquin tantiatia —capondashi.

²⁹ Adashic: —Nadquid actequid padpiden aquec cuishonquec mibēd tabadenquio iquendabi. Nuquin Papan

abitedishun Icbombo icmiac abi yacnombo mibëdi cuis-honquec tabadendabi —quepondash Esus ëbi chedo chiec. ³⁰ Adashic cuëdënten abentsec cuëdënash macuësh dapa Odibos caid pudundonoec nidanepondash Esus Udas Esus chieshënquido chiec nidbon.

Petedo chieshuidte Esusën chiaid
(*Mad 14.26-31; Duc 22.31-34; Uan 13.36-38*)

³¹ Macuësh dapa Odibos caid yacno nidquimbi Esusën chuipondashi. —Nëid inchëshëmbi Nuquin Papan chi-acpadec ëbi nianec mibitedi niquendac. Nuquin Papan naden chuipampic. “ ‘Icbo cuesnu,’ canubi aton yuabo niquendac,” quequin Nuquin Papan dada uamepampic-padec mibitedi adec niquendac. ³² Padnueni unësash uincuenendac. Adanec mibi cainuec nidaid cuëshë utsi Cadidia caid yacno ëbia nidendabi —quepondash Esus abëd icquido chiec.

³³ Adoaquien Petedo: —Mibi cuesnuec cho-chosho isash utsibo dacuëdec niquenuc ëbimboen cuenenquimbo ictsiandac —qeshobien ³⁴ Esusën: —Tantia. Mibi chuinu. Nëid inchëshëmbi cachina bënë cuëdanabi icnuc: “Ëmbi isacmaidquo aidi nec,” mimbi ëbi caindac. Cachina bënë cuëdanabi icnuc 3tedec mibi adendac —caquien ³⁵ Petedo: —Pada. Adtiapimboeni iquec. Chieshëmënkidon: “Esusbëd icquid mibi neque. Mibi cuesunenu,” caqui: “Ëmbi isacmaid neque. Padi,” quenquo iquendabi. Mibëdquiobi unëtsiandabi —Petedo quenubini: —Ai, ëbibic adecbidi ictsiac —quecuededpondabi Esusbëd icquidotedi.

Quetsemani caid yacnoshon Esusën Nuquin Papa chiaid
(*Mad 14.32-42; Duc 22.39-46*)

³⁶ Adanec nidequi cuëte dadpen nitsinacno Quetsemani yacno nidpondash. Auëshquo Esus nadpondash. —Ambobi tabadta. Udictsëc nidshun Nuquin Papa chuitanu —quepondash.

³⁷ Adashic Petedobēdta Sebedeyon mado daēd buanec nidpondash. Uditsēc nidequi unēsquio yanec shubianti-adtsēcquio yampac caondash. ³⁸ Adshumbic Petedo chiec: —“Matsestedi icsaid ěmbi bedshunsho isun Nuquin Papan ěbi istiapimbo yanendac,” quiash unēsquio iquebi. Ębi yacpadec ushenquio yec nĕmbobi isec tabadta —quianec ³⁹ uditsēc nidash nidaidĕn uebudshun Nuquin Papa chuipac caondash. —ĵAda mimbi ěbi unĕs uamenquio icpatsia, Papa? Mimbi: “Ai, mibi unĕs uamenquio iquembi,” cac bĕdambo ictsiabi. Mimbi: “Nĕbi mibi unĕs uamenu,” cac mimbi tantiacpadequi unĕsendabi —quepac caondash Esus Nuquin Papa chiec.

⁴⁰ Adtanec choshon isquien Petedo chedo ushpec: —Ushenquio yec isequi tabadta —caboqui. —ĵYuec-yuecpactsec ushenquio icquin istiapimboda icco? ⁴¹ “Satanasĕn icsamenushe,” qeshun ushenquio icquin Nuquin Papa chuita. “Ushenquio iquebi,” queboedobi ushcas mĕmunenquio yec mibi ushpec —capac caondash Esusĕn Petedo chedo chuiquin.

⁴² Adtanec padpidec nidoashun Nuquin Papa chuioaic: —Ębi unĕs uametiadquio icquin ěbi unĕs uameta, Papa. Ębi unĕs uametiapimbo icquin mimbi ěbi unĕs uamenquio ictsiac. Mimbi tantiacpadomboen nata, Papa —quetanec ⁴³ choaquin isquien Petedo chedo ushoaic ushcas mĕmuntiapimbo yec.

⁴⁴ Adsho istanec nidoashun ambi chuibocpadomboembidi Esusĕn Nuquin Papa chuitanepac caondash tedesteden.

⁴⁵ Adtanec choaquin ushash uesho istuidoashun: —ĵUshecta ue? Nĕbimbobi ěbi unĕs uamenuen ěbĕd icboedĕmbi icsambo icquido ěbi bedmeque. ⁴⁶ Nidnu nid. Is. Ębi bedmenuec ěbi bedmequid choeque —quepondash Esus Udas chosho isash.

Abi chieshënquidon Esus bedaid

(Mad 14.43-50; Duc 22.47-53; Uan 18.2-11)

⁴⁷ Adnubien Udasën Esusbëd icboedën bedtanac matses dadpen cuesantiadpambo yec chështebëdta cuate sanambededsëcquiec cho-chopondash. Nëish yua abided unës uaquido chuiquid dapabobëdta con matses tsusiobon: —Bedtan —cac cho-chopondash. ⁴⁸ Ambi bedtanaidobëd cho-choquimbien Udasën: —“Nëid Esus nec,” quequin adoendambi —abi quiacpadembi ⁴⁹ Esus tansudcatuidpondash: —Chobi, Icbo —quequin. ⁵⁰ Adoaquien Esusën: —Ëmbi tantiaboedquio mibi nec. Ëmbi adoboedënquiobi mimbi tantiacpadomboen nata —queshobien cho-choquidon Esus bedtuidpondash. Aden bedshun: —Cuidmenun chuiquid dapa yacno mibi buanu —capondash.

⁵¹ Aden Esus bedshobien abëd icquidën abi tsiusudaid chështe chictanquin chuiquid dapan yua pateshunepondash. ⁵² Adoshobien Esusën: —Padi. Chën. Min chështe tsiusudoata. Cuesanquid icsho adembidi cuidnushe. ⁵³ ¿Tantienquioda ique? Ëmbi chiac con Pan ambi abi yacnoshon uaido mayan bëdabo dadpenquioshë ëbi cudasmenuen chometsiash. ⁵⁴ Nuquin Papan aden ëbi cudasmiac bedadtiapimbo icsho ¿mitsipaden Nuquin Papan chuiquin dada uamiampicpadomboen ëbi naden bedpatsiash? —capondash pateshunianquid chuiquin.

⁵⁵ Adashic abi bedquido chiec: —¿Atotsi quenuc chështebëdta cuate sanambededsëcquiec ëbi bednuec cho? ¿Nuqui chuiquid dapan chiaid niac-niacquin matses cuesanquido chuiquid dapadabi nedi? Mabi mimbi isboedquiobi neyoc. Badiadquidën badiadquidënquien Nuquin Papa tabadte shubu uashunaid daquënë uaidën puduedshun chuideneshobi ma mimbi ëbi bedenquio

icboc. ⁵⁶ Padenquio icboedombi Nuquin Papan tanti-acpadënquiobi mimbi ëbi bedec. Ëbi bedte chuiquin Nuquin Papan nuquin tsusedpa dada uamiampicpadom-boen mimbi ëbi bedec —quequin Esusën chuinubini niquepondac: —Cuenenquio ictsiabi —queboedi.

Caipas caid yacno Esus buanaid

(Mad 14.53-65; Duc 22.54-55, 63-71; Uan 18.12-14, 19-24)

⁵⁷ Adnubien chuiquid dapambo Caipas cuëmëdquid yacno Moisesën dada uampid chuibanquidobëdi tsusio ut-sibo cho-chopac caondash. Adnubien ambobi Esus bëpac caondash. ⁵⁸ Adnubien Petedo uanoshon isbëec tsyuec chopac caondash. Choash chuiquid dapabo tabadacno daquënë uaidën puduedpac caondash. Adashic Esus mëyansho isnuec puduedash chuiquid dapan namiaido sondadobëdi tsadtuidpac caondash Petedo.

⁵⁹ Adnubien cho-choboedo tsusio dapabo: —Esus unës uamenuen: “Esus icsasho isombi,” quequin muaquidon chuisho tantianuna —qeshun chomiac muaquido dad-penshun: —Esusën icsamboen nasho isombi —quequin chuipac caondash. ⁶⁰ Aden Esusën naid muaquin chuiquin Esus unës uatiadquio icquid chiambo icpac caondash. Adnubien muaquid daëdshun chuituidpac caondash. ⁶¹ —Nuquin Papa tabadte shubu uashunaid caic: “Uesquin chic-chictanquin padpiden nacnenoaquin daëdec ushqin nainendambi,” ma Esus quepondac —quepac caondash.

⁶² Adshobien chuiquid dapabo chuiquidën Esus chuiquin: —¿Atotsi quenuc ado? ¿Atotsi nëidën chiec? —caquien ⁶³ Esusën ëcbedenquio icpac caondash. Adshobien chuiquid dapan: —Abimbo chuita. “Nuquin Papan cuidchitoshe,” qeshun abimbo cata. ¿Nuquin Papan chomiaidquio aton Madombobida mibi nepe? —caquien ⁶⁴ Esusën: —Ai, mimbi chiaidquio nebi. Tantia.

Mibitedi chuinu. Nuquin Papan abitedishun Icbombo icmiacshobini mimbi isendac. Adecbidi Nuquin Papa yacnuësh padpidec choec abu ushu yacnuësh choshobini mimbi isendac —quepac caondash Esus.

⁶⁵ Adsho tantiash chuiquid dapambo chieshtotanquin aton dashcute bëntse icquid dached-dachedquepac caondash. —¿Ada tantio? “Nuquin Papan Madombobi nebi,” quequin Nuquin Papambo icsamboen chiec muaposh. Ambi icsamboen naid utsi chuisho tantiatiapimbo iquebi. Ambibi Nuquin Papa muauasho tantiashun ⁶⁶ ¿Atotsi natiadquo ique? —caquien abëdtan chuiquid utsibo: —Adquid cuidquid quedeneque. Unës uamequimbien ictiad —quecuededpac caondash.

⁶⁷ Adshumbien Esus chieshënquin bëcuishtuabudnetanquin mëshëbudtanquin mëdanten bëse-bësepac caondash. Bëse-bësesho istanquin utsibontsen istiapimbo icnuc Esus dashcuten bëpuctanquin mëdanten bëcues-bëcuespac caondash. ⁶⁸ Bëcuestanquin: —“Nuquin Papan madombobien nec,” canu. En chui. Tantianu. ¿Tsundan mibi naoshe? —cabededtsëcquien mamënshumpac caondash Esus.

*Esus caic: Ęmbi isacmaid nec, quequin Petedon chiaid
(Mad 14.66-72; Duc 22.56-62; Uan 18.15-18, 25-27)*

⁶⁹ Adnubien Petedo tabadacno choshon chido yuan chuituidpac caondash. —Cadidia yacnocquid Esus caid-bëd ma mibi icpaboc —caquien: ⁷⁰ —Tantiadenquo icnuc mimbi chiec. Ęmbi isacmaidquo mimbi chiec —quec Petedo muaic taëpac caondash.

⁷¹ Adanec daquënë uaidën puduedte shëcuë dayun nidash nidtuidpac caondash.

Adshobien chido yua utsin: —Nasaded yacnocquid Esusbëd ma nëid icpaboc —caquien ⁷² Petedo: —Ma Ęmbi

isacmaidquio Esus neyoc. Abimbo caimbi. Nuquin Papan cuidchitoshe muasho —queoapac caondash muequi.

⁷³ Adash yuec-yuecpactsēcshumbien ambo tabadquidontsen Petedo chuipac caondash. —Aidbēd icquidien mibi nec. Cadidia yacnocquid onquiacbimboec ma mibi onquepayoc —quesho tantiash ⁷⁴ Petedo: —Comapenen Nuquin Papan cuidchitoshe muasho. Abimbo caimbi. Ma ěmbi isacmaidquio neyoc —queoapac caondash.

Adec 3tedec Petedo muanubien cachina bēnē cuēdampac caondash. ⁷⁵ Adsho tantiashun Petedon Esusēn chuiboedquio tantiactampac caondash. —Cachina bēnē cuēdanabi icnuc mimbi ěbi caic: “Ěmbi isacmaid nec,” capendac tedesteden —quequin Esusēn chuiboedquio tantiactanec umanuc puduenanec nidec Esus muauabosh natiaic shubinidpac caondash.

27

Pidato caid yacno

Esus buanaid

(Mad 15.1; Duc 23.1-2; Uan 18.28-32)

¹ Adnubien chuiquid dapabo aton tsusio utsibobēdi Esus isec ushenquio badiadpondash. Badiadshun Esus chieshēnquin: —Nuqui yuaquid ancanquid Esus unēs uamec nidnu. Nid —queshun ² podo cataneshun ancanquid Pidato cuēmēdquid ismenuen Esus buampac caondash.

Esus bedmequid Udas tētaniadaid

³ Adnubien Udas Esus bedmeboed: —Unēs uamechitembien iquec. Unēs uametiapimbo iquebi. Ěmbi

bedboed piucquid shocoshëmpi 30ted meneoatanu — quianec abi meneboed tsusiobo menenuec nidpac caondash. ⁴ Nidshun tsusiobo chuituidpac caondash. — Icsachitobi. Unës uanuequido bëdambo icquidi bedmechitombi. Nëid mimbi meneboed mibi menenuec chobi. Në bed —caquien tsusiobo: —Padi. ¿Atotsieshun nai? Ma mimbi bedmepaboc —quepac caondash Udas caic. ⁵ Adoquien Nuquin Papa tabadte shubu uashunaid shëcuën ambi bedboed shocoshëmpi piucquid ansecanec nidash uano cuenash tëtaniadpac caondash Udas.

⁶ Aden piucquid shocoshëmpi ansecacsho bedashien tsusio dapabo: —Nuqui dayun uaid shocosh utsibëdta dayun uatiapimbo iquec. Unës uanuen meniaid shocoshëmpi dayun uatemaïd quedeneque. ⁷ Matsu nacnenquidën tied bedquin nëid menenuna. Nuquin matsespenquio isedquido unësacsho ambo chococanun aid tied bednuna —queshun piucquid meniac caondash. ⁸ Aidon bedacsho isun nëbi aid tied cuënquin nadopec. — Unës uamequidën bedaid tied nec —capec. ⁹ Aden Udasën shocoshëmpi 30ted menete nuquin tsusedpa Edemias caidën dada uapampicpaden napac caondash. Naden dada uapampic. “ ‘Aid bednuen Isadaïdbon piucquid shocoshëmpi 30ted meneuidaid bedoashun ¹⁰ matsu nacnenquidën tied bedquin meneoapondash,’ quequin Nuquin Papan chiaïd dada uaombi,” quepampic Edemias.

*Pidato caidën Esus chuimïaid
(Mad 15.2-5; Duc 23.3-5; Uan 18.33-38)*

¹¹ Adnubien isadaïdbo yuaquid ancanquid Pidaton Esus bëacsho chuipac caondash. —¿Min matses isadaïdbo chuiquid dapamboda mibi nepe? —caquien Esusën: — Ai, aid nebi —capac caondash. ¹² Adnubien abi chieshënquidon muaquin Esusën naid Pidato chuipac caondash. Adsho tantiashun Esusën ëcbedenquio icpac caondash.

¹³ Adshobien Pidaton Esus padpiden chuiioaquin: — Mibi icsaid dadpen chuipec. ¿Tantienquioda ique? ¿Ëbedantiapimboda ique? —caquien ¹⁴ ëcbedenquio icpac caondash Esusën. —Nëidon muauac nebi —quequin chienquio icsho tantiash: —Adquid tantiambo iquemi — quepac caondash Pidato.

Esus unës ua, quequin chiaid

(Mad 15.6-15; Duc 23.13-25; Uan 18.38-19.16)

¹⁵ Nuquin Papan isadaidbo unës uainquio icquin matamiampid tantiate ushëmbi seta utsin-utsinquien Pidaton quënën nauedaïd isadaïdbo abentsëc cuemedenedec. Pidaton: —¿Tsutsi abentsëquimbi cuemepe? —cac isadaïdbon chiacpadquid abentsëc cuemedenedec. ¹⁶ Esus bëabi icnuc uimanëmënquidquio Badabas cuëmëdquid nauedpac caondash.

¹⁷ Adnubien Esus cuidte chuïsho tantianuec cho-choash dadpenquio tabadpondash. Adsho isumbien Pidaton: — ¿Tsutsi abentsëquimbi cuemepe? ¿Badabastambi cuemepe? ¿Nëbi mimbi bëboed Esus Quidistu caïdtambi cuemepe? —capondash. ¹⁸ —Esus chieshënquidon: “Nuqui padenquio yanuc nuqui dëniaquec Esus chuïquid dapa yanushe,” qeshun Esus bëaccosh. Nëmbo tabadquidon: “Esusquio cueme,” capashuni —quequin tantiaquin aden chuïpanëdash Pidaton.

¹⁹ Adashic matses icsaïdo cuidte chuïnuec tsadte dapan abucquio tsadtopondash Pidato. Adshobien yuan chuituidpondash. —Min chidon: “Chuitan,” cac chobi. Esus caic: “ ‘Aïd dada bëdambo icquid neque. Unës uamenda. Dacuëdampambo icsho ushquin isombique. Unës uamenda, quïosh’ quequin chuitan,” min chidon cac chobi mibi chiec —quequin aton yuan chuituidpac caondash.

²⁰ Adnubien Esus chieshënquido tsusiobon ambo tabadquido chuibudpondash. —Pidaton: “¿Mitsicquidimbi cuemepe?” cac: “Badabas cuemequin Esus unës ua,” cado-cadota —cac: —Ai, adoendambi —quecuededpondash.

²¹ Adnubien Pidaton padpiden: —¿Mitsicquidimbi cuemepe? —caquien ambo tabadquidon: —Badabas cuemeta —cadonepondash. ²² Adoaquien Pidaton: —Ma Esus Quidistu caid. ¿Mitsipadopembimbi aid ique? —caquien: —Unës ua. Cuesten dectanquin unës ua —quecuededpondash.

²³ Adoaquien Pidaton: —¿Atotsieshun mimbi adope? ¿Atotsi icsa uasho mimbi adope? —caquien buëdanquiec cuëdec: —Cuesten dectanquin unës ua —quecuededpondash.

²⁴ Adsho —Padi icnuna —caqui niacbidanquiec adequi unës uate bunquiec cuesantiadpambo yansho isash: —Acte beccho —quepondash Pidato. Bëacsho tasun dapan cushtotanec mëpamëdquin abitedi ismepondash. Adashic Esus caic: —Nëid unës uametiapimbo iquebi. Nëid unës uamete bunec mibien cuidadtequidombo nendac. Ëmbien adotiapimbo iquec. Mëpamëdec bëchish ucadacimboec mimbi icsamiaid ucudebi —quiash mëpamëdquin ismepondash Pidaton. ²⁵ Adsho tantiashien: —Con nabobëdtsëqui adequi cuidadtequidombo icnuna —quecuededpondash abitedimbo.

²⁶ Adsho tantiashun Badabas caid cuemequin Esus cueshcaten cueshcamepac caondash. Adshumbic: —Cuesten dectanquin unës uatan —quequin sondado buamepac caondash Pidaton.

Esus mamëshunaid
(*Mad 15.16-20; Uan 19.2-3*)

²⁷ Adoaquien sondadon Pidaton shubun Esus yuedshun: —Isec cho —cac aton sondado utsibo dadpen cho-chopac caondash. Cho-choshon Esus mamëshumbedepac caondash unës uanumbi. ²⁸ Abi dasiuidaid ênapen icquid chicshun: —¿Chuiquid dapada nedi? —quequin dashcute piumbo icquid dasiuintanquin ²⁹ mauete pinchucpinchucpambo icnuc nacnenaid mauemepac caondash. Adshumbic aton matses chuiquid dapan sananacbimboen sananuc abiucshun cuate sanamepac caondash. Adshumbic aton matses chuiquid dapa ismiacbimboen mamëshunquin: —Is. Isadaidbo chuiquid dapambo neque —qeshun danëshên sebudquin Esus ismepac caondash. ³⁰ Adshumbic dacuishtucatanquin ambi cuate sanameboed bedshuntanquin aidëmbi matombudnepac caondash. ³¹ Aden mamëshuntanquin ambi dasiimboed chictanquin aton dashcutebidi dasiuiuoapac caondash. Adoshon: —Ma unëshnuequin cuesten dectanec nidnu. Nid —quequin Esus buampac caondash.

Esus cuesten dectanaid
(*Mad 15.21-32; Duc 23.26-43; Uan 19.17-27*)

³² Buanquin Esus abi dectante cuate yuëmemebanquimbi dada nidaid Sidene caid yacnuësh choquid Simon cuëmëdquid Esusën yuëmiaid sondadon chiadtomebidampondash. ³³ Adobidanec nidec macuësh dapa yacno matses mapi canitebimboec isadquid Codocota caid yacno chopondash.

³⁴ Choshombien sondadon uba chinaid actequid paëmbo dauë nêcushaid Esus meneuidpondash. —Në. Ac —cac pictsêc tantanec: —Padi —quepondash aquenquio yec. ³⁵ Adshobien cuate napotiaid bëboedën dectampondash. Dectanshumbic ambi chicshumboed Esusën dashcute bednuequin sondadobon abi cuëmëdquidtedi dada uabanshun têchun sandoshon

cadotanequin dada uatempi puduemaiad isbanquin Esusën dashcute bedbampondash. ³⁶ Adash: —Esus unëso isnu —quec sondado tabadcuededpondash.

³⁷ Adshumbic: —“Nadquid icsho cuidquin unës uac,” quequin ma isquidon tantianu —queshun cueste cuëshën naden dada uapaccondash. —Nëidquio Esus nec. Isadaidbo chuiquid dapambo nec —quequin dada uaid Esusën mapino dectampondash. ³⁸ Ampequid daëd cuesten ëquë dectambudcuenquin dectantanquin nënantanquio Esus dectampondash.

³⁹ Adshobien podqued cuëmanquio Esus diadsho isbidanequin chieshënquin chuipondash. ⁴⁰ —“Nuquin Papa tabadte shubu uashunaid chic-chictanquin daëdec ushquin nacnenquin nainendambi,” quiondaid yec bud. Nuquin Papan madombo yec unësenquio yec auëshquiobi bud —cabidanepondash. ⁴¹ Adecbidi chuiquid dapabo yec Moisesën dada uampid chuibanquido yec tsusiobo yec quequido Esus icsamboen mamëshhunec nadpondash. ⁴² —Utsibo ismenuembien comapenen tantiaquin matses bédamechitosh. Adembidi comapenen tantiaquin nacnenash budsho isnuqui. “Isadaidbo matses chuiquid dapambo nebi,” quequid neque. Ma budnu. Dectamboedi abibi budsho isash: “Nuquin Papan chomiaid yec Nuquin Papan Madombo nec,” quetsiabi. ⁴³ “Nuquin Papa tantiaquid yec Nuquin Papan madombo nebi,” quequid icsho: “Ai, con madombo nec,” quequin ma Nuquin Papan budmenu. Unësenquio icsho isnu —quepondash tsusiobo. ⁴⁴ Adnubien abëdta cuesten dectamboedon ampequidontsen Esus mamëshhumpondash.

Esus unësaid

(Mad 15.33-41; Duc 23.44-49; Uan 19.28-30)

⁴⁵ Adnubien ushë cuembo icnuc inchëshbocpadquiec inchëshpondash. Ushë cuembo icnuc inchështanec ushë

budambi ushëmbo yanoapondash. ⁴⁶ Ushëmbo yanubien Esus comapenec cuëdec nadpondash. —Eloi, Eloi, lama sabactani —quec con onqueten cuëdpondash. —¿Atotsieshun ëbi bëdamboen isenquio yano, Papa Edoen? —quec adondash.

⁴⁷ Adec cuëdsho tantiash isquido nadpondash. —Edias yampid cuënychitequien nec —quiampondash. ⁴⁸ Adnubien Esus isec tabadquid abentsëc titinquianec nidshun shapu-shapupactsëcquid bedtampondash. Bedtanshumbic actequid mucacquid anidtsëcquidën shapu-shapupactsëcquid punshun cueste dëdectanshun abuc sananec: —Chishmenu —queuidpondash. ⁴⁹ Adnubien abi isquido: —Padi. Nuquin tsusedpa Edias yampid choshon budmesho isnu —quepondash.

⁵⁰ Adnubien padpidec buëdanquiec cuëdtanec Esus unëspondash. ⁵¹ Esus unësnubi Nuquin Papa tabadte shubu uashunaid yacnuësh: —“Quënë uquëducquidën Nuquin Papa tabadtembo nec,” caidën utsi puduednushe —queshun dashcute ënapen icquid dectanaid abucuësh canchedbudcuenac caondash abitiombi. Nuquin Papan ambi bëdamboen iste tantiamenuen nanëdash. Adnubien nidaid uëdëquequidën cuënote dapa dadpen cuëshëdbudnepac caondash. ⁵² Adec unësaid nauedaid shëcuë bëtashte cuënote dapambo cuëshëdnubien Nuquin Papa tantiaquido ënden unësaido abentse-abentsec uincuenanec chopac caondash. ⁵³ Esus uincuenan adec uincuenaidon shubu dadpen icquid Edusaden caid yacno nidshun matses dadpen ismepac caondash.

⁵⁴ Nidaid uëdëquenuc dacuëdampambo icsho isashien: —Esus unëso isnu —quiash tabadquido sondado chedo abi chuiquidbëdi dacuëdtanec: —Ma Nuquin Papan Madombobi nepayoc —quepac caondash.

⁵⁵ Adnubien chidobo Cadidia yacnuësh Esusbéd choquin abi codocashumboedo Esus unëso isnuec ancuenshun isec tabadpac caondash. ⁵⁶ Nëidted icpac caondash. Nëidic Madia Mactada yacnuësh choquid. Nëidic Madia utsi Acobon tita. Aid Ose cuëmédquidën titabidi niosh. Nëidic Sebedeyon chido Uanën tita. Aid Acobo cuëmédquidën titabidi niosh. Aidtedi uanoshon isbededec tabadpac caondash.

Esus chococaid

(Mad 15.42-47; Duc 23.50-56; Uan 19.38-42)

⁵⁷ Adnubien inchëshbudtsëqui aton na dadpen dayun uaquid shubu dadpen icquid Adimateya caid yacnocquid Ose caid: —Esus tantiaquid nebi —quianec Esus bedec chopac caondash. ⁵⁸ Choshombic chuiquid dapa Pidato caid chuituidpac caondash. —Esus bednuec chobi —cac aton yua chuiquin: —Ma buanu. Bedmetan —capac caondash Pidaton. ⁵⁹ Aden bedtanshun Osen Esus dashcute bëchish nibëdquidënquio nuamboshë icnuc datanedonepac caondash. ⁶⁰ Adotanquimbic nidaid cuënoteuidpambo icquid macuësh tsimpiduc shëcuë uaboed ambi: —Ëbi unësacsho nauedte nendac —caidëmbi Esus nauedpac caondash Osen. Adotanquimbic cuënote dapabidi bëtashte uaid bincumbëshun bëtimpac caondash. Adotanec nidpac caondash Ose. ⁶¹ Adnubien Madia utsibéd Mactada yacnuësh choquid Osen Esus nauedsho isbosh ambobi tsadpac caondash.

Esus nauedaid isec sondado tabadaid

⁶² Isadaidbon obeca bacuë unës uacpadën Esus unës uamiash abentsec ushashi chonoadtemaid ushëmbi Esus chieshënquido Pidato caid chiec nidpac caondash. Padis-eyobobëdi nidshun chuiquid dapabon Pidato chuituidpac caondash. ⁶³ —Esus nadpadenec. “Unësash daëdec ushash uincuenendabi,” quec muapadeneque. ⁶⁴ Daëdec

ushquin min sondado Esus nauedaid cudasmeta. Esusbëd icboedon chicshun buanushe. Aden buanash: “Uincuenaccosh,” quec muanushe. Unësabi yec abi: “Nuquin Papan madombo nebi,” quec muaic icsambo iccosh. Adem-bidi: “Uincuenaccosh,” quequin muauac icsamboshë ict-siashe. Min sondado: “Cudasta,” quequin chuita —capac caondash Esus chieshënkuidon. ⁶⁵ Adoaquien Pidaton: —Ai, con sondado buantan. Aden buanshun: “Unësaid nauedaid cudasec databëdta,” cata —capac caondash. ⁶⁶ Adoaquien isadaidbo tsusiobon sondado buanshun cuënote dapa bëtashaid bucun bëbitaccapac caondash. —Bëbitaccaid isash: “Chuiquid dapan bëbitaccamiaid nec. Cuidnushe. Esus chictiapimbo iquebi,” ma quenu —qeshun bucun bëbitaccapac caondash. Adoshon: —Beduanushe. Isquiec tabadta —capac caondash sondado chedo chuiquin.

28

Esus uincuenaid

(*Mad 16.1-8; Duc 24.1-12; Uan 20.1-10*)

¹ Esus unësbon abentsec ushash abi chonoadtemaid-ëntsen abentsecbidi ushash dominco badiadnuc chidobo Esus nauedshun bëtimboed isec tabadnuec padpidec choapac caondash. Mactada yacnuësh choquid Madia utsibëd isec choapac caondash. ² Choash isec tabadnubi nidaid uëdëquiampac caondash. Adnubien Nuquin Papan abi yacnoshon uaid mayan bëda abucuësh budtanquin cuënote dapa bëtashaid shëcbempac caondash. Adtanec cuënoten tsadtopac caondash. ³ Mayan bëda yec abu bedbedquiacbimboec ushëmboshë bëchamauanquiec icpac caondash. Aton dashcute adquiobidi bëchish nibëdquiec ushumboshë icpac caondash. ⁴ Adec dacuëdampambo icsho isashien unësaid cudasquido sondado dacuëdtanec

uëdëquec tantiadempambo yec padishbudnepac caondash abitedi.

⁵ Adnubien mayan bēdan Madia chedo chuipac caondash. —Dacuēdenda. Cuesten dectanquin unēs uaboed Esus isnuec mibi tabadec. ⁶ Nibēdec. Nidosh. Ambi chuibocpadequi uincuenash nidosh. Abi uebocno en isec cho —cac chidobon anisnubien padpidec onquequin chuiopac caondash. ⁷ —Mimbi isboed Esusbēd icboedo chiec nid. Badedquio nidshun naden chuita. “Unēsboedi uincuenash Cadidia yacno abia nidshun mibi cainendac. Anoshon mimbi Esus isendac,” quequin chiec nid —caquien ⁸ auēshquiobi chidobo dacuēdboedi cuishonquec titinquier nec nidanepac caondash.

⁹ Titinguianec nidaneshobien Esusēnquiotsen bēquedpac caondash. Adash: —Mibi isnuec nebi —quepac caondash. Adshobien chidobon: —Con Icho nec —quequin ismenuen danēshēn sebudquin taē uidēn uapac caondash. ¹⁰ Adoaquien Esusēn: —Dacuēdenda. Con utsibo ēbēd icboedo chiec nid. “Cadidia yacno nidec nid. Anoshon mimbi Esus isendac,” quequin chiec nid —caquien chiec chopondash Madia.

Esus uincuenisho isun sondadon muauaid

¹¹ Madia nidnubien Esus nauedaaid isquido sondado abi chomeboedo isadaidbo chuiquido chiec chopac caondash. Mayan bēda chonoc Esus uincuenisho chuituidpac caondash.

¹² Adoaquien isadaidbo chuiquidon aton chuiquid utsibobēd onqueshun aid sondado chedo chuipac caondash. —Mimbi chuiboed utsibo chienda. Mibi piucquid dadpen menenu —queshun piucquid dadpenquo menepac caondash. ¹³ —Mimbi isboedquio chienquo icquin naden chuita. “Ēbi chedo ushtoan abēd icboedon Esus ampequin

beduanaccosh,” quequin utsibo chuita. ¹⁴ Mibi caic: “Sondado ushtoac caosh,” quequin chiac mibi chuiquid dapa Pidaton chushcaquin mibi cuidnushe. Aid: “Chushcaquin cuidenda,” quequin chiendambi —queshun ¹⁵ piucquid meniac bedanec nidec isadaidbo chuiquidon chiacpadec muapac caondash sondado. Adembidi nēbi isadaidbo dadpeshun: “Esus ampiac,” quequin chuioaic.

Ĕbi chuibeneta, quequin Esusēn chiaid

(Mad 16.14-18; Duc 24.36-49; Uan 20.19-23)

¹⁶ Adnubini Esusbēd icboedo 11tedi yec Esusēn chi-acnombo Cadidia yacno nidec macuēsh dapa yacno nidanepondac. ¹⁷ Macuēsh dapa yacno nidquimbi Esus istuidpondambi. Istuidshumbic: —Con Icho neque. Ismenu —queshun danēshēn sebudpondambi. Utsibombien: —¿Con Icbombobida nepeba? —capondash.

¹⁸ Adsho isun Esusēn anoentsēqui choquin chuituid-pondash. —Ĕbipadquid utsi nibēdec. Nuquin Papan uaido abitedi con na nec. Abitedishun Icbombo icquin abitedimbo namequidquio nebique. Mibitsen namenu. ¹⁹ Nidaid utsi-utsiec yacno nidshun Ĕbi tantiaquido icmenuen mat-ses abitedi Ĕmbi chiaid chuibeneta. Adoac Ĕbi tantiabensho utsibo ismequin acten mentobeneta. “Esus tantiabenshun Nuquin Papatsen tantiaquid nec. Nēid-bēd Nuquin Papan Mayan tabadeque. Utsibo ismenu,” quetanquin aden acten mentobeneta. ²⁰ Mimbi mentoaido chuiban. “Nuquin Icbon chiacpadec bēdamboec tabadnuna,” quequin Ĕmbi chuiboedtedi chuiban. Mimbi adosho isash mibēd iquendabi. Nidaid abitedi nibēdanabi icnuc mibi chedo nianenquio iquendambi. Adembidi Ĕbi tantiaquidotedi niantiapimbo iquebi —quepondash Esus Ĕnquimbi chiec.

Esuquidistu Chuiquin Tantiamete
New Testament in Matsés (PE:mcf:Matsés)

copyright © 2008 Wycliffe Bible Translators, Inc.

Language: Matsés

Translation by: Wycliffe Bible Translators, Inc.

Matsés [mcf], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Matsés

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 13 Mar 2019 from source files dated 12
Mar 2019
446da786-5bd1-5ffa-85e2-9eff4052cf8b